



6

39-c


47




6-39.c.47


















XXXI. 13. 4

L I T E R Æ

Pseudo-Senatus Anglicani,

CROMWELLII,

Reliquorumque Perduellium
nomine ac jussu con-
scriptæ

A

JOANNE MILTONO.



Impressæ Anno 1676.



AD LECTOREM.

CUm primum ad manus nostras hæ chartæ pervenerunt, dubitavi diu utrum illas prælo potius aut flammis committerem, donec memores misericordie istius quæ Authori olim quantumvis in Sacram Majestatem fœdissimè delinquenti ignoverat, stultissimam fore inclementiam judicavimus perituris ejus operibus non pepercisse. Equissimum enim plerisque semper visum est ut Principis cuiuscunque monitis & imperio parere debemus, illius etiam facta imitemur. Non autem hic tibi quidvis propinamus quo Juniorum mores & ingenia corrumpere, aut aliorum seditiosam & impotentem regnandi libidinem palpare satagimus. Id solum rerum scriptarum ornatum, & Latini sermonis elegantiam tibi commendatam volumus: est enim forsitan dignissimus qui ab omnibus legeretur Miltonus, nisi styli sui facundiam & puritatem turpissimis moribus inquinasset. Cum autem ex hisce Literis possis forsitan nonnulla excerpere quæ temporis istius quo scriptæ sunt

* 2

sunt



AD LECTORUM.

*sunt Annales illustrare: Et pervicacem
Rebellium istorum malignitatem detegere
& explicare poteris, nos illas eo nomine
in lucem edi curavimus. Videas interim
post Reges exactos, quam ornate pelle.
Leoninā indutus sit Asinus; & dum Le-
gationes designant perduelles, mittunt
Internuncios, moliuntur bella, reliquaque
Regia Majestatis assumunt insignia, po-
testatem illam quam inique vindicaverant
sibi debitam & ritè commissam esse arbi-
trantur. Habeas tibi, Lector, & his in tui
commodum & malorum hominum perni-
ciem perfruare.*

LITERÆ PARLAMENTI

nomine Scriptæ.

Senatus Populusque Anglicanus
 Amplissimo Civitatis Hambur-
 gensis Senatui,

SALUTEM.

QUàm diù , quàmque multis de causis
 instituta à majoribus nostris cum am-
 plissimâ vestrâ civitate amicitia in hunc
 usque diem permanferit , & vobiscum
 unâ libenter agnoscimus , & sæpiùs etiam reco-
 lere non est molestum. De eo autem quod ex
 literis vestris 25. Junii datis intelligimus , homi-
 nes quosdam nostros non eâ quâ soliti sunt fide
 ac probitate in suis apud vos negotiis versari , nos
 quidem ad certos ejusmodi rerum peritos statim
 retulimus , ut in lanarios , cæterosque pannî
 opifices acriùs inquirerent ; eamque porrò ope-
 ram daturos nos esse pollicemur , ut & æqui bo-
 nique studium apud nos , & nostra omnia erga
 vos officia constare sentiatis. Verùm & quid-
 dam est quod etiam a vobis vicissim non nos
 duntaxat , sed ipsum jus & fas omne postulat ,
 ut nostræ gentis mercatoribus , vestris hospiti-
 bus & sua privilegia conservare , & eorum vi-

A

tam.

tam, atque fortunas, prout eâ civitate dignum est, vestris opibus defendere velitis. Quod, ut prioribus literis enixè petivimus, ita nunc etiam ut vehementiùs efflagitemus, faciunt quotidiana mercatorum querelæ, quas ad nos deferunt; suam nimirum salutem atque rem omnem rursus apud vos in dubio esse. Quamvis enim literarum nostrarum quas pridem ad vos dedimus fructum aliquem ad tempus percepisse se fateantur, & ab injuriis nefariorum hominum aliquantum respirasse, nunc tamen post adventum *Cochran* illius in urbem vestram (de quo etiam priùs questi sumus) qui mandatam jam sibi à *Carolo* defuncti nuper Regis filio Legationem nescio quam Prædicat, se omnibus contumeliis, minis, armis etiam Sicariorum petitos solitâ vestrâ defensione atque tutelâ caruisse. Adeò ut cum unus atque alter è mercatoribus cum ipso etiam Societatis Præfecto, in navem quandam prædatoriâ per insidias abducti essent, cæteri-que vestram fidem implorarent, à vobis tamen nullum auxilium impetrare potuerint, donec ipsi suo Marte mercatores, non sine magno suorum discrimine captos in eo flumine, cujus vestra urbs domina est, ex latronum manibus eripere cogerentur. Quos cum illi bonis auspiciis domum reduxissent, & ab indignâ servitute veluti manu asseruissent, captos etiam piratas ipsos in custodiam dededissent, *Cochranum* illum perfugam & perduellem eò audaciæ processisse accipimus, ut & prædatores dimitti liberos, & mercatores tradi sibi vinctos postulet. Vos au-
tem

tem etiam atque etiam hortamur & obtestamur, si pactiones, & scœdera, & pervetustum utriusque gentis commercium, id quod petitis, inviolatè servari studetis, ut nostri certum aliquod atque firmum sibi præsidium in vestrà fide, prudentiâ; autoritate collocare demum possint; Vos autem uti eos his de rebus benignè audiat; tam de *Cochrano*, cæterisque scæleris, illius sociis, quàm de iis qui nuper in Concionatorem, impunè adhuc, impetum fecerunt supplicium sumere velitis, aut è finibus exire jubeatis. Neque pulsos atque exules *Tarquinos* amicitiae atque opibus *Populi Anglicani* anteferendos existimetis. Si enim per vos non steterit quo minùs Reipub. nostræ hostes quidvis licere sibi contra nos in urbe vestrà confidant, quàm non tuta aut honesta amplius nostrorum ibi commoratio sit, vos cum animis vestris cogitate. Hæc vestræ prudentiæ & æquitati; Vos ipsos Divino Numini commendatos volumus. Valete.

Westmonasterio. Dat. August. 10. 1649.

Senatui Hamburgenfi.

Perspecta nobis æquanimitas vestra dubiis in rebus nostris, facit nunc ut sanè prosperis, ac benè gestis, de vestrà voluntate, & amico in nos animo nequaquam dubitemus. Nos quidem, confecto jam pœnè bello, & profligatis ubique patriæ hostibus, nihil æquius, aut ad pacem, Remque publicam stabiliendam fir-

mius esse duximus, quam ut illi qui vel libertatem, ductore semper Deo, per nos adepti sunt, vel vitam atque fortunas post belli civilis facinora, nostro dono atque gratiâ receperunt, nobis vicissim suis Magistratibus fidem & officium, solenni, si opus esset, more testarentur, atque præstarent. Præsertim cum tot homines inquieti & inimici, semel atque iterum in fidem accepti, nullum neque domi neque foris perfidiosè agendi, novasque turbas excitandi finem faciant. Itaque formulam quandam sponsionis perscribendam curavimus, quâ omnes qui aut munus aliquod in Repub. sustinerent, aut legum præsidio muniti incolumitate, otio, cæterisque vitæ commodis fruerentur, conceptis verbis se obstringerent. Hanc etiam per omnes Colonias & quacunque gentium nostri cives negotiandi causâ agerent, mittendam censuimus; ut eorum quibus præficimur, fidem, prout decet atque necesse est, exploratam & cognitam habeamus. Quo magis mirari subit quod ex urbe vestrâ mercatores nostri scribunt, sibi mandata nostra per unum atque alterum vestri ordinis exequi non licere. Sanè quod *potentissima Fæderatorum in Belgio Provincia*, suarum rerum & rationum consultissimæ, nihil ad se pertinere existimaverunt, si peregrini scilicet *Angli* debitam suis domi magistratibus in hæc vel illa verba fidem astringant, id quo pacto vestræ Civitati suspectum aut molestum esse possit, fatemur planè nos nescire. Verum hoc à privato quorundam sive studio sive formidine profectum,

ctum , quos errabundi quidam & pulsi patriâ
Scoti , minis dicuntur impulisse , ut mercatores
 nostros a fide suâ nobis obligandâ deterrerent ,
 Civitati non imputamus. Interea tamen summo
 vos opere hortamur atque etiam rogamus (non
 enim mercatura jam , sed Respub. ipsa agitur)
 ut ne quenquam apud vos patiamini , cujus hoc
 nihil potest interesse , authoritati quam nos in
 nostros populares , non Exterorum arbitrio aut
 iudicio , sed jure Patrio obtinemus , suam quam-
 cunque authoritatem interponere. Quis enim
 non ægrè ferat , si nos vestris hîc *Hamburgensi-*
buz suâ erga vos fide interdiceremus. Valeta.

Dat. Jan. 4. 1649.

Serenissimo ac potentissimo Principi
PHILIPPO QUARTO
Hispaniarum Regi.

Parlamentum Reipub. Anglia,

SALUTEM.

Antonium Ascanum Virum probum , eru-
 ditum , & luculentâ familiâ ortum , de re-
 bus in commune , tam *Hispanorum* , quam *Ang-*
lorum genti , ut spes est , valde utilibus , ad
 Majestatem Vestram legamus. Quamobrem ut
 ei honestum iter , atque tutum in Urbem Re-
 giam , sicut moris est , necnon & reditum con-
 cedere ,

cedere, & præstare velis, parem referre gratiam parati, officiosè petimus. Sin id minùs placuerit, ut quæ vestra hac in parte sit voluntas, ei quam primùm significetur, utque tutò quo volet abundi potestas fiat.

Dat. Feb. 4. 1649.

Serenissimo ac Potentissimo Principi

PHILIPPO QUARTO

Hispaniarum Regi.

Parlamentum Reipub. Angliæ,

SALUTEM.

QUis rerum nostrarum status sit, quamque atrocibus injuriis subacti, sumptis tandem armis, capeßendæ libertatis consilium ceperimus, constiturâ quâ nunc utimur Reipublicæ formâ, neque *Majestatem Vestram* potest latere, neque alium quemvis, qui evulgata super hac re scripta nostra æquo animo perlegerit. Nobis profecto fidem nostram, æquitatem, patientiam, testatam cunctis & probatam reddere, auctoritatem etiam, honorem, & Decus nostrum adversus infames exulum & perfugarum linguas tueri, apud idoneos rerum æstimatores difficile non debet esse. Nunc quod exterarum nationum magis interest, deletis, aut depressis Patriæ hostibus, Deo nempe mirificè adjuti, ad
pacem

pacem & amicitiam omni imperio potiore
cum vicinis gentibus habendam, paratos nos esse
palam atque ex animo profiteamur. Has ob cau-
sas spectatæ solertiæ & probitatis Virum *Anto-
nium Aschamum* in *Hispaniam* ad *Majestatem Vef-
tram* misimus ; qui de amicitia deque solito in-
ter utramque gentem commercio cum *Majestate*
Vestrâ agat ; vel etiam ad novas pactiones, si ita
visum fuerit, de integro sancendas viam muniat.
Huic igitur *Vestra Majestatis* ad eundi copiam ut
faciatis, ejusque incolumitati, necnon etiam
honori, quoad isto apud vos munere perfun-
cturus est, velitis prospicere rogamus : ut &
ea quæ a nobis mandata habet, utrique genti,
ut speramus, profutura, liberè exponat ; &
mentis *Vestræ* qui sensus his de rebus sit, nos
quam primùm certiores faciat.

Westmonasterio dat. Feb. 4. 1649.

Serenissimo Principi

JOANNI QUARTO

Lusitaniz Regi.

Parlamentum Reipub. Anglia,

SALUTEM.

Multa nos & infidæ pacis, & intestini belli
mala ultima perpeffos, cò demùm loci
redactos fuisse, ut si salvam Rempubl. velle-
mus,

mus, ejus administrandi ratio magna ex parte immutanda esset, ex iis quæ à nobis hac de re scripta publicè & declarata sunt, *Majestati Vestra* jam pridem notum esse arbitramur. Quibus, ut par est, si fides potius haberetur, quàm improbissimis perditorum hominum calumniis, sanè qui foris de rebus nostris pessimè jam sentiunt, iis fortasse multò æquioribus uteremur. Nam quod nos jure nostro, proque gentilitiâ *Anglorum* libertate, rectè & majorum more fortiter fecisse contendimus, de eo pravas & obstinatas nequissimorum hominum opiniones ex animis evellere, humanæ opis aut ingenii certè non est. Nunc autem quod nobis cum nationibus externis commune, & in rem utrinque magis existit, amicitiam & commercium quod nostris hominibus, cum vicinâ quacumque gente consuevit esse, non imminutum, sed auctum atque ratum magnoperè cupimus. Cumque vestro in regno populares nostri permagna & per utrique genti quæstiosa habeant negotia, iis ne impedimentum aliquod aut incommodum afferatur, quantum in nobis est, curabimus. Id verò prædicimus frustrà fore, dum piratis & defecto-ribus nostris perfugium sibi vestris in portibus reperire, & onerariis *Anglorum* navibus, vi captis atque direptis, bona civium nostrorum sub hasta vendere Olissipone, ut nuntiatur, permissum est. Huic malo quo maturiùs occurratur, & de eâ, quam petimus, amicitia clariùs ut constet, Nobilissimum Virum *Carolus Vane*, Oratoris munere præditum, cum mandatis atque

atque diplomate, commissi sibi muneris teste, ad *Majestatem Vestram* legavimus: Eum itaque benignè audire, fidem ei adhibere, ejus denique incolumitati atque honori, per omnes regni vestri fines, ut velis consulere obtestamur. Hæc omnia & nobis pergrata, & *Majestati Vestrae*, si fortè usus venerit, nostra omnium officia mutua fore pollicemur.

Westmonasterio dat. Feb. 4. 1649.

Serenissimo Principi

JOANNI QUARTO

Lusitaniæ Regi.

Parlamentum Reipub. Angliæ,

SALUTEM.

QUotidiani ferè, & perquàm graves afferuntur ad nos nuntii, Classarios quosdam nostros, & gubernatores, qui abductis per scelus atque prodicionem, quibus præerant, navibus, superiore anno a nobis defecerant, elapsos demum ex eo portu Hiberniæ, in quo æstate ferè totà obfessi, vix pœnam suis flagitiis dignam effugerant, ad *Lusitaniæ* nunc oram, *Tagique* fluminis ostium se recepisse: Ibi captis atque direptis quæ ad mercaturam ultrò citròque comitant, *Anglorum* navigiis, piraticam strenuè facere; & vicina quæque maria, fretumque omne Gaditanum latrociniis infestum atque infame

fame reddidisse. Cui malo nisi primo quoque tempore obviàm eatur, actum esse de commercio, quod nostris hominibus cum *Lusitanis* per amplum & per utrique genti quæstuosum est, quis non videt? Quamobrem à *Vestra Majestate* etiam atque etiam petimus, ut piratas nostros & defectores, *Portugallia* finibus exire iubeas; & si qui a *Carolo Stuarto* pseudolegati adsunt, eorum uti rationem ne habere digneris; nosque potius agnoscas, ad quos *Anglicarum* jam summa rerum, Deo planè aspirante, rediit; utque nostræ amicorum Classi, non minus vestris quam *Anglorum* commodis inservienti, *Lusitania* potius, atque flumina præcludi ne sinas.



PHILIPPO QUARTO Hispaniarum Regi.

QUàm gravitèr quàmque acerbè tulerit *Majestas Vestra*, nefariam illam *Antonii Aschami* oratoris nostri cædem, & quid in puniendis ejus interfectoribus hætenus effectum sit cum ex literis vestris, tum ex *Domino Alphonso de Cardenas* legato vestro percepimus. Veruntamen illius facinoris atrocitatem quoties nobiscum reputamus quæ & ipsam vel habendi vel conservandi commercii rationem funditùs tollit si Legatorum jus apud omnes nationes sanctissimum impunè tanto scelere violabitur, non possumus
quin

quin Majestatem vestram summâ instantiâ iterum efflagitemus ut supplicium de illis parricidis primo quoque tempore debitum fumatur, utque justitiam ullâ morâ aut obtentu religionis frustrari diutiùs ne sinat. Et quanquam potentissimi regis amicitiam plurimi certè facimus, tamen ut tam infandi parricidii authores dignas suo scelere pœnas persolvant omnem dare operam debemus. Humanitatem quidem illam quam jussu vestro in *Hispania* portubus nostri homines persensere, præclaram etiam vestræ Majestatis in nos voluntatem quam nuper amplissimis verbis vestro nomine Legatus nobis exposuit grato animo agnoscimus, neque non voluptati nobis erit eadem pariter officia, si quis usus venerit *Vestræ Majestatis & Hispanorum* genti reddere. At nisi justitiæ sine mora satisfiat quod jamdiu petimus, quo niti fundamento amicitia sincera ac diuturna possit non videmus, cujus tamen conservandæ a nobis quidem nulla honesta occasio facile omittetur, cui etiam fini præsentiam Legati apud nos vestri conducere existimamus.

Legato Hispanico.

Excellentissime Domine,

Concilium Status, quam primùm per gravissima Reipub. negotia licuit, in *Parlamentum* attulit quatuor illa scripta quæ visum

est *Excellentia Vestra* unde vigesimo proximi Decembris cum Concilio communicare , *Concilium* à *Parlamento* in Mandatis habet , quod ad primum scriptorum illorum caput , de nuperi scilicet *Residentis* sui *Dom. Aschami* nefariis intersectoribus , Responsum hoc reddere :

Parlamentum tamdiu , toriès , tamque meritò , debitum eorum supplicium postulâsse ut ampliùs dicere opus non sit in re tanta ubi (ut *Excellentia Vestra* pulchrè meminit) *Regia Majestatis* ipsa agitur Authoritas : Et sine qua re omnis ratio Societatis humanæ & conservandæ inter gentes amicitia tolli necesse erit. Neque sane ullo ab Religione petito argumento intelligere possumus , innocentium sanguinem scelestissimâ cæde effusum non esse vindicandum , Etiamnum itaque instat *Parlamentum* & ab *Regia Majestate* expectat ut , juxta priora sua postulata , satisfactio sibi re ipsâ atque effectu datur.

Serenissimo Principi

LEOPOLDO AUSTRIÆ

*Archiduci Provinciarum in Belgio
sub Philippo Rege Prasidi.*

UT primùm ad nos non sine gravissimâ querelâ perlatum est , *Janam Puccheringam* illustri & opulentâ Familiâ puellam hæredem ,

dem, cum adhuc propter ætatem sub Tutoribus esset, haud procul eâ domo, in quâ tum fortè *Grenovici* agebat, de manibus & complexu famularum raptam fuisse, & parato ad id navigio in *Flandriam* subitò deportatam, *Walci* cujusdam insidiis, qui per fas & nefas omnia molitus est, ut pupillam locupletem, vel ostenso mortis metu, ad nubendum sibi adigeret, huic tam atroci tamque inaudito sceleri primo quoque tempore occurrendum esse rati, dedimus quibusdam negotium, ut cum præfectis Neoporti & Ostendæ (nam in ea fortè loca infelix illa dicebatur appulsa) agerent de ingenuâ raptoris manibus eripiendâ. Qui utrique pro suâ singulari humanitate & honesti studio, captivæ, perque latrocinium domo abductæ opem libenter tulerunt; illa verò ut prædatorum vim quoquo modo effugeret, in Cœnobium votarum virginum veluti sequestrò deposita est. Quam ut ille *Walcius* inde abduceret, actionem in foro ecclesiastico *Iprensis Episcopi* de contracto secum matrimonio instituit. Veruntamen, cum & raptor & rapta nostrates omninò sint, ipsum etiam facinus in nostra ditioe perpetratum, quod juratis testibus abundè liquet, hæreditas denique tam lauta, quam illum imprimis inhiâsse constat, in nostrâ potestate sit, hujus propterea causæ cognitionem totam, atque judicium ad nos duntaxat pertinere arbitramur. Veniat huc igitur qui se sponsum nominat, suam hîc litem instruat, quamque jure suam contendit esse uxorem, tradi sibi postulet. Hoc interim

à Veftra Celfitudine vehementer petimus , quod & per noftrum internuntium Bruxellis commorantem jam aliquoties petivimus , ut afflictam & indignis modis habitam puellam , honeftis parentibus ortam , fuâ ex Patriâ prædatorium in modum abductam , quoad potes , liberam & incolumem redire domum finas. Hoc abs te non nos tantum , fiquam Veftræ Celfitudini parem a nobis gratiam , parque beneficium reddi poffe acciderit , fed ipfa etiam humanitas , ipfe pudor qui ad tuendum fexus illius honorem & pudicitiam viris bonis atque fortibus inefle debet , junctis unâ precibus efflagitare videntur. Vale.

Weftmannafterio Martii 28. 1650.

Sereniffimo Principi

JOANNI QUARTO
Lufitaniæ Regi.

Quod Oratorem noftrum & honorificè acceperit *Majeftas Veftra* , & benignè ftatim audierit , nullam interponendam efle moram ftatuimus , quin alteris quam primùm literis noftris intelligeres , gratiffimum id nobis accidiffe ; nosque nihil fanctius decreviffe , quàm pacem , amicitiam , commercium , quod nobis cum Nationibus plerifque exteris , & inter eas cum *Lufitanis* jam diu eft , nullo noftro dicto aut facto ,
non.

non prius laceſſiti , violare ; nec aliâ mente aut conſilio claſſem *Anglicanam* , *Tagi* fluminis ad oſtium miſſiſſe , quàm hoſtes jam totiès fugatos perſequendi , reſque noſtras repetendi ; quas per vim & proditionem ſuis dominis ablatas , coluvies iſta perfugarum veſtras in oras , ipſamque etiam *Oliffiponem* , tanquam ad certiffimas lâtrocinii ſui nundinas , aſportavit. Verùm iſti homines cujus audaciæ , furoris , & inſaniæ ſint , ex ipſorum moribus flagitioſiſſimis omnes jam penè *Lufitanos* abundè perſpexiſſe arbitramur. Quo faciliùs à *Majeſtate Veſtrâ* impetraturos nos eſſe confidimus , primùm ut *Illuſtriſſimo* Viro *Odoardo Poppamo* , quem huic novæ claſſi præfecimus , quibus potes rebus ad prædatores hoſce debellandos , adjumento eſſe velis , utque eos cum duce ſuo , non hoſpites , ſed piratas , non mercatores , ſed commercii peſtes , juriſque gentium violatores , intra regni veſtri portus , & munimenta diutiùs conſiſtere ne ſinas ; ſed quâ patent *Lufitania* fines , terrâ marique pelli jubeas : ſi hoc minùs , ut nobis ſaltem pace veſtrâ liceat defeſtores noſtros , & prædones propriis duntaxat viribus aggredi , & ſi Deus dederit , in noſtram poteſtatem redigere. Hoc ut prioribus literis vehementer petiviſſimus , ſic jam idem ſtudio maximo atque opere ab *Majeſtate Veſtra* contendimus. Hac ſive æquitate , ſive beneficio , non juſtitia ſolùm tuæ ſanctam per omnes gentes benè moratas adauxeris , ſed & nos imprimis , populumque *Anglicanum Lufitanis* jam antea minimè adverſum ,

Tibi

Tibi tuoque populo majorem in modum devinxeris. Vale.

Westmonasterio. Dat. 27. Aprilis. 1650.

Hamburgenfibus.

DE controversiis mercatorum, nonnullis etiam aliis de rebus quæ Reipubl: nostræ dignitatem aliquanto propius attingere videntur, scriptum inter nos haud semel, atque responsum est. Cum verò istiusmodi negotia solis literis confici vix posse intelligamus, esse autem à *Carolo Stuardo* immisos in urbem vestram seditiosos quosdam, nullâ re magis quàm scelerare atque audaciâ instructos, qui id agunt, ut nostrorum hominum, quorum præsertim fides in patriam perspectior sit, commercium tam vetustum in civitate vestrà funditus tollant, idcirco virum nobilem & spectatissimum *Richardum Bradshaw* nostrum apud vos Internuntium esse iussimus: qui secundùm ea quæ à nobis mandata habet, de rebus iis atque negotiis quæ cum utriusque Reipub: utilitatibus conjuncta sunt, vobiscum uberius communicare, & transigere possit. Hunc igitur ut benevolè quam primùm audiat rogamus; utque ei per omnia fides ea, isque honos habeatur, qui hujusmodi munus rectè obeuntibus ubique gentium haberi solet. Valete.

Westmonasterio. Dat. 2. April. 1650.

Ham-

Hamburgensibus.

*Amplissimi, Magnifici, & spectabiles
Viri, Amici charissimi,*

STudia vestra quibus venientem ad vos Residentem nostrum accepistis, tam propensa, tamque egregia extitisse, & libenter intelligimus, & in eadem erga nos voluntate atque animo perseverare velitis magnoperè hortamur. Idque cò vehementiùs, quòd perlatum ad nos est, exules illos nostros, de quibus jam sæpe scripsimus, efferre se solito insolentiùs in urbe vestrà, nec contumelias solùm, sed & minas quasdam atrocissimas in Oratorem nostrum palàm projicere. Hujus itaque salutem atque etiam debitum honorem hisce rursùs literis commendatissimum vobis esse volumus. In illos autem perfugas & sicarios, tam veteresquàm recentes, si maturiùs animadvertetis, & nobis gratissimum, & autoritate vestrà atque prudentià dignum feceritis. Valete.

Westmonasterio. Dat. 31. May. 1650.

PHILIPPO QUARTO
Hispaniarum Regi.

Antonium Ascanum à nobis ad Majestatem Vestram nuper missum Oratorem, eoque nomine à Præfectis vestris perhumaniter & publice

blicè acceptum , post itineris pericula tam longinqui , primo statim adventu in urbem Regiam , omni præsidio nudatum , tam fædo parricidio confossum in diversorio quodam , & cum *Joanne Baptista de Ripa* ejus interprete matatum esse , magno sanè cum dolore accepimus. De illis autem parricidis jam comprehensis , ut fertur , & in custodiam datis , qui non nos duntaxat per illius latera , sed vestram quoque fidem atque honorem consauciare ac pænè transfigere sunt ausi , deque eorum quibuscunque hortatoribus ac fociis ut supplicium tanto scelere dignum primo quoque tempore sumatur , opere quam maximò à *Majestate Vestra* petimus. Quanquam id nihilo minus factum iri , quod petimus , utpote à Rege sua sponte pio atque justo , etiamsi nemo peteret , non dubitamus. Quod reliquum est , ut corpus exanime amicis suis atque famulis in patriam deportandum tradatur , utque eorum saluti qui supersunt eâ , quâ par est , ratione consultum atque provisum tantisper sit rogamus , donec responso ad hæc literas , si fieri potest , secum ablato , vestræ pietatis atque justitiæ testes ad nos quam primùm redierint.

Westmonasterio. Dat. 28. Junii. 1650..

Excellentissimo Domino

ANTONIO JOANNI LUDOVICO
de la Cerda Medinæ Celi Duci,
Andalitiæ Præsidi.

*Consilium Status Parlamenti Angliæ
authoritate constitutum,*

SALUTEM.

Accipimus ab Ornatissimis Viris quos nuper in *Portugalliam* ad persequendos proditores, resque nostras repetendas cum classe misimus, se ab *Amplitudine Vestra*, quoties contigit ut *Gallaciæ* oram legerent, quæ præfectura vestra est, & perhumaniter illis portubus exceptos fuisse, & iis rebus omnibus adjutos, quæ navigantibus usui solent esse. Ea vestra humanitas, cum pergrata nobis omni tempore fuisset, tum est nunc præcipue, cum aliorum iniquum in nos animum nullo merito nostro aliquibus in locis experimur. Petimus itaque abs te *Illustrissime Domine* ut in eadem erga nos voluntate ac benevolentia permanere velis: utque nostris hominibus, quoties ad ea littora naves appulerint pro solita humanitate tua favere & adjumento esse pergas: tibi que persuadeas nihil nos beneficii loco abs te petere quod non eodem studio vel Tibi vel tuis reddere, siquando similis occasio nobis dabitur, parati erimus.

Westmonasterio. Dat. 7. Novemb. 1650.

Signat. Consilii sigillo:

JO. BRADSHAWE PRESES.

ILLU.

ILLUSTRI & MAGNIFICO Civitatis Gedanensis Senatui.

*Magnifici atque Amplissimi Domini
Amici Charissimi.*

FRequentes ad nos literæ mercatorum nostrorum, qui Borussiae per oram negotiantur, allatae sunt, quibus tributum grave quoddam & insolitum nuper in magno *Polonorum* Concilio imponi sibi queruntur; ut decimam scilicet facultatum suarum omnium partem sublevando *Scotorum* regi, nostro hosti, suppeditarent. Quod cum juri Gentium contrarium planè sit, tractari hunc in modum hospites & mercatores, iniquissimum etiam, ut cujus tyrannide sint domi, divinâ ope, liberati, idem in aliena Republica stipendia persolvere cogerentur, non dubitamus quin pro illa libertate, quâ frui vos intelligimus, tam grave onus mercatoribus imperari in urbe vestra pati nolitis; in qua amicitiam & commercium, nec sine magno vestrae civitatis emolumento, per tot annos habuere. Si est igitur ut nostrorum hominum apud vos mercaturam facientium tutelam suscipere velitis, quod quidem cum ab æquitate & prudentia vestra, tum etiam à dignitate splendidissimæ urbis haud dubitanter expectamus, eam operam dabimus, ut gratissimum id esse nobis omni tempore sentiat; quotiès in ditione nostra

Geda-

Gedanenses vel negotia habuerint , vel naves .
quod sæpè fit , ad portus nostros appulerint.

Westmonasterio. Dat. 6. Feb: 1650.

INTERNUNTIO PORTUGALLICO.

Illustris Domine,

Litteras tuas hujus mensis quinto decimo
Hamptonâ ad nos datas accepimus. In qui-
bus significaste à *rege Portugallia* ad *Parlamen-*
tum Reipub: Anglia missum esse : quo autem
muneris titulo , sive Legati sive Agentis , sive
Internuntii non dicis ; id quod ex literis quas à
rege habes commendatitias sive credentiales in-
telligere velimus ; quarum exemplar , ad nos po-
teris quam primùm mittere ; simul & illud scire ,
satisne plenâ potestate instructus venias ad eas
injurias expiandas , damnaque ea resarcien-
da quæ à Rege vestro illata huic *Reipub:* sunt :
dum hostem nostrum totâ æstate proximâ suis
portibus tutatus Classem *Anglicanam* in rebel-
les & perfugas quos eò usque infecuta erat , im-
petum facere parantem cohibuit , hostem ab in-
vadendis nostris non cohibuit. De his omnibus
ut satisfacias , si ampla & libera mandata acce-
pisse te scripseris , & illarum quas diximus lite-
rarum exemplar unâ miseris , deinceps curabi-
mus , ut ad nòs fide publicâ primo quoque tem-
pore tutò commeari possis : ubi cum regis literæ
perlectæ fuerint , tibi , quæ mandata porrò at-
tulisti , ea liberè exponendi facultas dabitur.

Par-



Parlamentum

REIPUB. ANGLIÆ

*Serenissimo Principi D. Ferdinando
Secundo, Magno Duci Etruriæ &c.*

SALUTEM.

L Iteras Celsitudinis Vestra 22. Aprilis 1651.
Florentiæ datas & à Residente Vestro Domi-
no Almerico Salvetti nobis redditas accepimus, in
quibus *Anglico* nomini quantoperè faveat *Celsti-
tudo vestra*, Gentemque eam quanti faciat faci-
lè perspicimus, id quod non solum Mercatores
nostri, qui in portibus vestris multos jam annos
negotiantur, Verùm etiam Adollescentes qui-
que nostræ nationis nobilissimi atque honestissi-
mi, qui vestras per urbes aut iter fecêre, aut
excolendi ingenii causâ commorati sunt, testan-
tur atque confirmant, quæ cum nobis pergrata
sanè sint, & acceptissima, tum hoc etiam at-
que etiam petimus, ut quo animo, quoque
studio in nostros mercatores, aliosque nostræ
Reipub: Cives *Hetruscæ* ditionem peragran-
tes, *Serenitas Vestra* consuevit esse, in eò velit perse-
verare: nosque vicissim pollicemur atque reci-
pimus, quod ad *Parlamentum* attinet, nihil de-
futurum, quod & commercio & amicitiaæ mu-
tuæ, quæ inter utramque Gentem jam diù in-
veteravit, firmandæ ac stabiliendæ possit con-
ducere;

ducere ; quam quidem omnibus utrinque humanitatis officiis , mutuâque observantiâ , in perpetuum conservari cupimus , atque optamus.

Westmonasterio. 20. Januarii 1651.

Subscripsit & Parlamenti sigillum apponit fecit

GULIELMUS LENTHALL.

Prolocutor

Parlamenti Reipub. Anglia.

Parlamentum

REIPUB. ANGLIÆ

Illustri & magnifico Civitatis Hamburgensis Senatui,

SALUTEM.

*Amplissimi magnifici & spectabiles viri.
Amici charissimi.*

Parlamentum Reipub. Angliæ , cum antiquam amicitiam , mutuumque commercium , quæ inter gentem Anglicam Vestramque civitatem est , continuatum magnoperè vellet & conservatum , haud ita pridem Richardum Bradshaw armigerum Residentis Munere præditum illuc misit , eique inter alia mandata cò spectantia difertis

fertis verbis mandavit, ut contra quosdam ve-
 stræditionis justitiam efflagitaret, qui Societa-
 tis *Anglica* Concionatorem interficere sunt co-
 nati, quique Deputato Illius Societatis impias
 manus injecere, & mercatoribus quibusdam
 ejus Societatis præcipuis impias manus injecere,
 eosque in navem prædatoriam abduxerant, &
 quamvis prædictus *Residens* cum exciperetur pri-
 mum & audiretur, accepta ab hac *Republi-*
ca mandata illa sigillatim vobis nota fece-
 rit, quibus justitiæ vestræ exemplum in ma-
 leficos illos edendum expectabatur, tamen cum
 expectationi nostræ responsum non esse intelli-
 geremus, illud nobiscum cogitantes quanto in
 periculo & nostri homines & illorum facultates
 versarentur, si de incolumitate illorum & tu-
 tela adversus hostium malitiam & iniquos op-
 pugnatore non satis provisum esset, rursus
 prædicto *Residenti* in mandatis dedimus, ut no-
 strum ejus rei sensum representaret: Utque hu-
 jus *Reipub.* nomine Vos ut amicitiam & ne-
 cessitudinem inter hanc *Rempub.* vestramque ci-
 vitem initam magnumque usum qui huic
Reipub. cum vestra civitate intercedit confer-
 vare, adeoque mercatores nostros cum eorum
 privilegiis sine ulla violatione protegere velitis
 hortaretur; utque nominatim in quemdam
 cui nomen *Garmes* est qui se in hanc *Rempub.*
 Contumeliosè gessit, certosque ex societa-
 te mercatorum *Anglica*, *Vestra in urbe commo-*
rantes, ad contumeliam hujus *Reipub.* mag-
 namque nostrorum mercatorum molestiam,

in *Spirensē* Cameram publicè citavit : quā
re reparationem ejusmodi expectamus quæ
æquitati & justitiæ consentanea est.

De hisce capitibus & si quid amplius ad hujus
Reipub. cum vestra civitate amicitiam pertinue-
rit, prædictum *Residentem* hujus *Reipub.* nomine
ad vos jussimus accedere : cui ut fidem amplam
in iis quæ huc spectantia proposuerit habeatis
fögāmus.

Westmonasterio. Dat.

12. Martii. 1651.

Subscripsit & Parlamenti sigillum imprimen-
dum curavit

Prolocutor &c.

Parlamentum Reipub. Angliæ

Serenissima

CHRISTIANÆ,

*Suecorum, Gothorum Vandalorum-
que Regina &c.*

SALUTEM

Serenissima Regina,

Majestatis Vestrae Literas ad Parlamentum
Reipub. Angliæ 26 proximè elapsi Septem-
bris Stockholma datas per *Petrum Spiering Sil-
vercroon* accepimus, & perlegimus : & vete-
rem quidem amicitiam nec non commercium

B

mag-

magnumque usum qui *Anglis* cum *Suecorum* gente antiquitus intercedit permanere atque indies augere vehementer atque ex animo cupimus: Neque dubitamus quin Legatus à Majestate Vestra ampliter instructus venerit ad ea maximè proponenda quæ in rem atque decus Genti utrique futura imprimis fuissent, quæque nos audire ex eo paratissimi fuissetus & quod utrinque potissimum salubre atque utile videretur, id primo quoque tempore effectum reddidisse: Verùm summo rerum Moderatori DE O ita visum est, ut is antequam audiri se petisset de iis quæ *Parlamento* exponenda ab Majestate Vestra in mandatis habebat, evenit ut ex hac vita excederet (cujus quidem desiderium ita ægrè atque acerbè tulimus, ut qui simul in divina voluntate acquiescere debeamus) unde & Majestatis Vestræ quæ mens esset adhuc scire nequeamus, ejusque rei progressibus in præsens injecta mora sit: Quocircà optimum nobis visum est hisce literis quas, misso hac ipsa de re nuntio nostro, dedimus, significare Vestræ Majestati quam gratae Literæ vestræ quamque acceptus vester publicus Minister *Parlamento Reipub. Anglia* fuerit; simulque Vestræ Majestatis amicitiam quantoperè expectamus; quàmque etiam, ut par est, tantæ principis amicitiam plurimi faciemus: deque illo quod inter hanc Rempub. & Majestatis Vestræ Regnum est commercio exaugendo, ita existimabimus quemadmodum de re maximi utrobique momenti existimare debemus: quod & ea de causa

causa Parlamento Reipub. Anglia acceptissimum
erit. Adcoque Vestram Majestatem divinæ tutelæ
recommendarè volumus : Quorum nomine &
Auctoritate

*Datis Westmonasterio die
Martis ann. Dom. 1651.*

Subscripsit & Parlamenti Sigillum
imprimendum curavit

*Prolocutor Parlamenti Reipub.
Anglia.*

Parlamentum Reipublicæ Angliæ

Serenissimo Principi

FERDINANDO SECUNDO

Ætruria Magno Duci,

SALUTEM.

L Iteras Celsitudinis Vestræ 22. Aprilis 1651.
Florentiâ datas, Et a Residente Vestro Do-
mino *Almerico Salvetti* nobis redditas accepi-
mus; in quibus Anglico nomini quantopere fa-
veat Celsitudo Vestra, gentemque eam quanti
faciat, facile perspicimus : Id quod non solum
Mercatores nostri qui in portibus vestris multos
jam annos negotiantur, verum etiam Adoles-
centes quique nostræ nationis nobilissimi atque
honestissimi qui vestras per urbes aut iter fecere
aut excolendi ingenti causâ commorati sunt,

testantur atque confirmant. Quæ cum nobis pergrata sane sunt & acceptissima , tum hoc etiam atque etiam petimus , ut quo animo quoque studio in nostros mercatores , aliosque nostræ reipublicæ cives Hetruscam ditionem peragrantes Serenitas Vestra consuevit esse , in eo velit perseverare : nosque vicissim pollicemur atque recipimus , quod ad Parlamentum attinet , nihil defuturum , quod & Commercio & amicitiae mutuae , quæ inter utramque rempub. tam diu inveteravit , firmandæ ac stabiliendæ possit conducere : quam quidem omnibus utrinque humanitatis officiis mutuâque observantiâ in perpetuum conservari cupimus atque optamus.

Westmonasterio May 22.

1651.

Parlamentum Reipublicæ Angliæ
Serenissimo ac Potentissimo Principi
PHILIPPO QUARTO
Hispaniarum Regi,

SALUTEM.

PERMAGNAS nobis querelas deferunt hujus Reipub. mercatores qui in ditionibus *Vestrae Majestatis* mercaturam faciunt , de vi multa atque injuriis sibi allatis , deque novis etiam tributis sibi impositis à præfectis aliisque officialibus vestrorum portuum & locorum ubi negotia habent

bent, & nominatim in insulis *Canariis*, idque contra foederis articulos quos commercii causa utraque natio inter se sanxit. Quas eorum querelas veras esse jurejurando confirmaverē. Nobisque demonstrant, nisi jus suum obtinere possint, suaeque damna refarciantur, nisi denique contra vim istiusmodi atque injurias praesidium aliquod certum, atque tutelam & sibi & fortunis suis habituri sint, non posse se amplius iis in locis negociari. Quibus eorum querelis graviter a nobis perpensis, cumque facta illorum minorum iniqua, aut non omnino aut secus quam res se habet ad notitiam *Vestrae Majestatis* pervenisse existimemus, visum est nobis ipsas eorum querelas cum hisce litteris ad *Majestatem Vestram* unā mittere; nec dubitamus quin *Majestas Vestra* cum ipsius justitiae amore tum etiam commercii causa quod vestris haud minus quam nostris hominibus fructuosum est, suis praecipere velit ut ab iniquis illis nostrorum vexationibus abstineant, utque hujus Gentis mercatores expeditam justitiam obtinere queant, necnon debitam earum injuriarum reparationem, quae à *Dōmino Petro de Carillo de Guzman*, atque aliis illatae sibi sunt, contra praedictos foederis articulos, atque perficere velit *Majestas Vestra* ut praedicti Mercatores fructum illorum articulorum percipere queant, in eaque vestra tutela sint, ut tam ipsi quam fortunae suae ab omni injuria liberæ & incolumes esse possint. Hoc autem magna ex parte consecuturos se esse putant si ademptam sibi illam de judice conserva-

toré schedulam qui eos a novo quodam Consulatu in se quidem iniquiore defendat, *Majestas Vestra* rursus concesserit; ne si nullum ab injuria refugium sibi detur, abrumpi illud commercium quod utrique genti commoda haud parva attulit, violatis hunc in modum fœderis articulis, necesse sit.

Westmonasterio.

Augusti 1651.

**Serenissimo Principi Venetiarum
Duci, Senatuque Celsissimo**

***Concilium Status Parlamenti
Reipub. Anglia Authori-
tate constitutum.***

SALUTEM.

*Serenissime Princeps, Celsissime Senatus, Amici
Charissimi,*

Mercatores quidam nostri, quorum alteri *Joannes Dickons*, alteri *Job Throckmorton* nomen est, simulque alii apud nos questi sunt, quòd cum Novembris octavo & vigesimo 1651. ex jure & autoritate Curiae nostrae Ammiralatus occupassent in navi *Hirundine* vulgo nuncupatâ, cui in Dunis consistenti *Isaacs Taylor* Magister erat, centum dolia Caveari vulgò dicti, quæ sua propria bona essent, inque
finu

sinu Moscovitico Archangeli dicto eandem in navem imposita ; atque in eâ Curiâ , prout lege agitur , decretum obtinuissent quo dicta Caveari dolia sibi traderentur , fide suâ prius interpositâ , se in illius Curia sententiâ acquieturos ; quodque eadem Curia , quo lis illa ad exitum perduceretur , cum pro more scripsisset ad Magistratus Judicesque Venetos , literas , quibus petebant uti *Joannem Piattum* (Venerâ sub ditione degentem , qui Cavearum illum sibi vendicat) citarent quo re per procuratorem in Ammiralatus curia Anglicam se sisteret , ubi lis ista pender , jusque suum probaret , tamen idem *Piattus* , & quidam *David Rutts* Hollandus , dum causa hæc in nostro hic foro pender , multum supradicto *Joanni Dickons* aliisque illis mercatoribus de Cavearo isthoc negotium facessit ; eorumque bona & facultates nexu occupandas Venetiis curat : quæ omnia singulatim , & quid hætenus in prædictâ nostrâ curiâ sit actum in literis illis requisitoriis fusiùs exponitur ; quas postquam à nobis inspectæ essent , ad serenissimam Venetiarum Rempub. , ut Mercatoribus in hâc causâ adjumento esse possint , transmittendas censuimus ; atque ab eâ vehementer petimus ut non solum illæ literæ vim suam atque pondus illic habere queant , Sed etiam ut bona illa & facultates Mercatorum , quas prædictus *Piattus* & *David Rutts* nexu illigandas curarunt , liberentur ; Dictique rei ad nostram hic curiam remittantur , quid sui sit juris in hoc Cavearo sibi vendicâdo lege

experturi. Qua in re Celsitudo vestra & Serenissima Respub. fecerit & quod æquissimum in se est, & quod illibatâ utriusque Reipub. amicitia est dignum, quod denique, oblatâ quâvis occasione, pari hujus Reipub. benevolentia atque officiis compensabitur.

Datis ab Albâ Aulâ die

Feb. 1652.

Subscripsit & Concilii Sigillum
imprimendum curavit

Concilii Praeses.

Ad Legatum Hispanicum.

Excellentissime Domine,

Concilium Status cum ex mandato Parlamenti secundo die mensis *Martii* accepto de charta Excellentiae Vestrae 17 *Feb.* Commissariis hujus Concilii Exhibita deliberationem seriam habuerit, in qua Excellentiae Vestrae visum est proponere uti duobus capitibus illic nominatis quasi praevis responderetur, responsum hoc Excellentiae Vestrae reddendum censet.

Parlamentum, ubi ad ea respondit quae ab Excellentia Vestra cum primum audiretur proposita sunt tum etiam in iis literis quas ad Serenissimum Hispaniarum Regem scripsit, quam sibi grata quamque accepta illa fuerit amicitia, ususque mutuus qui & ab illius Regia Majestate
 & à

& à vobis ejus nomine oblatus est, quam denique deliberatum sibi fuerit parem amicitiam quod ad se attinet pariaque officia reddere uberiorius declaravit.

Exinde visum Vestræ Excellentię cum primum audita in Concilio est Decembris 19 styli veteris, huic Concilio proponere, veluti rationem quandam auspicandę arctioris hujus Amicitię, cujus facta tum à vobis mentio erat, uti certi ex suo corpore nominarentur qui ea quę attulisset Excellentia Vestra audirent, iis perpensis de eorum utilitate ad Concilium referre quam primum possint, Cui vestro postulato ut satisfaceret certos ex suo numero Concilium nominavit, qui Excellentiam Vestram convenirent, quod & proinde factum est eorumque loco quę proponenda expectabantur, Chartam illam supradictam congressio ea protulit, ad quam responsum hoc Concilii est.

Cum Parlamentum ea declaraverit, Vestraque Excellentia progressum eum fecerit qui supradictus est, paratos nos esse, cum Excellentia Vestra in colloquium Venire iis de rebus quas Domini regis Vestri nomine proposueritis, tam de amicitia jam pridem inita, quam de arctiore incundā, aut si quid à nobis hujus Reipub. nomine in medium proferetur; cumque ad singula ventum erit, ita respondebimus, ut par est, naturaque rei postulabit.

Alba Aula. Martii 21. 1652.

Parlamentum Reipub. Angliæ ,

Serenissimo Principi

FREDERICO TERTIO

Daniæ Regi &c.

SALUTEM.

Serenissime & Potentissime Rex,

Litteras Vestræ Majestatis undevigesimo proximi Decembris ad Parlamentum Reipub. Angliæ ab arce regia Haphniæ datas per virum nobilem *Henricum Willemssen Rosenwing de Lyfacker* accepimus, eoque animi affectu quem res illic propositæ merentur libentissimè perlegimus, Vestræque Majestati persuasum hoc esse cupimus, eundem animum, eadem veteris amicitiae commercii, ac necessitudinis quæ Angliæ cum Dania per tot annos intercessit continuandæ & conservandæ studia quæ in Majestate Vestra sunt in nobis quoque esse; haud nescientes, quamvis divinæ Providentiæ visum sit gentem hanc tam benignè & placidè respicienti receptam apud nos prioris regiminis formam in melius mutare, easdem tamen utrinque rationes, eadem in commune commoda, eundem mutuò usum atque liberum commercium, quæ pactiones priores & foedera inter utramque nationem pepererunt, etiamnum durare vimque prio-

priorem obtinere, utraque etiam obligare ut communem dent Operam Fœdera illa quàm utilissima sibi mutuo reddendo ut amicitiam quoque propriorem ac stabiliorem indies reddant ; Cumque Vestræ Majestati placuerit ea persequi consilia quæ in literis vestris regiis scripta sunt, Parlamentum eadem amplecti cum alacritate omni ac fide paratum erit, eaque omnia pro virili suâ parte conferre quæ illum ad finem conducere arbitrabuntur ; Sibi que persuadent, Majestatem Vestram hac de causa, ea itidem consilia capturum esse ad hanc rem pub. spectantia (cui etiam provisum pactis prioribus est ;) quæ ad hasce res facere possint ab Majestate Vestra nobis tam cupientibus propositas. Parlamentum interea Majestati Vestræ ac populo fœlicitatem prosperaque omnia precatur.

*Datis Westmonasterio die
Aprilis anno Dom. 1652.*

Sub Sigillo Parlamenti subscripsit ejus
nomine atque autoritate

Prolocutor Parlamenti Reipub. Angliæ.

Parlamentum Reipub. Angliæ
Illustribus & magnificis
 Hanseaticarum Civitatum. Pro-
 consulibus ac Senatoribus,
 SALUTEM.

*Amplissimi magnifici & spectabiles Viri,
 amici charissimi,*

Parlamentum Reipubl. Angliæ literas vestras
 sexto decimo *Januarii* proximè elapsi datas,
 perque vestrum publicum Ministrum *Lequem*
ab Aisema allatas accepit atque perlegit, cum-
 que ex earum autoritate audivit, qui & vestra-
 rum Civitatum erga hanc Rempub. propensum
 & amicum animum exposuit & antiqua illa in-
 ter easdem amicitia ut porro maneat petivit.
Parlamentum itaque pro se testatur atque
 confirmat pergratum sibi esse, pristinam illam
 amicitiam ac necessitudinem quæ huic Genti
 cum illis Civitatibus intercessit & renovari ra-
 tamque permanere, seque fore paratum quâvis
 occasione commodum oblatâ quod verbis in se
 recipit id reipsâ solidè præstare, eâdemque fide
 & integritate antiqui illi amici & foederati sui
 ut secum agant expectat: quæ autem præterea
 Residens vester speciatim in mandatis habuit,
 quæ ea ad *Concilium Status* integra à nobis re-
 missa

missa fuerint, quæque proposuisset ibidem consultata, Responsum illic, atque transactum cum eo ita fuit, prout quidque maximè cum æqualitate, & ratione consentire visum est, quod & Residens Vester renunciare ad vos poterit: cujus prudentia & spectata probitas collata in eum à vobis publici muneris notâ dignum prædicat.

*Datis Westmonasterio die
Aprilis ann. Dom. 1652.*

Sub Sigillo Parlamenti subscripsit ejusque
nomine & Authoritate

Prolocutor Parlamenti Reipub. Angliæ.

Parlamentum.

REIPUB. ANGLIÆ

*Illustri & Magnifico Civitatis
Hamburgensis Senatui*

SALUTEM.

*Amplissimi Magnifici & Spectabiles Viri,
Amici charissimi.*

Parlamentum Reipub. Angliæ, literas vestras quinto decimo Januarii proxime elapsi Hamburgo datas, perque nobilem Virum Dominum Leonem ab Aisema vestrum & cæterarum civitatum Hanseaticarum Residentem allatas

B 7

accepit

accepit atque perlegit , cumque ex earum auctoritate audivit , & quæ amplius ab vestra Civitate mandata speciatim habuit , de iis ad *Concilium Status* remisit , quibus ut exciperent quæ ab eo proponerentur , deque iis quæ iusta & æqua viderentur , cum eo quàm primum transigerent , authores fuimus ; quod etiam exinde factum est. Utque Parlamentum earum rerum quæ à vobis afferentur debitam rationem semper se esse habiturum ostendit , suumque erga vestra civitatem singulare studium , misso illuc Residente suo , ibique manere jussu , testatum reddidit ; ita vicissim expectat & meritò quidem postulat à vobis æqua reddi iis in rebus quæ hujus Reipub. ex usu , ab suo dicto Residente suoque nomine vestræ civitati , antiquitùs amicæ nobis & fœderatæ , vel jam exposita vel in posterum exponenda erunt.

Westmonasterio. Dat. die

Aprilis anno Dom. 1652.

Sub sigillo Parlamenti subscripsit ejus
nomine atque auctoritate

Prolocutor Parlamenti Reipub. Angliæ.

Concilium Status Reipublicæ Angliæ

Serenissimo Principi

D. FERDINANDO SECUNDO

Magno Duci Hetruria

SALUTEM.

CONCILIUM *Status* cum à *Carolo Long-*
lando qui in Portu Celsitudinis Vestræ *Li-*
burnensis, mercatorum Anglicorum negotia
 procurat, certius per literas fieret quatuor-
 decim Naves præfidiarias Fœderatorum *Belga-*
rum in eum Portum nuper venisse, qui naves
 Anglorum in ipso Portu vestro aut incensuros se
 esse aut depressuros minati palàm sunt, Ve-
 stramque Serenitatem cujus fidem atque opem
 Angliæ Mercatores ibi commorantes implora-
 verant, *Liburnensis* Præsidii præfecto man-
 dâsse, uti illis Anglorum navibus auxilio esset,
 sui muneris atque officii judicavit esse, uti Cel-
 situdinem Vestram certiolem faceret, quàm
 huic Reipublicæ gratissima sit benevolentia illa
 atque tutela quam mercatoribus Anglis tam
 benignè præbuisstis, Vestræque Celsitudini pro-
 mittit atque in se recipit mansuram apud se in
 omne tempus hujus benè meriti gratiam, pa-
 ratumque se omni occasione fore parem amici-
 tiam pariaque officia vestro Populo reipsâ præ-
 stare, omniaque facere quæ conservandæ inter
 hanc

hanc Gentem atque Vestram solitæ benevolentiae, atque commercio possint conducere. Cumque naves Foederatarum *Belgii* Provinciarum inter ipsa de Foedere Colloquia à semetipsis oblata in Classem nostram summa cum perfidia non solum in ipsis Stationibus hostilia inceptaverint (quo in facinore DEUS, tanquam arbiter iustissimus, adversum se illis atque insensum ostendit) verum etiam in exteriorum portibus naves mercatorum nostrorum capere aut demergere conatae sint, necessarium etiam censuimus Scriptum hoc Parlamenti Republicae Angliae ad Celsitudinem Vestram unà mittere; cujus emittendi occasionem dedere Controversiae inter hanc Rempub. & *Belgii* Provincias in praesentia coortae. Ex quo Celsitudo Vestra facile perspiciat, quàm iniqua, quàm contra fas omne atque jus Gentium facta illius Populi in hanc Rempub. extiterint, & quàm ex animo Parlamentum studuerit publicae Pacis causâ amicitiam eorum & societatem pristinam retinuisse.

Datis ab Alba Aula.

Julii 29. 1652.

Subscripsit Concilii Nomine atque
 Autoritate

Concilii Praesed.

Ex.

AD LEGATUM HISPANICUM.

Excellentissime Domine,

Concilium Status, deliberatione habitâ de illa chartula quam ^{27 May} ^{6 Junii} 1652. ab Excellentia Vestra accepit, tum etiam de illa quam in Concilio Status cum audiretur, ⁶ hujus mensis Vestra exhibuit Excellentia, ad binas illas chartulas Responsum hoc reddit, Parlamentum Reipubl. Angliæ firmam amicitiam bonamque pacem, quæ huic Reipub. est cum Hispaniarum Regia Majestate conservandi percupidum, ex quo idem primùm Regis prædicti animum eodem inclinare Excellentia Vestra significavit, paratum semper fuisse eam utriusque gentis bono quam maximè firmare ac stabilire. Idque Concilium Status Parlamenti nomine atque mandato suis chartulis aliquoties Excellentiae Vestrae demonstravit; & speciatim, prout Excellentia Vestra petiverat, Commissarios delegit, quæ & Excellentiam Vestram convenirent, ab eaque acciperent, quæ ad prædictum finem conducentia proponerentur; quo in conventu eorum loco proponendorum visum est vobis generatim quædam, quasi futuro prævia colloquio, exhibere, de quibus Concilio videbatur, Parlamentum qui suus esset sensus chartis prioribus planum fecisse: tamen quo cumulatiùs satisfaceret, utque Excellentiae Vestrae nequa dubitatio restaret iis de rebus quæ tum proposuerat; Concillium in ea chartulâ quæ

quæ ^{31 Martii}_{10 Aprilis} data est paratum se esse ostendit cum Excellentia Vestra in Colloquium venire iis de rebus quæ à parte Regiæ Majestatis prædictæ in mandatis haberet tam de pristina amicitia quàm de actione futura, de iis etiam quæ à nobis hujus Reipub. nomine exhiberentur; cumque ad singula veniretur ea, quæ par esset, resque postularet, responsa dare: ad quæ visum est Excellentia Vestra nihilum respondere neque per duos pene menses in ea re ulterius progredi. Vestramque chartulam ^{27 May}_{6 Junii} 1652. datam Concilium ex eo tempore primam ab Excellentia Vestra accepit, in eaque hoc solum proponitis, uti pacis atque foederis articuli inter *Carolus Regem* nuperum vestrumque Dominum ⁶₁₆ *Novembris* 1630. pacti denuò percurrantur, utque ejus capita quæque vel amplificentur vel immutentur pro temporum & rerum alio nunc Statu, necnon regendæ Reipublicæ formâ inmutata, quod cum nihil amplius esset, quàm quod & nos in prædicta nostrâ chartula ^{31 Martii}_{10 Aprilis} summam atque dilucidè significaveramus, expectabat Concilium quosdam speciatim articulos ex eo foedere ab Excellentia Vestra propositum iri cum ea amplificatione iisque mutationibus quarum facitis mentionem, cum alioqui nobis impossibile sit ullum aliud responsum hac de re dare quàm quod jam dedimus. Verùm cum Excellentia Vestra ex charta sua novissima dilationem in

nos conferre videatur , Concilium idcirco chartulam Vestram prædictam ^{27 May}_{6 Junii} datam quodque in ea propositum erat denuò inspexit , seque de eo quod illic est propositum , priore illâ chartulâ Excellentiaë Vestraë plenè satisfecisse arbitratur , cui & hoc solum potest adjicere , se , cum Excellentiaë Vestraë videbitur , vel ex fœderibus jam factis vel alio quovis modo ejusmodi ferre conditiones quæ ad præsentem rerum ac temporum Statum erunt accommodatæ , quibus à parte Vestra fundari amicitiam vultis , ea vobis responsa exinde redditurum quæ ab se ad ea reddi æquum erit , quæque Parlamentum in eodem perseverare studio testentur , illibatam atque firmam cum rege vestro Domino amicitiam conservandis. Eaque ut augecat etiam , Parlamentum omnem honestam seque dignam operam pro se quidem dabit.

Concilium præterea sui officii ducit esse , Excellentiam Vestram illius nostræ chartulæ Januarii 30. 1651. ad vos datæ admoneri , cui cum Excellentia Vestra responsum nondum dederit , instamus proinde atque expectamus ut Parlamento , de qua illic re facta mentio est , satisfactio detur.

Respon-

Responsum Concilii Status ad Replicationem Dominorum Legatorum Extraordinariorum serenissimi Regis Daniæ & Norwegiæ Commissarius Concilii traditam ad Responsum illud quod reddidit Concilium ad quatuordecim eorum postulationes.

PRædictis Dominis Legatis ut satisfiat de responso Concilii ad quintum, sextum, septimum, octavum, & nonum articulum, assentitur Concilium huic sequenti clausulæ suo responsorum fine adjiciendæ. Videlicet, Præter illas Colonias, insulas, portus & loca in partis alterutrius ditione, ad quæ loca ne quis negotiandi aut commercii habendi causâ accedat, lege cautum est, nisi impetratâ prius ejus partis Licentia speciali ad quam illa Colonia, Insula, portus, aut loca pertinuerint.

Receptio cujusquam in navem quæ in flumina, portus, aut sinus alterutrius partis compulsa erit navem illam ulli exhibendæ molestiæ aut perscrutationi ex responso Concilii ad articulum undecimum obnoxiam non faciet, quemadmodum prædicti Domini Legati in replicatione sua videntur intellexisse, præterquam ubi illa receptio contra Leges, Statuta, aut morem illius loci est, in quo illa navis portum capefferit, qua in re videtur Concilio
nihil

nihił statui quod durius sit , sed quod utriusque Reipub. Saluti sit æquè conducibile.

Quod ad probandum cujusnam propriè naves & bona illa erunt quæ in naufragio ejici ac ciderint , Concilium existimat necesse esse jurandum dari in illis curiis quæ ad hujusmodi causas aut jam sunt constitutæ aut erunt constituendæ , ubi qui illa sibi vendicant audiri singuli possint , & cujusque jus cognosci ac judicari , quod scriptis testimoniis , quæ vulgo *Certificata* nuncupantur , tam clarè atque distinctè fieri non potest , unde multi scrupuli ac dubitationes existere poterunt , multæ etiam fraudes ac doli in illud genus probationis irrepere , quod ne eveniat utriusque partis interest providere. Concilium etiam æquum esse arbitratur , definiri certum tempus ante quod tempus qui justum earum rerum dominum se esse non probaverit , excludetur ad evitandas sine fine lites. Quod autem ad modum venundandi ea bona quæ ejecta in naufragio facile corrumpuntur , visum est Concilio eum modum proponere qui ad lucernam dicitur , ut qui sit modus maximè probabilis verum bonorum pretium eliciendi ad dominorum emolumentum ; tamen si prædicti Domini Legati inventam aliam rationem attulerint quæ huic fini magis conducere videbitur , per Concilium non stabit quo minus id fiat quod æquum erit : neque intelligitur ob hanc rem huic Tractationi moram afferendi occasio ulla præbeatur.

Quod autem ad eorum supplicium qui propositum

positum foedus ruperint , Concilium id adjecit ,
cujus in responso suo ad articulum quartum decimum fit mentio ad majorem ejus articuli efficaciam ipsumque foedus eò firmitus atque diuturnius reddendum.

Ad clausulam Articuli quarti decimi extremam quod attinet respondere , non expedire censemus illis foederibus ac Societatibus , quarum in praedictis responsis facta est mentio , quæque generatim duntaxat proponuntur assensum nostrum exhibere antequam quales illæ sint , exploratius nobis fuerit , de quibus cum Excellentiss Vestrīs visum erit Concilium certius facere , responsum expressius ad id reddere poterimus.

Replicatio Concilii Status ad responsum praedictorum Dominorum Legatorum quod ad senos articulos à praedicto Concilio nomine Reipub. Angliæ exhibitos est redditum.

Concilium , inspectis praedictorum dominorum Legatorum diplomatis quibus collata in eos potestas est transigendi cum *Parlamento* aut ejus Commissariis de iis omnibus quæ transigi expediverit foederaque vetusta renovandi novaque jungendi , existimabat quidem praedictos dominos Legatos ea auctoritate esse praeditos ut & responsa dare possent , & omnia transigere tam quæ à parte hujus Reipub. quam quæ

quæ à parte *Regis Dania & Norwegia* ferrentur, adeoque responsa quæ prædictis Dominis Legatis ad primam, secundam, tertiam & quintam Concilii postulationem dare libuit haud expectabat, quo factum erit ut huic præsentì tractationi necessario more afferatur cum & in se æquissimum sit & in Concilio deliberatum fœdus integrum tractando simul complecti tam de iis quæ ad hanc *Rempub.* quam quæ ad Regna *Dania & Norwegia* spectant. Quapropter Concilium enixè flagitat ut Excellentia Vestræ respondere ad prædictum nostrum primum, secundum, tertium, & quintum postulatum velint.

Ad quartum articulum de portoriis *Gluckstadt* cum ea jam antiquata sint, quemadmodum Excellentia Vestræ in responso meminerunt, instat Concilium uti eorum illa antiquatio etiam per hoc fœdus rata habeatur, ne forte in posterum revocentur.

Quod ad sextum articulum, qui de pyratica est, eum quidem inseruit Concilium ut qui ad utriusque commoda æquè pertineret & ad commercium in commune stabiliendum quod à pyratis atque prædonibus perquàm turbatur atque interruptitur; cumque responsum Dominorum Legatorum de hoc articulo ad hostes tantùm referatur, mentionem Piratarum nullam faciat, Concilium idcirco expressius responsum ad id petit.

Cumque prædicti Domini Legati in sua replicatione ad responsum Concilii & decimum suum

suum articulum, & ad eum Concilii responsum præterminiserint, Concilio necessarium visum est prioribus suis postulatis sequentem hunc articulum adjungere.

Populum & incolas Reipub. Angliæ qui negotia aut commercium per ulla regna, regiones, aut ditionem *Regis Dania & Norwegia* habuerint portorii, tributis, census, vectigalis aut stipendii cujusvis plus in posterum non solvere aut alio quovis modo atque populus fœderatarum *Belgis* Provinciarum, aliave quævis natio externa minimum illic solvens mercaturamque faciens, si solvit aut solutura est, parique frui & æquè amplâ libertate privilegiis & immunitatibus, cum in adventu, tum in reditu & quamdiu illic commorabuntur, in piscatu etiam, mercatura, atque alio quocunque modo, quo ullius exteræ gentis populus in prædictis regnis totaque ditione dicti *Regis Dania & Norwegia* fruitur aut frui queat; quibus itidem privilegiis populares *Regis Dania & Norwegia* per omnes Provincias ac ditionem *Reipublicæ Angliæ* pariter fruuntur.

Concilium Status Reipub. Angliæ

Serenissimo Principi

DO. FERDINANDO SECUNDO,
Magno Duci Hettruriæ,

SALUTEM.

Serenissime Princeps, Amice Charissime,

Concilium Status, cognito tam per Oratorem Celsitudinis Vestræ hîc commorantem, quam per *Carolus Longlandum* Mercatorum Anglicorum negotia *Liburni* procurantem, quanta cum benevolentia ac fide Celsitudo Vestra navium Anglicarum in *Liburnensem* portum se recipientium tutelam susceperit, contra *Belgarum* naves prædatorias exitium illis atque direptionem minitantes, literis undetrigesimo Julii datis (quas ad Celsitudinem Vestram, jamjudum pervenisse sperat) significavit quàm id sibi gratum acceptumque accidisset, eodemque tempore scriptum Parlamenti Reipublicæ *Angliæ* de controversiis inter hanc *Rempub.* & *Fæderatas Belgii Provincias* in præsentia exortis ad Serenitatem vestram unà misit. Cumque rursus per eundem *Carolus Longlandum* Concilium intellexerit, quæ ulterius mandata dederit Celsitudo Vestra de incolumitate atque tutela navibus *Anglicis* præstanda, etiam *Belgis*, ne id fieret, importunè contra nitentibus, ne

C

hanc

hanc quidem occasionem prætereundam esse censuit, significandi rursus Celsitudini Vestræ se vestram justitiam & singularem in tutandis navibus suis constantiam cum plurimi facere tum sibi etiam gratissimam habere. Quod cum solidæ amicitiae studiique vestri in hanc rempub. haud leve indicium sit, persuadere sibi poterit Celsitudo Vestra paria officia atque studia in nobis erga Vestram Celsitudinem nunquam se esse desideraturam. Quæque declarare possint quàm nobis deliberatum sit eam amicitiam quæ huic Reipub. cum Vestra Serenitate est, quam constantissimè atque diutissimè pro virili nostrâ parte conservare. Nos Interim navibus nostris omnibus, quæ vestros portus intraverint disertis verbis mandavimus, ut salutationes explosione tormentorum consuetas, omnemque honorem debitum vestræ Celsitudini exhibere meminerint.

Datis Alba Aula

Septemb. 1652.

Et Concilii Sigillo deinde consignandis
subscripsit

Concilii Praeses.

Ad Legatum Hispanicum

ALPHONSUM DE CARDENAS.

Excellentissime Domine,

Litteræ *Excellentia Vestra* ^{1^a}/₁₁ *Novemb. 1652.*
datae, & à Secretario vestro *Novemb. 8:*
redditæ unà cum duobus libellis supplicibus
simul

simul involutis in Concilio recitatæ sunt de navibus nimirum *Samfone* & *San Salvatore* vulgò nominatis, ad quas Concilium responsum hoc reddit, Navem Anglicam præfidiariam, cum in prædictas naves non in Dunis, ut scribit Excellentia Vestra, sed in alto incidisset, tanquam hostium navem prædæ habitam in portum adduxisse; curiamque Ammiralatus ad quam propriè de causis hujusmodi attinet cognoscere illius causæ cognitionem pro jure sibi sumpsisse; ubi singuli partis utriusque quorum id interest ampliter & liberè audientur jusque suum quisque obtinebit: vestræ porrò Excellentiae rogatum ad illius Curiae judices misimus quo certius intelligamus quousque iis de navibus in judicio processerint. Quod simul ac nobis compertum erit ea dari mandata hæc de re curabimus quæ & æquum erit, & eâ dignum amicitia quæ huic Reipublicæ cum Rege vestro intercedit, nec minùs confidimus Regiam ejus Majestatem minimè passurum esse hujus Reipublicæ hostium bona sub nomine ejus subjectorum elabi aut delitescere.

Subscripsit & Concilii Sigillum
apponendum curavit

GUILIELMUS MASHAM,
Concilii Præses.

*Datis ab Albâ Aulâ 11. Novemb.
An. Dom. 1652.*

L E G A T O H I S P A N I E N S I.

Excellentissime Domine.

Allatum nuper ad Concilium est ab Navarcho nostro *Badileo* navium hujus Reipub. ad *Gaditanum* mare Præfecto, se cum tribus aliis navibus præsidariis postquam undecim Belgicarum impetum continuato bidui certamine sustinisset, ad portum *Longonem* vulgò dictum ad sarcienda quædam in eo prælio accepta incommoda, easque res comparandas quæ sibi ad pugnam opus essent, in portum *Longonem* vulgò dictum se recepisse, ubi ejus loci Præfectus in eum cæterasque sub ejus ductu naves omnia & justissimi & humanissimi simul Viri officia implevit; cumque is locus in ditione Serenissimi Regis Hispaniarum sit, Concilium certè singularem præsidii illius singularem humanitatem reipsâ cognitam actioris amicitiae mutuae tam auspiciatò cæptæ fructum uberem esse existimat; sui que adeò officii ducit esse, ob acceptum tam opportunò beneficium ejus *Majestati* gratias agere, vestramque rogat Excellentiam ut hoc *Regi suo* serenissimo velit primo quoque tempore significare, eique persuasum reddere *Parlamentum Reipub. Angliæ* paratum semper fore paria amicitiae atque humanitatis

manitatis officia oblatâ quâvis occasione referre.

Dat. Westmonasterio 11. Novemb.

An. Dom. 1652.

Subscripsit & Concilii Sigillum
apponendum curavit

GUILIELMUS MASHAM

Concilii Præses.

Parlamentum Reipub. Angliæ,

Serenissimo Principi

D^o. FERDINANDO SECUNDO,

Magno Duci Hetruriæ

SALUTEM.

Serenissime Princeps Amice Charissime,

Parlamentum Reipub. Angliæ literas vestræ
Celsitudinis *Augusti* septimo decimo, Flo-
rentiâ datas accepit: in quibus de restitutione
navis cujusdam agitur oryzâ onustæ, quæ na-
vis à capitaneo *Cardio Liburniensi* vendicatur.
Et quamvis in nostrâ Ammiralatus curiâ contra
prædictum *Cardium* in eâ causâ sententia Judi-
cum lata jam sit, & apud Delegatos provocatio
tum penderet, tamen cum hoc Celsitudo vestra
petat, Parlamentum, quo tam amici Principis
benevolentiam ac necessitudinem quanti faciat
C 3 testi-

testificari possit , mandavit quibus curæ ea res est , ut navis illa cum oryzâ , vel saltem ejus justum pretium prædicto Capitaneo *Cardio* reddatur ; cujus mandati fructum procurator ejus apud nos re ipsâ jam percepit. Et quemadmodum Celsitudo vestra suum navibus Anglorum in portu *Liburniensis* patrocinium atque tutelam benignè præbendo Parlamentum sibi magnoperè devinxit (cujus rei gestæ narratio tam ab Oratore hîc vestro , quàm à *Carolo Longland* mercatorum nostrorum illic procuratore delata nuper ad nos est) ita Parlamentum summo vicissim studio dabit operam, quotiescunque occasio dabitur , ut sua omnia sinceræ amicitiae atque benevolentiae officia in Celsitudinem vestram solidè constare possint ; quam adeò divinæ benignitati atque tutelæ commendatissimam vult esse.

*Datis Westmonasterio
die Novemb. 1652.*

Subscripsit & Sigillum Reipub.
apponendum curavit

*Prolocutor Parlamenti Reipub.
Anglia.*

Par-

Parlamentum Reipub. Angliæ

Serenissimo & potentissimo Principi.

D A N I Æ R E G I &c.

Serenissime & Potentissime Rex,

Parlamentum Reipub. Angliæ postquam accepit ab illius Classis Præfecto quæ nuper ad *Hafniam* Majestatis Vestræ portum missa est, ut navibus Mercatorum nostrorum inde redeuntibus domum præsidio esset; prædictis navibus permissum non esse secum discedere; verum illic Majestatis Vestræ jussu retineri; productis etiam ab eo literis Regiis vestram ea in re sententiam declarantibus, negat explicatas in iis literis rationes cur naves illæ retineantur ulla in parte sibi satisfacere: ut igitur in re tanti planè momenti quæque ad prosperum utriusque Gentis Statum tantoperè conducit sequuturo fortasse majori cuiuspiam incommodo maturius occurratur, misit *Parlamentum* Virum illustrissimum & spectatæ fidei *Richardum Bradshaw Ar- migerum, Hamburgi* Oratorem, qui itidem ad Majestatem Vestram Oratoris munus impleat, cum iis disertè mandatis, ut de prædicto Negotio agat: Vestramque adeò rogamus Majestatem eidem velit Viro & aurem benignam & fidem amplam perhibere, quicquid super hoc negotio Vestræ Majestati nostro nomine proposuerit:

fuerit: quam Nos divinæ Tutelæ & Providentiæ commendatam volumus.

*Datis Westminsterio 6. die
Novemb. An. Dom. 1652.*

Sub Sigillo Parlamenti ejusque Nomine
atque Authoritate subscripsit

*Prolocutor Parlamenti Reipublica
Angliæ.*

Parlamentum Reipub. Angliæ

Serenissimo Principi

VENETIARUM DUCI

SALUTEM.

P*arlamentum Reipub. Angliæ* literas Celsitudinis vestræ *primo Junii 1652.* datas per *Laurentium Palutium* accepit, ex quibus cum & vestrum, & Senatus propensum in hanc Rempublicam animum prospiciat, occasionem hanc suum vicissim erga Serenissimam Rempub. *Venetam* singulare studium ac benevolentiam declarandi, libenter arripuit, quam & re ipsa idque ex animo, demonstrare quoties usus venerit, haud quaquam gravabitur, cui & omnes vel conservandæ vel etiam augendæ amicitiae ususque mutui rationes in medium allatæ erunt itidem acceptissimæ, vestræque ad cō Celsitudini
& Rei-

& Reipublicæ Serenissimæ fausta omnia ac prospera exoptat atque præcatur.

Datis Westmonasterio die

Decemb. An. Dom. 1652.

Subscripsit & Parlamenti Sigillum
imponendum curavit

*Prolocutor Parlamenti Reipub.
Anglia.*

Parlamentum Reipub. Angliæ

Serenissimo Principi

FERDINANDO SECUNDO

Hetruriæ Magno Duci,

SALUTEM.

CUM *Parlamentum Reipub. Anglia* antehac
suis Navarchiis atque Præfectis navium ad
loca sub vestræ Celsitudinis Ditione appellentibus,
etiam atque etiam mandaverit, ut se pacatè
atque modestè gererent, eaque quâ decet
observantiâ erga Principem Serenissimum cujus
hæc Respub. & conservare amicitiam tantoperè
studeat, & tantis beneficiis affecta sit, prorsus
inopinatum sibi quidem accidit; quod à Navarcho
Appletono in *Liburnensi* portu insolentius
factum esse accepit; cum nimirum ab eo vigilans
dum in molestationem ageret, vim attulisse,
idque tum contra fidem atque obsequium huic

C 5

Rei

Reipublicæ ab eo debitum, tum contra observantiam atque honorem qui vestræ Celsitudini suâ in ditione jure optimo debetur : quam rem totam sicuti gesta est, ex literis vestris 7. & 9. *Decembris Florentiâ* datis Parlamentum intellexit; uberiùs etiam per spectatissimum virum *Almericum Salvettum*, vestrum hîc Residentem; Atque vestræ Celsitudinis honorem qui hâc in re agi videtur, usque ad eò sibi commendatum habet, ut Concilio Status id negotii dederit, uti literas Navarcho *Appletono* quam primum scribendas curaret, quibus is terrestri itinere confestim huc advolare juberetur, insoliti hujus facti & extraordinarii rationem redditurus (quarum exemplum literarum his inclusum unâ mittitur) qui ubi advenerit & facti postulabitur, de eo id statutum iri pollicemur, quod testificari possit se vestri juris violationem haud minùs molestè ferre, quam si ipsum jus suum violaretur. Quinetiam de nave dictâ *Phanice Liburni* recuperatâ consultatione habitâ, quæ res à Celsitudine vestrâ nec non ab Oratore suo narratur atque urgetur, contra datam à Navarcho *Appletono* fidem fuisse, quâ obstrictus erat ne *Hollandos* intra conspectum portus aut laternæ adoriretur, vestramque Celsitudinem eâ fiduciâ nixam, *Hollandis* fide datâ de incolumitate promississè, debere proinde eorum satisfactioni prospicere, quibus vestrâ sub fide damnum datum est, Parlamentum ab Excellentiâ vestrâ petit, ut hoc sibi persuasum habeat, hanc rem, quemadmodum sine suo

con-

consilio aut mandato est gesta , ita hoc etiam ab suâ voluntate ac mente longissimè abesse ut Celsitudo vestra ullo incommodo aut honoris imminutione ex illo facto afficiatur : quin imò se operam daturum , ut vobis satisfaciendi aliqua ratio ineatur , prout sibi quæstione habitâ de re totâ constiterit : quam ut plenius intelligere possit , ipsum Navarchum *Appletonum* ab se audiri necessarium esse judicat ; qui & eâdem fide obstrictus erat , & ab Excellentia vestrâ creditur , ejusdem violationi saltèm assensisse ; præsertim cum is tam brevi sit ad nos reversurus , atque illum postquam Parlamentum audiverit , & cum dicto Oratore vestro rationes amplius contulerit , hâc de re haud exigui sane momenti eam sententiam feret , quæ & æqua erit , summæque benevolentia quâ celsitudinem vestram prosequitur consentanea , collatis denique à vobis in se beneficiis haud indigna. De quâ ne interim dubitaret Celsitudo vestra literis per eundem hunc tabellarium statim missis certior factam primo quoque tempore volebat ; seque nullam occasionem esse prætermitturum , quâ possit re ipsâ testari , vestram amicitiam quanti faciat.

*Datis Westmonasterio 14. die
Decembris An. Dom. 1652.*

Subscripsit & Parlamenti Sigillum
imprimendum curavit

*Prolocutor Parlamenti Reipub.
Anglia.*

Concilium Status Reip. Anglicanæ

Serenissimo Principi

FREDERICO Hæredi *Norwegiæ*
Duci Slesvici, Holsatiae, Starma-
riæ, Ditmarsiae, Comiti in
Oldenburgh & Delmenhorst

SALUTEM.

QUanquam sapientissimo Deo visum est re-
rum omnium Moderatori clementissimo
præter illud onus quod nobis cum majoribus no-
stris commune imposuit, ut pro libertate nostrâ
contra tyrannos honestissima bella gereremus,
iis nos etiam auspiciis eaque divinâ ope præ illis
insigniter adjuvare, ut non solum civile bellum
restringere sed & causas ejus in futurum præci-
dere, nec non & hostium externorum inopi-
natos impetus propulsare valuerimus, eundem
tamen supremi numinis in nos favorem ac be-
nignitatem gratissimis quantum possumus ani-
mis agnoscentes, non ita rerumstrarum
successibus efferimur, ut non singularem po-
tius Dei justitiam ac providentiam edocti, atque
nosmet largiter experti, & bellum omne quan-
tum licet aversemur, & pacem cum omnibus
cupidissimè amplectamur. Quemadmodum igitur
quæ amicitia, quæque fœderum jura nobis
cum

cum populis quibuscunque ac Principibus antiqua intercessere, ea hactenus cuiquam nec violavimus priores, nec violata volumus, ita & Celsitudo vestra pro vetustâ suâ cum *Anglis* & à majoribus acceptâ amicitia poterit certissimâ animi persuasione de nobis æqua omnia atque amica, & sibi & suis polliceri. Denique ut delata à Celsitudine vestrâ nobis sua studia atque officia plurimi ut par est facimus, ita operam dabimus ut neque nostra ullo tempore vel sibi vel suis deesse sentiat: Vestramque adeò Celsitudinem Omnipotentiaë numinique Dei Omnipotentis quàm maximè commendatam cupimus.

Datis in Alba Aula die

Julii Ann. 1653.

Subscripsit & Concilii Sigillum
imprimendum curavit

Concilii Præses.

COMITI OLDENBURGICO.

Illustrissime Domine,

Parlamentum Reipub. *Angliæ* plurimam salutem ab Amplitudine vestra officiosissimè atque humanissimè sibi dictam, per *Hermanum Mylium*, Jurisconsultum Deputatum & Consiliarium vestrum accepit: qui & fausta omnia Parlamento reique *Anglicæ* vestro nomine precatus est, & hujus Reipub. amicitiam ut

vobis facta tecta permaneret simul expetivit : literas etiam liberi comitatus , quibus vestrae conditionis populus eò tutius negotiaretur , navigaret , & commercia exerceret , nec non & nostra ad publicos foris ministros mandata uti Amplitudini vestrae rebusque vestris , suis officiis atque consiliis opitularentur , idem à nobis petivit. Nos & petitis hisce libenter annuimus , & cum amicitiam , tum etiam literas illas expetitis , illaque ad ministros publicos mandata sub Parlamenti sigillo concessimus. Et quamquam aliquot jam menses abierunt , ex quo Vester Publicus Minister ad nos primum accessit , ea tamen dilatio neque ex eo orta est , quo nos petitioni , Amplitudinis Vestrae nomine factae , assentiri gravaremur , neque quo Vester Deputatus nos assidue sollicitate , ullo tempore destiterit , (qui certe omnium diligentia , nec non officiosa simul instantia , ut confecto negotio , compos voti dimitteretur , quotidie nos efflagitavit) verum ex eo solum accidit , quod maxima quidem & gravissima Reipub. negotia , quæque ad eam vehementer pertinere aut agerentur per hoc totum fere tempus , aut transigerentur. Qua de re dignitatem vestram Illustriss : certiore facendam esse censuimus , ut ne quis dilationem hanc secus interpretando , gravatim aut ægrè impetratum hoc esse existimet , quod à Parlamento Reipub. *Angliae* libentissime concessum est. Cujus nomine consignare hæc iussus est

HENRICUS SCOBELL *Clericus Parlam.*

Par-

Parlamentum Reipub. Angliæ

*Illustribus & Amplissimis Consulibus ,
 Scultetis , Landam. & Senatoribus Can-
 tonum Helvetiæ Evangelicorum , Tigurini ,
 Bernensis , Glaronensis , Basileensis , Schaf-
 fusiensis , Abbatiscellani , nec non ejusdem
 Religionis Confœderatorum in Rætia , Ge-
 nevæ , Sanctogalli , Multusii & Biennæ ,
 Amicis nostris charissimis*

SALUTEM.

L Iteras vestras, *Illustres Domini atque Amici
 Charissimi, Decembris 24. 1652.* ad Nos datas
 accepimus, omni humanitate, benevolentia, studioque erga nos nostramque Rempub. egregio refertas; quodque nobis semper majus & antiquius debet esse, charitatem fraternam & verè christianam spirantes. Deoque imprimis Optimo Maximo gratias agimus, qui vos totque vestras *Civitates* nobilissimas, non tam illis montium claustris quàm insitâ vestrâ fortitudine, pietate, & prudentissimâ æquissimâque rerum civilium administratione, mutuâ denique foederum fide circumvallatas atque munitas, firmissimum universis orthodoxis præsidium illis in locis excitavit atque constituit: vos deinde, qui per omnem Europam primi fere mortalium post invecas ab Aquilone Barbarorum

rum Regum tyrannidos , Deo vestram virtutem prosperante , libertatem vobis peperistis , partam haud minore prudentiâ ac moderatione , tot per annos , illibatam conservastis ; de nobis nostrâque libertate nuper vindicatâ tam præclare sentire , tamque sinceros Evangelii cultores de nostro in orthodoxam fidem amore ac studio , tam constantèr persuaderi , id quidem longè nobis gratissimum est. Quod autem ad pacem nos piè sanè & affectu , ut nobis est persuasissimum , verè christiano adhortamini , permagnum cettè pondus apud nos ea adhortatio habere debet ; cum propter ipsam rem , quam suaderis , maximè expetendam , tum propter summam etiam auctoritatem , quæ Vobis præ cæteris hâc in parte meritò tribuenda est , qui inter maximos circumquaque bellorum tumultus , & ipsi summam pacem domi forisque tamdiu colitis , & aliis omnibus pacis colendæ simul hortatores & exemplum optimum extitistis ; cum id denique suadeatis , quod nos deditâ operâ , idque haud semel , non tam nostris rationibus , quàm universæ rei Evangelicæ prospicientes , per Legatos aliosque publicos Ministros petivimus , amicitiam nimirum & arctissimum foedus cum foederatis *Belgarum Provinciis* feriendum. Verùm illi (sive illa perpetuè nobis infesta , regiis addicta partibus , tyrannidis & ipsa apud suos affectatæ comperta *Arausiana* factio potius dicenda est) quo pacto Legatos nostros , non de pace , sed de fraternâ amicitîâ ac foedere arctissimo venientes acceperint ,

rint, quas postea belli causas præbuerint, ut nos, inter ipsa Legatorum suorum de fœdere colloquia, instructâ classe nihil tale cogitantes, in ipsis navium stationibus nostris, ultrò laceraverint, ex illo à nobis eâ de re publicè scripto, & nunc unâ cum hisce literis ad vos misso, abundè intelligetis. Nos autem in id sedulò incumbimus, Deo benè juvante, quamvis re hætenùs, tam prosperè gestâ, ut neque nostris quicquam viribus aut copiis tribuamus, sed Uni Omnia Deo, neque successibus insolentèr efferamur: Eundemque animum retinemus conficiendæ justæ atque honestæ pacis omnes occasiones amplecti paratissimum. Vos interim, *Illustres ac præstantissimi Domini*, quibus pium atque præclarum hoc studium est, solo Evangelico amore impulsis, fratres inter se certantes componere atque conciliare, & omni apud homines laude digni, cœlestis illius pacificorum præmii apud Deum haud dubiè compotes futuri, cujus summæ benignitati atque gratiæ vos vestrosque omnes ex animo commendatos volumus, si quâ in re vobis usui esse possumus, ad omnia cum amicorum tùm fratrum officia promptissimi.

Datis Westmonasterio die Octobris

An. Dom. 1653.

Subscripsit & Parlamenti Sigillum
imprimendum curavit

*Prolocutor Parlamenti Reipub.
Angliæ.*

I.e.

Legato Hispanico.

Illustrissime Domine,

CUm graves ad nos allatæ essent querelæ *Philippi Noëlli, Joannis Godalli, & societatis mercatorum in Anglia Foyensium*, Navem quandam suam *Annam Foyensem* dictam, navem *Anglicam* à sese instructam, suis mercibus onustam, cum domum suam ad portum *Foyensem*, cursum teneret circa Festum *Michaelis Archangelis*, à nave quadam præsidaria *Ostendensi*, cui præfuit *Erasmus Bruerus*, oppressam injustè & sine causa captam fuisse, inque ea nautas indignè & barbarè tractatos, Consilium Status ea de re ad *Marchionem Leda* scripsit, (quarum literarum exemplar Amplitudini vestræ unà cum his mittimus) Expectabatque ab eo sine mora mandatum iri ut ex jure & æquo ista in re quam primum ageretur. Verùm cum denuò prædictus *Noëllus* unà cum illa societate graviter queratur, quamvis literæ nostræ *Marchioni* redditæ fuerint, & mercatores illi, ab eo tempore se *Brugas* ad maritimarum causarum curiam contulerint, ibique jus suum suæque causæ veritatem probaverint, justitiam tamen sibi denegari, tamque iniquè secum agi ut quamvis per tres ampliùs menses cognitioni matura res fuerit, tamen ab illa curia se impetrare non posse ut sententiam tandem ferat; quin navis
eorum

eorum & bona nihilo minus retineantur , seque per hanc moram in persequendo jure suo magnos sumptus fecisse. Non ignorat *Amplitudo Vestra* & juri Gentium & commercii & amicitiae , quæ inter Anglos & Flandros est , contrarium esse , ut navis aliqua *Ostendensis* navem aliquam *Anglicam* caperet , siquidem mercibus *Anglicis* onusta *Angliam* petat ; quæque ab illo Præfecto in nautas *Anglicos* inhumaniter ac barbarè commissa sunt pœnam gravem mereri. *Concilium* itaque hanc rem *Amplitudini* vestræ commendat , petitque ut de ea in *Flandriam* scribere velitis , eamque operam primo quoque tempore dare ut ne hoc negotium diutius extrahatur sed uti ea justitia fiat , ut prædicta navis & bona , unà cum damnis , sumptibus & scœnore quæ *Angli* isti propter illam injustam interceptionem sustinuerunt , *Authoritate* Curiae maritimæ *Brugensis* , aut alio modo bono iis reddantur , utque curetur nequa ejusmodi interceptio deinceps fiat , quin amicitia quæ nostris hominibus cum *Flandris* intercedit sine ulla violatione conservetur.

*Obsignatum nomine & jussu Concilii Status
Parlamenti auctoritate constituti.*

Mar-

Marchioni Ledæ.

Illustrissime Domine,

GRaves ad nos allatæ sunt querelæ, à *Philippo Noëlo*, & *Joanni Godallo*, & Societate mercatorum *Foyensium*, de nave quadam sua, cui nomen *Anna Foyensis*, quæ cum esset Navis Anglica, ab illis instructa, & ipsorum solummodo mercibus onusta, circiter festum *Michaëlis Archangeli* ad portum suum renavigans, à nave præsiaria quæ ad *Ostendam* pertinebat, cujus erat Præfectus *Erasmus Bruerus*, de improvise capta fuit. Nuntiatum porrò est, *Ostendenses*, cum in sua potestate navis esset, nautas omnes nimis inhumaniter tractasse, accenso fune digitis admoto, & navis magistrum undis immeruisse, atque pœne suffocasse, ut minimè veram ab ipso confessionem extorquerent, de navi atque mercimoniis illis, quasi Gallorum essent. Quod tamen Magister ille cæterique socii navis firmiter pernegabant, *Ostendenses* tamen, & navim & mercedes in portum suum abduxerunt. Hæc in *Cursa Navali Angliæ*, inquisitione factâ, testibusque adhibitis vera esse apparere, ut ex autographis testimoniorum quæ cum his literis simul misimus manifesto liquebit. Cum itaque illa Navis, *Anna Foyensis* dicta, atque mercimonia omnia peculiariter verè ac propriè ad *Anglos* pertineant,

neant, adeo ut nulla causa appareat cur *Ostendenses* vel illam vel ea vi caperent, multò minùs auferrent navis Magistrum, aut societatem tam durè tractarent; cumque secundùm leges Nationum atque amicitiam inter *Anglos Flandrosque*, navim illam atque mercimonia reddi oporteat, magnoperè petimus ab Excellentia vestra, ut jus suum *Anglicani* maturè obtineant, atque illis satisfiat qui damnum acceperunt, utque commercium, & Amicitia quæ inter *Anglos Flandrosque* est, diù atque firmitèr conservetur.

Legato Hispanico.

Parlamentum Reipub. Angliæ cum intelligat, plurimos ex populo in hâc urbe tam Excellentiae vestrae, quàm aliorum Legatorum & ministrorum ab exteris regionibus publicorum hîc versantium domos *Missæ* audiendæ causâ frequentare, *Concilio Status* mandavit, uti Excellentiae vestrae significaret, cùm hoc gentis hujus legibus damnatum, ac in hâc nostrâ Republica mali admodum exempli sit, offensio- nisque plenum, censere se, sui planè officii esse, ne quid tale dehinc fiat providere; cœtus- que ejusmodi in futurum prorsùs interdicere. Quâde re Excellentiam vestram admonitam nunc esse cupimus, ut ne quem ex populo hujus Reipublicæ *Missæ* audiendæ causâ suam in do- mum posthâc velit admittere. Et quemadmo- dum *Parlamentum* diligenter curabit ut Legati
jus

jus & privilegia quæque vestræ Excellentię in-
violata servantur , ita hoc sibi persuasissimum
habet , *Excellentiam* vestram , quandiu hic
commoratur , leges hujus Reipub. per se suosve
nolle ullo modo violatas.

*Summarium damnorum singulorum
& haud fictorum quibus Societas An-
glicana multis Orientalis Indiæ Locis
& Belgica Societate affecta est.*

1. **D**amna illa sedecim Articulis comprehensa & pridem exhibita , quorum summa est 298555. *Règiorum* $\frac{2}{3}$ quæ est monetæ nostræ } $\text{£ } 88$
74638:15:00
2. De *Pularonis* Insulæ fructibus satisfactionem dari postulamus ab anno 1622. ad hoc usque tempus ducenties millenum *Règiorum* $\frac{2}{3}$ præter dispendium futurum donec jus ditionis in illam Insulam nobis restituatur eo rerum statu in quo fuit cum erepta nobis est , prout fœdere sancitum erat : quod est nostræ monetæ } 50000:00:00
3. Satisfactionem postulamus de omnibus illis mercimoniis ci-

bariis & apparatus, qui ab
Agentibus Societatis *Belgia* apud
Indos ablati sunt, aut iis traditi,
aut ulli ex eorum navibus eo cur-
sum tenentibus aut inde redeunti-
bus, quorum summa est 80635.

Regiorum: nostræ monetæ

4. Satisfactionem postulamus
ob portiora *Mercium Belgicarum*
quæ in *Perside* aut navibus impo-
sitæ sunt aut in terram expositæ
ab anno 1624. prout nobis à Rege
Persarum concessum erat quæ
minoris æstimare non possumus
quam Octogies millenis *Regiis*

5. Satisfactionem postulamus
ob quatuor ædes malitiosissimè &
iniquissimè *Jocatra* incensas, unà
cum mercium Apothecis reposi-
toriis & apparatus, cui rei Prætor
illic *Belgicus* occasionem dedit, de
quibus omnibus ex eo ipso loco
certiores postea facti sumus quam
priores quærelas exhibueramus
cujus damni summa est ducentius
millenum *Regiorum*

6. Satisfactionem postulamus
ob 32899 *Libras peperis* ex nave
Endimione vi ablatas anno 1649.
cujus damni summa est

ℒ ℔ ℥

20158:00:00

20000:00:00

50000:00:00

6000:00:00

220796:15:00

Sum-

Summarium Damnorum aliquot particularium quibus etiam à Belgica Orientalis Indiæ Societate affecti sumus.

1. **P**ropter damna quæ per eos fecimus qui *Bantamum* obfederunt, unde factum est ut per sex annos continuos eo commercio exclusi simus & consequenter occasione sexcenties mille Regios in cœmendo pipere locandi pro rata nostra portione, quo multas naves nostras in reditu onerare potuissemus, quo onere cum carerent passim per *Indiæ* littora cariem traxere: interea fors nostra apud *Indos* quæ vel pecuniæ vel bonorum erat stipendio nautico commeatu alioque apparatu imminuta & exhausta est adeo ut prædictæ Jacturæ haud minoris æstimari queant vicies centies & quater millenis Regiis id est nostræ monetæ

2. Plura etiam propter damna ex amissa parte nostra debita fructuum in *Insulis Moluccis, Banda & Amboyna* ex quo tempore per

L B 8
600000:00:00

cædem

cædem nostrorum ibi factam
 pulsi inde sumus ad usque illud
 tempus quo de jactura hac atque
 dispendio nobis satisfiat, quod
 spatium temporis ab anno 1622.
 ad hunc annum Præsentem 1650.
 pro reditu annuo 25000. *Libra-*
rum, annis 28. Summam conficit.

L B 1

700000:00:00

3. Reparationem insuper po-
 stulamus centies & bis millenum
 nongentorum quinquaginta no-
 vem *Regiorum Suratta* a Populo
Mogulli nobis ablatorum, quos
Belga cum in modum tutati sunt
 ut neque ex pecuniis neque ex
 bonis ejus populi quæ in ipsorum
Juncis seu Navibus erant damna
 nostra refarcire possemus, quod
 quidem perficere & conati sumus
 & in manu nostra situm erat,
 nisi eos *Belga* iniquissimè defen-
 dissent, quæ pecunia amissa ad im-
 pensas faciendas jamdudum in
 Europa triplum peperisset: quod
 Nos æstimamus

77020:00:00

4. Ob Portoria *Persidis* quo-
 rum dimidia pars ab Rege *Persa-*
rum Anglis concessa est Anno
 1624. quæ usque ad Annum 1629.
 supputata æstimatur octies mil-
 lenis *Regiis*, quemadmodum prius
 exponitur qua ratione subducta

D

qua-

quatuor mille Librarum in annos singulos præbere tenentur ab anno 1629. à quo unus & viginti anni sunt, atque indè summa conficiatur

84000:00:00

Ab altera Pagina

220976:15:00

Summa totalis

1681996:15:00

Locus Figuræ
Regii

O

*Debitum ab eo tempore factus Sortem
ipsam longè superabit.*

LIT.

L I T T E R Æ
O L I V E R I I
P R O T E C T O R I S
Nominæ Scriptæ.

COMITI OLDENBURGICO.

Illustrissime Domine,

PEr literas vestras *Januarii die vigesimo* 1654. datas certior sum factus, nobilem virum *Fridericum Matthiam Wolisogum* Secretarium vestrum, & *Christophorum Grifiandrum* cum certis mandatis ab illustrissimâ dignitate vestra in *Angliam* missos fuisse. Qui cum ad nos accessissent, & susceptam *Anglicana Reipublica* administrationem nobis vestro nomine gratulati sunt; & uti vos vestraque ditio in hanc pacem, quam cum *Fœderatis Belgii Ordinibus* proxime fecimus, assumeremini: ut denique *Salvam-Guardiam* illam quam vulgo vocant, à *Parlamento* nuper vobis concessam nostrâ nunc auctoritate confirmaremus, petiverunt: ob istam itaque gratulationem tam amicam maximas, ut æquum est, gratias agimus: & illa duo postulata libenter concessimus; nulli etiam occasione in posterum defu-

Marchioni Ledæ.

Illustrissime Domine,

GRaves ad nos allatæ sunt querelæ, à *Philippo Noëllō*, & *Joanni Godallo*, & Societate mercatorum *Foyensium*, de nave quadam sua, cui nomen *Anna Foyensis*, quæ cum esset Navis Anglica, ab illis instructa, & ipsorum solummodo mercibus onusta, circiter festum *Michaëlis Archangeli* ad portum suum renavigans, à nave præsidaria quæ ad *Ostendam* pertinebat, cujus erat Præfectus *Erasmus Bruerus*, de improvviso capta fuit. Nuntiatum porrò est, *Ostendenses*, cum in sua potestate navis esset, nautas omnes nris inhumaniter tractasse, accenso fune digitis admoto, & navis magistrum undis immeruisse, atque pœne suffocasse, ut minimè veram ab ipso confessionem extorquerent, de navi atque mercimoniis illis, quasi Gallorum essent. Quod tamen Magister ille cæterique socii navis firmiter pernegabant, *Ostendenses* tamen, & navim & mercedes in portum suum abduxerunt. Hæc in *Cursa Navali Angliæ*, inquisitione factâ, testibusque adhibitis vera esse apparuere, ut ex autographis testimoniorum quæ cum his literis simul missimus manifesto liquebit. Cum itaque illa Navis, *Anna Foyensis* dicta, atque mercimonia omnia peculiariter verè ac propriè ad *Anglos* pertineant,

neant, adeo ut nulla causa appareat cur *Ostendenses* vel illam vel ea vi caperent, multò minùs auferrent navis Magistrum, aut societatem tam durè tractarent; cumque secundùm leges Nationum atque amicitiam inter *Anglos Flandrosque*, navim illam atque mercimonia reddi oporteat, magnoperè petimus ab Excellentia vestra, ut jus suum *Anglicani* maturè obtineant, atque illis satisfiat qui damnum acceperunt, utque commercium, & Amicitia quæ inter *Anglos Flandrosque* est, diù atque firmitèr conservetur.

Legato Hispanico.

Parlamentum Reipub. Angliæ cum intelligat, plurimos ex populo in hâc urbe tam Excellentia vestra, quàm aliorum Legatorum & ministrorum ab exteris regionibus publicorum hîc versantium domos *Missæ* audiendæ causâ frequentare, Concilio Status mandavit, uti Excellentia vestra significaret, cùm hoc gentis hujus legibus damnatum, ac in hâc nostrâ Republica mali admodum exempli sit, offensio- nisque plenum, censere se, sui planè officii esse, ne quid tale dehinc fiat providere; cœtus- que ejusmodi in futurum prorsùs interdicere. Quâde re Excellentiam vestram admonitam nunc esse cupimus, ut ne quem ex populo hujus Reipublicæ *Missæ* audiendæ causâ suam in domum posthâc velit admittere. Et quemadmo- dum *Parlamentum* diligenter curabit ut Legati
jus

jus & privilegia quæque vestræ Excellentiæ inviolata servantur, ita hoc sibi persuasissimum habet, *Excellentiam* vestram, quandiu hic commoratur, leges hujus Reipub. per se suosve nolle ullo modo violatas.

*Summarium damnorum singulorum
& haud fictorum quibus Societas An-
glicana multis Orientalis Indiæ Locis
& Belgica Societate affecta est.*

1. **D**amna illa sedecim Articulis comprehensa & pridem exhibita, quorum summa est 298555. *Regiorum* $\frac{1}{2}$ quæ est monetæ nostræ

£ 88
74638:15:00

2. De *Pularonis* Insulæ fructibus satisfactionem dari postulamus ab anno 1622. ad hoc usque tempus ducenties millenum *Regiorum* $\frac{1}{2}$ præter dispendium futurum donec jus ditionis in illam Insulam nobis restituatur eo rerum statu in quo fuit cum erepta nobis est, prout scødere sancitum erat: quod est nostræ monetæ

50000:00:00

3. Satisfactionem postulamus de omnibus illis mercimoniis ci-

bariis

<p>bariis & apparatus, qui ab Agentibus Societatis <i>Belgia</i> apud <i>Indos</i> ablati sunt, aut iis traditi, aut ulli ex eorum navibus eorum tenentibus aut inde redeuntibus, quorum summa est 8063 s. <i>Regiorum</i>: nostræ monetæ</p>	<p>20158:00:00</p>
<p>4. Satisfactionem postulamus ob portiora <i>Mercium Belgicarum</i> quæ in <i>Perfide</i> aut navibus impositæ sunt aut in terram expositæ ab anno 1624. prout nobis à Rege <i>Perfarum</i> concessum erat quæ minoris æstimare non possumus quam Octogies millenis <i>Regiis</i></p>	<p>20000:00:00</p>
<p>5. Satisfactionem postulamus ob quatuor ædes malitiosissimè & iniquissimè <i>Jocatra</i> incensas, unà cum mercium Apothecis repositoriis & apparatus, cui rei Prætor illic <i>Belgicus</i> occasionem dedit, de quibus omnibus ex eo ipso loco certiores postea facti sumus quam priores quærelas exhibueramus cujus damni summa est ducentius millenum <i>Regiorum</i></p>	<p>50000:00:00</p>
<p>6. Satisfactionem postulamus ob 32899 <i>Libras peperis</i> ex nave <i>Endimione</i> vi ablatas anno 1649. cujus damni summa est</p>	<p>6000:00:00</p>

220796:15:00

Sum-

Summarium Damnorum aliquot particularium quibus etiam à Belgica Orientalis Indiæ Societate affecti sumus.

1. **P**ropter damna quæ per eos fecimus qui *Bantamum* obfederunt, unde factum est ut per sex annos continuos eo commercio exclusi simus & consequenter occasione sexcenties mille Regios in coëmendo pipere locandi pro rata nostra portione, quo multas naves nostras in reditu onerare potuissemus, quo onere cum carerent passim per *Indiæ* littora cariem traxere: interea fors nostra apud *Indos* quæ vel pecuniæ vel bonorum erat stipendio nautico commeatu alioque apparatu imminuta & exhausta est adeo ut prædictæ Jacturæ haud minoris æstimari queant vicies centies & quater millenis Regiis id est nostræ monetæ

2. Plura etiam propter damna ex amissa parte nostra debita fructuum in *Insulis Moluccis, Banda & Amboyna* ex quo tempore per

L B 8
600000:00:00

cædem

cædem nostrorum ibi factam } *L S 3*
 pulsi inde sumus ad usque illud } 700000:00:00
 tempus quo de jactura hac atque
 dispendio nobis satisfiat, quod
 spatium temporis ab anno 1622.
 ad hunc annum Præsentem 1650.
 pro reditu annuo 25000. *Libra-*
rum, annis 28. Summam conficit.

3. Reparationem insuper po-
 stulamus centies & bis millenum
 nongentorum quinquaginta no-
 vem *Regiorum Suratta* a Populo
Mogulli nobis ablatorum, quos
Belga cum in modum tutati sunt
 ut neque ex pecuniis neque ex
 bonis ejus populi quæ in ipsorum
Juncis seu Navibus erant damna
 nostra refarcire possemus, quod
 quidem perficere & conati sumus
 & in manu nostra situm erat,
 nisi eos *Belga* iniquissimè defen-
 dissent, quæ pecunia amissa ad im-
 pensas faciendas jamdudum in
 Europa triplum peperisset: quod
 Nos æstimamus } 77020:00:00

4. Ob Portoria *Persidis* quo-
 rum dimidia pars ab Rege *Persa-*
rum Anglis concessa est Anno
 1624. quæ usque ad Annum 1629.
 supputata æstimatur octies mil-
 lenis *Regiis*, quemadmodum prius
 exponitur qua ratione subducta }

quatuor mille Librarum in annos singulos præbere tenentur ab anno 1629. à quo unus & viginti anni sunt, atque indè summa conficietur

84000:00:00

Ab altera Pagina

220976:15:00

Summa totalis

1681996:15:00

Locus Figuræ
Regii

O

*Debitum ab eo tempore factus Sortem
ipsam longè superabit.*

LIT.

L I T T E R Æ
O L I V E R I I
P R O T E C T O R I S
Nominæ Scriptæ.

COMITI OLDENBURGICO.

Illustrissime Domine,

PEr literas vestras *Januarii die vigesimo* 1654. datas certior sum factus, nobilem virum *Fridericum Matthiam Wolisogum* Secretarium vestrum, & *Christophorum Griphiandrum* cum certis mandatis ab illustrissimâ dignitate vestra in *Angliam* missos fuisse. Qui cum ad nos accessissent, & susceptam *Anglicana Respublica* administrationem nobis vestro nomine gratulati sunt; & uti vos vestraque ditio in hanc pacem, quam cum *Fæderatis Belgii Ordinibus* proxime fecimus, assumeremini: ut denique *Salvæ-Guardiam* illam quam vulgo vocant, à *Parlamento* nuper vobis concessam nostrâ nunc autoritate confirmaremus, petiverunt: ob istam itaque gratulationem tam amicam maximas, ut æquum est, gratias agimus: & illa duo postulata libenter concessimus; nulli etiam occasione in posterum defuturi,

turi, quæ studium in vos nostrum poterit ullo tempore declarare. Idque ex supradictis Oratoribus vestris plenius vos arbitror intellecturos; quorum fides, ac diligentia in hoc vestro apud nos negotio præclare constitit. Quod reliquum est, vobis, rebusque vestris felicitatem, atque ex voto pacem omnem exopto.

Westmonasterio. Jun. 27.

1654.

Illustrissimæ Dignitatis vestris
studiosissimus

*Oliverius Anglia, Scotia, Hybernia, &c.
Protector.*

Comiti Oldenburgico.

Illustrissime Domine,

Literas vestras *Maii* secundo die *Oldenburg*o datas accepi haud uno nomine gratissimas; cum quòd essent ipsæ singulari erga me humanitate ac benevolentia refertæ; tum quod illustrissimi Domini Comitis *Antonii* perdilecti Filii vestri manu redditæ. Id quod eò magis honorificum mihi duco, ex quo illius virtutes tantâ stirpe dignas, moresque eximios, studium denique in me egregium, non tam acceptum ab aliis quàm re ipsâ cognitum atque perspectum jam habeo. Neque dubium esse potest, quin eandem quoque suis domi spem faciat, fore
sc

se Patris optimi præstantissimique simillimum ;
 cujus præclara virtus atque prudentia perfecit,
 ut tota illa ditio *Oldenburgica* permultis ab an-
 nis, & summâ pace frui, & pacis commoda
 percipere inter sævissimos undique circumstren-
 pentium bellorum tumultus potuerit. Talem
 itaque amicitiam quidni ego quamplurimî
 facerem, quæ potest inimicitias omnium tam
 sapienter ac providè cavere. Pro munere deni-
 que illo magnifico est, *Illustrissime Domine*,
 quòd gratias habeo ; pro jure est ac merito tuo,
 quòd ex animo sum.

Illustrissima dignitatis vestra studiosissimus

O L I V E R I U S Angliæ, Scotiæ, Hiber-
 niæ, &c. Protector.

Westmonasterio

29. Jun. 1654.

Illustrissimo Domino

ANTONIO GUNTHERO.

*Comiti in Oldenburgh, &
 Delmenhorst, Domino in
 Jetroern, & Kniphausen.*

OLIVERIUS Protector Reipub.
Angliæ, Scotiæ, Hybernæ, &c.

Serenissimo Principi

C A R O L O G U S T A V O

*Suecorum, Gothorum, Vandalorumque
Regi, Magno Principi Finlandiæ,
Duci Esthoniæ, Careliæ, Brema,
Verde, Stetini Pomeraniæ, Cassubia
& Vandalia, Principi Rugiæ, Do-
mino Ingræ, VVissmaria, necnon
Comiti Palatino Rheni, Bavariæ,
Jul. Cliviæ & Montium Duci &c.*

SALUTEM.

Serenissime Rex,

CUm Suecorum Regnum per hosce dies
summæ populi studiis, omniumque ordi-
num suffragiis liberrimis translatum ad vos esse,
toto orbe terrarum percubuerit, id maluisse
Majestatem Vestram suis literis amicissimis,
quàm vulgatâ famâ nos intelligere, & summæ
benevolentia erga nos vestra, & honoris inter
primos attributi argumentum haud leve esse du-
cimus. Illam itaque vestris meritis egregiis ac-
cessionem dignitatis, præmiumque virtutis tantâ
dignissi-

dignissimum, & sponte, & jure vobis gratulamur: idque ut *Majestati* vestræ, *Suecorumque* Genti, reique toti *Christiana* bonum atque faustum sit, quod & vobis maximè in votis est, junctis precibus Deum oramus. Quòd autem foederis inter hanc Rempublicam, *Sueciaque* Regnum recens icti conservationem Majestas vestra, quod ad se attinet integerrimam, usque eò curæ sibi fore confirmat, ut quæ nunc intercedit amicitia, non permanere solum, sed, si id fieri potest, augescere etiam indies possit, id vel in dubium vocare nefas esset, tuâ tanti Principis fide interpositâ, cujus eximia virtus non solum in peregrinâ terrâ Regnum tibi hæreditarium peperit, sed tantum etiam potuit, ut augustissima Regina, *Gustavi* filia, cui parem omni laude Heroïnâ multa retrò sæcula non tulêre, possessione imperii justissimâ inopinanti tibi ac nolenti ultrò cederet. Vestram denique tam singulare erga nos studium, tamque præclaram animi significationem nobis esse gratissimam omni ratione persuasum esse vobis cupimus; nullumque nobis pulchrius certamen fore, quàm ut vestram humanitatem nostris officiis nullo tempore defuturis, si id potest fieri, vincamus.

Majestatis Vestrae Studiosissimus

OLIVERIUS, Reipub. Angliæ,
Scotiæ, Hybernæ, &c. Protector.

Westmonasterio. die

4. Julii 1654.

Illustrissimo Domino,

LUDOVICO MENDEZIO
DE HARO.

Quod accepi ex literis tuis, *Illustrissime Domine*, constitutum ac nominatum jam esse ab Serenissimo *Hispaniarum* Rege Legatum, qui de suscepta à me *Anglicana* Republica gratulatum huc primo quoque tempore veniret; cum est meritò per se gratum; tum tu id, qui ex te imprimis hoc me cognoscere voluisti, ut esset mihi aliquanto gratius atque jucundius, singulari tuo studio atque officii celeritate effecisti. Sic enim diligi atque probari me abs te, qui virtute tua atque prudentia tantam apud Regem tuum auctoritatem tibi conciliasti, ut vel maximis illius Regni negotiis par animo præsens, haud minori profectò mihi voluptati debet esse, quàm iudicium præstantissimi viri ornamento mihi intelligo fore. De meo autem in Serenissimum *Hispaniarum* Regem propenso animo, & ad amicitiam cum isto Regno conservandam, atque etiam indies exaugendam promptissimo, & huic qui nunc adest Legato satisfacisse me spero, & alteri, cum advenerit, cumulatè satisfacturum. De cætero, *Illustrissime Domine*, qua nunc flores apud Regem tuum dignitate ac gratia, eam tibi perpetuam

ex-

exopto; quasque res geris bono publico & administras, volo tibi prosperè feliciterque evenire.

*Amplitudinis tuae Illustrissima
Studiofissimus*

OLIVERIUS, Protector Reip.
Angliæ, Scotiæ, Hybernæ &c.

*Albâ Aulâ Septembris.
die 1654.*

Serenissimo Principi

CAROLO GUSTAVO ADOLPHO

Suecorum, Gothorum, Vandalorumque Regi &c.

CUM de voluntate vestra Majestatis in me singulari ex vestris sim nuper literis persuasus, quibus & ipse pari studio rescripserim, videor mihi ex ratione prorsus amicitiae nostrae deinceps facturus, si quemadmodum quæ grata acciderint ad lætitiâ mutua communicem, ita quæ contraria, de iis vobis tanquam amicissimis, animi mei sensum doloremque aperiam. De me equidem fr̄ existimo, eo me in loco Reipub. jam esse constitutum, ut communi Protestantium, paci inprimis & quantum in me est consulere debeam. Quo gravius necesse est feram quæ de *Bremensium & Suecorum præ-*

tiis mutuisque cladibus ad nos perferuntur. Illud
 primum doleo , amicos utrosque nostros tam
 atrociter tamque Protestantium rationibus peri-
 culosè inter se decertare ; pacem deinde illam
 Monasteriensem quæ Reformatis omnibus sum-
 mo præsidio credebatur fore , ejusmodi pepe-
 risse incoelix bellum : ut nunc arma *Suecorum* in
 eos conversa sint quos inter cæteros paulo ante
 religionis causâ acerrimè defenderent : idque
 potissimum hoc tempore fieri , cum Pontificii
 per totam fere Germaniam Reformatos ubique
 rursus opprimere , & ad intermissas paulisper
 injurias vimque pristinam redire palam dicantur.
 Cum itaque intellerem dierum aliquot
 inducias ad *Bremam* urbem jam esse factas , non
 potui sane quin Majestati vestræ , occasione hac
 datâ , significarem quàm cupiam ex animo
 quamque enixè Deum pacis orem , uti istæ in-
 duciarum utrique parti feliciter cedat ; utque in pa-
 cem firmissimam ex compositione utriusque
 commoda possint definire. quam ad rem si
 meam operam conferre quicquam aut usui fore
 Majestas vestra judicaverit , eam vobis libentis-
 simè ut in re Divino Numini procul dubio ac-
 ceptissimâ polliceor atque defero. Interea Ma-
 jestatis vestræ consilia omnia ut ad communem
Christiana rei salutem dirigat Deus atque gu-
 bernet , quod idem non dubito , quin & vos
 maximè velitis , animitus exopto

Majestatis vestrae Studiosissimus

OLIVERIUS, Prot. Reip. Angliæ, &c.

Alba Aula Oct. 26. 1654.

Magni-

Magnificis Amplissimisque

Consulibus ac Senatoribus Civi-
tatis *Bremensis*.

EX literis vestris per Oratorem vestrum *Henricum Oldenburgum* ad nos datis, coortum civitati vestræ cum vicino potentissimo dissidium, quasque exinde ad angustias redacti sitis, eò majore cum molestia ac dolore intelligo, quo magis *Bremensem* Civitatem præter cæteras Orthodoxâ religione præstantem diligo atque amplector; neque in votis quicquam habeo antiquius, quàm ut universum Protestantium nomen fraterno consensu atque concordia in unum tandem coalescat. Lætari interim communem Reformatorum hostem hisce nostris contentionibus & ferocius passim instare certissimum est. Ipsa autem controversia, cum decisionis nostræ non sit quæ vos jam nunc exercet. Deum itaque oro ut quæ cœptæ sunt induciæ possint foelicem exitum sortiri. Equidem quod petistis ad *Suecorum* Regem ea de re scripsi suasor pacis atque concordiae, Deo nimirum imprimis gratæ, meamque operam ut in re tam pia libens detuli, vos uti æquum animum, neque ab ullis pacis conditionibus, honestis quidem illis, abhorrentem suadeo geratis;

vestramque civitatem divinæ tutelæ ac providentiæ commendo

Amplitudinis Vestra Studiosissimus

OLIVERIUS Protector Reipub.
Angliæ &c.

Albâ Antâ Octob. 26.

1654.

OLIVERIUS Protector Reip.
Angliæ

Illustrissimo Principi Tarentino

S. P. D.

PERSPECTUS ex literis tuis ad me datis Religio-
nis amor tuus , & in *Ecclesias Reformatas*
pietas eximia, studiumque singulare, in istâ præ-
sertim generis nobilitate ac splendore, eoque sub
Regno in quo deficientibus ab Orthodoxa fide
tot sunt nobilissimis quibusque spes uberes pro-
positæ, tot firmioribus incommoda subeunda,
permagno me planè gaudio ac voluptate affecit.
Nec minus gratum erat placuisse me tibi eo ipso
Religionis nomine , quo tu mihi dilectus atque
charus inprimis esse debes. Deum autem ob-
testor ut quam de me spem Ecclesiarum & ex-
pectationem esse ostendis, possim ei aliquando
vel satisfacere , si opus erit, vel demonstrare
omnibus , quàm cupiam non deesse. Nullum
equidem fructum laborum meorum, nullum
hujus

Hujus quam obtineo in Repub. meâ sive dignitatis sive muneris nec ampliorem existimarem, nec jucundiorem, quàm ut idoneus sim, qui Ecclesiæ Reformatæ vel amplificationi vel incolumitati, vel, quod maximum est, paci serviam. Te verò hortor magnopere ut religionem Orthodoxam. qua pietate ac studio à majoribus acceptam profiteris, eâdem animi firmitate atque constantiâ ad extremum usque retineas. Nec sanè quicquam erit te tuisque Parentibus religiosissimis dignius, nec quod pro tuis in me meritis, quanquam tuâ causâ cupio omnia, optare tibi melius, aut præclarius queam, quàm si sic te pares atque instituas, ut Ecclesiæ, præsertim patriæ, quarum in disciplina tam felici indole tamque illustri loco natus es, quanto cæteris præluces, tanto firmitus in te præsidium suis rebus constitutum esse sentiant. Vale.

Albâ Aulâ die: Aprilis 1655.

**OLIVERIUS. Protector Reip.
Angliæ**

*Serenissimo Principi Immanueli
Subaudiæ Duci Pedemontii
Principi*

SALUTEM.

Serenissime Princeps,

R Ediditæ sunt nobis *Genevâ*, nec non ex *Delphinat* aliisque multis ex locis ditio-
ne vestræ

stræ finitimis literæ , quibus certiores facti sumus , Regalis vestræ Celsitudinis subditis *Reformatam* Religionem profitentibus , vestro Edicto atque auctoritate imperatum nuper esse , uti triduo quàm hoc edictum promulgatum erit suis sedibus atque agris excedant poenâ capitis , & fortunarum omnium amissione proposita , nisi fidem fecerint se derelictâ religione suâ , intra dies viginti *Catholicam* Religionem amplexuros : Cumque se supplices ad Celsitudinem vestram Regalem contulissent , petentes uti edictum illud revocetur , utque ipsi pristinam in gratiam recepti , concessæ à Serenissimis Majoribus vestris libertati restituantur , partem tamen exercitus vestri in eos impetum fecisse multos crudelissime trucidasse , alios vinculis mandasse , reliquos in desertâ loca montesque nivibus coopertos expulisse , ubi familiarum aliquot centuriæ , eo loci rediguntur ut sit metuendum ne frigore & fame , brevi sint miserè omnes periturae . Hæc cum ad nos perlata essent , haud sane potuimus quin , hujus afflictissimi populi tanta calamitate auditâ , summo dolore ac miseratione commoveremur . Cum autem non humanitatis modo sed ejusdem religionis communionis adeoque fraternâ penitus necessitudine cum iis conjunctos nos esse fateamur , satisfieri à nobis neque nostro erga Deum officio , neque fraternæ charitati , neque religionis ejusdem professioni posse existimavimus , si in hac fratrum nostrorum calamitate ac miseria solo sensu doloris afficeremur , nisi etiam ad sublevanda
corum

eorum tot mala inopinata, quantum in nobis est situm, omnem operam nostram conferamus. Itaque à vestra imprimis Celsitudine Regali majorem in modum enixè petimus & obtestamur ut ad instituta Serenissimorum Majorum suorum concessamque ab iis omni tempore & confirmatam subditis suis *Vallensibus* libertatem velit animum referre. In quâ concedendâ atque confirmandâ, quemadmodum id præstiterunt, quod Deo per se gratissimum proculdubio est, qui conscientiae jus inviolabile ac potestatem penes se unum esse voluit, ita dubium non est quin Subditorum etiam suorum meritam rationem habuerint, quos & in bello strenuos ac fidelissimos & in pace dicto semper audientes experti fuissent. Utque Serenitas Vestra Regalis in cæteris omnibus & benignè & gloriose factis Avorum suorum vestigiis optimè insistit, ita in hoc nolit ab iisdem discedere etiam atque etiam obsecramus; sed & hoc edictum, & si quod aliud inquietandis *Reformatæ* Religionis causâ subditis suis rogatum sit, uti abroget; ipsos patriis sedibus atque bonis restituat; concessa jura ac libertatem pristinam ratam iis faciat; accepta damna sarciri, & eorum vexationibus finem imponi jubeat. Quod si fecerit Regalis Celsitudo vestra, & rem Deo acceptissimam fecerit, miseros illos & calamitosos crexerit & recrearit, & à suis omnibus vicinis, quotquot *Reformatam* Religionem colunt, maximam gratiam inierit; nobisque potissimum, qui vestram in illos benignitatem atque

cle-

clementiam obtestationis nostræ fructum arbitramur. Quod & ad omnes officiorum reddendas vices nos obligaverit ; nec stabiliendæ solum verum etiam augendæ inter hanc Remp. Vestramque ditionem necessitudinis & amicitie fundamenta firmissima jecerit.. Neque verò hoc minus ab justitia vestra & moderatione animi nobis pollicemur : quam in partem Deum Opt. Max. oramus uti mentem vestram & cogitationes flectat :: vobisque adeo vestroque populo pacem ac veritatem & successus rerum omnium felices ex animo precamur.

Abâ Aulâ. May 1655..

OLIVERIUS Protector Reip.
Angliæ &c.

Serenissimo Principi Transylvaniæ,

SALUTEM.

Serenissimo Princeps,

EX literis vestris *sexto decimo Novembris 1654.* ad nos datis singularem erga nos benevolentiam vestram atque studium perspeximus ; & Internuntius vester qui illas nobis literas dedit de contrahenda nobiscum societate & amicitia voluntatem vestram amplius coram exposuit. Nos certè occasionem hanc esse datam, unde nostrum quoque erga vos animum, & quanti Celsitudinem vestram meritò faciamus declarare

rare atque ostendere possimus, haud mediocriter sanè gaudemus. Cum autem Vestra in Rempublicam Christianam præclara merita laboresque suscepti ad nos usque famâ pervenerint & hæc omnia certiùs, & quæ amplius rei *Christiana* vel defendendæ vel promovendæ causâ in animo habeatis Celsitudo vestra suis literis communicata nobis amicissimè voluerit, ea uberiores infuper lætandi materiam nobis attulere: Deum nempe iis in regionibus excitasse sibi tam potentem atque egregium suæ gloriæ ac providentiæ ministrum; qui, cum virtute atque armis tantum possit, de religione communi *Protestantium* tuendâ cui nunc undique malè & dictum & factum est, nobiscum unâ sociare consilia cupiat. Deus autem qui utrisque nobis tametsi locorum intervallo tam longè disjunctis, eundem Religionis Orthodoxæ defendendæ studium atque animum injecit, dubium non est quin earum præcipue rationum author nobis futurus sit, unde & nobis & inter nos & Reformationum reliquis principibus ac civitatibus hac in re maximo esse adjumento atque usui possimus, occasionibus certè omnibus intenti, si quas Deus obtulerit, iis quod ad nos attinet, eodem Deo benè juvante, non decrimus. Interea Celsitudini Vestræ sine summo dolore commemorare non possumus quanta inclementia Dux Allobrogum subditos suos Alpinarum quarundam Vallium incolas Orthodoxam Religionem retinentes persequutus sit. Quos non solum severissimo Edicto quotquot Romanam Reli-

Religionem suscipere recusarunt sedes avitas ,
 bonaque omnia relinquere coëgit ; verum etiam
 suo exercitu adortus est , qui multos crudelissi-
 me concidit , alios barbarè per exquisitos cru-
 ciatus necavit , partem verò maximam in mon-
 tes expulit fame & frigore absumendam , exu-
 ftis domibus , & siqua eorum bona ab illis car-
 nificibus non sint direpta. Hæc ut ad vos jam-
 dudum nuntiata sunt & Celsitudini Vestræ tan-
 tam crudelitatem graviter displicuisse , & ve-
 stram opem atque auxilium , quantum in
 vobis est , illis miserrimis , siqui tot cædibus
 atque miseriis adhuc supersunt , non defu-
 turum , nobis facilè persuadetur. Nos literas
 Duci *Sabaudia* ad deprecandum ejus insensum
 in suos animum jam scripsimus , sicut & Gallo-
 rum Regi , idem ut is etiam velit facere ; vicinis
 denique Reformatæ Religionis Principibus uti
 de illa sævitia tam immani quid nos sentiamus
 intelligere possint : quæ quanquam in illos in-
 opes primum cœpta est , idem tamen omnibus
 eandem religionem profitentibus minatur : eo-
 que majorem illis prospiciendi sibi in commune
 suisque omnibus consulendi necessitatem impo-
 nit : quam & nos eandem rationem , prout
 Deus nobis in animum induxerit , semper se-
 quemur. Id quod Celsitudo vestra persuadere
 sibi poterit quemadmodum & de singulari
 nostro erga se studio atque affectu , quò pro-
 speros rerum omnium successus vobis animitus
 exoptamus ; & vestra incoepta omnia atque
 conatus , quibus Evangelii cultorumque ejus
 liber.

libertati studeatis foelicem exitum sortiri volumus.

Alba Aulâ. May 1655.

O L I V E R I U S P.

Serenissimo Principi

C A R O L O G U S T A V O A D O L P H O
Suecorum Regi,

S A L U T E M.

Pervenisse nuper in regna vestra illius Edicti acerbissimi famam quo dux *Sabaudia* subiectos sibi Alpinos incolas, *Reformatam* Religionem profitentes, funditus afflixit, & nisi religione *Romanâ* suam mutare fidem à Majoribus acceptam intra dies viginti velint, patriis sedibus exterminari iussit, unde multis interfectis, cæteri spoliati, & ad interitum certissimum expositi, per incultissimos montes, hyememque perpetuam fame & frigore confecti cum conjugibus ac parvulis jam nunc aberrant, & hæc graviter tulisse Majestatem vestram nobis persuassimum est. Nam Protestantium nomen atque causam, tametsi inter se de rebus non maximis dissentiunt, communem tamen & penè unam esse, adversariorum par in omnes *Protestantes* odium facile demonstrat. Et *Suecorum* Reges, suam cum *Reformatis* conjunxisse semper causam illatis etiam in Germaniam armis

mis ad *Protestantium* religionem sine discrimine tuendam nemo est qui ignoret: petimus inprimis igitur, idque majorem in modum, à Majestate vestra (nisi id jam fecerit, quod & Reformatorum aliæ Respublicæ & nos fecimus) ut cum *Subaudia* Duce per literas velit agere; suaque autoritate interpositâ & hanc tantam edicti atrocitatem ab hominibus cum innocuis tum religiosis deprecando, si fieri potest, avertere conetur: etenim hæc initia tam sæva quo spectent, quid nobis omnibus minentur, admonere vestram Majestatem supervacuum esse arbitramur. Quod si is iræ suæ, quam nostris omnium precibus auscultare maluerit: Nobis profecto, siquod est vinculum, siqua religionis charitas aut communio credenda atque colenda est, communicato prius vestra cum Majestate, cæterisque Reformatorum primoribus consilio alia quamprimùm ineunda ratio erit, quâ provideri maturè possit, ne tanta innocentissimorum fratrum nostrorum multitudo omni ope destituta miserrimè pereat. Quod idem quia Majestati vestræ visum jam sit atque decretum cum nullo modo dubitemus, nihil consultius, ut nostra quidem fert sententia, esse poterit quam ut gratiam, autoritatem, consilia, opes, & siquid aliud necesse est in hanc rem primo quoque tempore conferamus. Interea Majestatem vestram Deo Opt. Max. commendatam ex animo volumus.

OLIVERIUS Protector Reip.
Angliæ &c.

*Excelsis & Præpotentibus Do-
minis.*

Fæderati Belgii Ordinibus.

E Dictum *Ducis Sabaudia* nuperrimum in sub-
jectos sibi *Alpinos* incolas, Orthodoxam
Religionem antiquitus profitentes, quo illi edi-
cto, ni intra dies viginti fidem *Romanam* am-
plectantur, exuri fortunis omnibus, patriæ
quoque sedes relinquere jubentur, & quantâ
crudelitate in homines innoxios atque inopes
nostrosque, quod maximè refert, in *Christo*
fratres illius edicti auctoritas grassata sit, occisis
permultis ab exercitûs parte contra eos missâ,
direptis reliquis atque domo expulsis, unde illi
cum conjugibus ac liberis fame & frigore con-
flictari inter asperrimos montes, nivesque per-
petuas jamdiu coacti sunt, rumore & vicinis
undique ex locis creberrimis literis ac nuntiis
cognovisse vos jamdudum existimamus. Qua
autem animi commotione, quo sensu fraternæ
calamitatis hæc vos affecerint facilè ex dolore
nostro qui certe est gravissimus intelligere vide-
mur. Qui enim eodem religionis vinculo, con-
juncti sumus, quidni iisdem plane affectibus in
tam gravi atque indigna fratrum nostrarum
commo-

commoveremur. Et vestra quidem in Orthodoxos ubicunque locorum disiectos atque oppressos spectata pietas atque in multis Ecclesiarum difficultatibus & adversis rebus jam sæpe cognita est. Ego certe, nisi me fallit animus, quavis in re potius, quàm studio & charitate erga fratres religionis causâ violatos atque afflictos vinci sustineam : quandoquidem Ecclesiarum salutem atque pacem incolumitati etiam propriæ libens prætulero. Quod igitur hætenus potuimus, ad *Sabaudia Ducem* scripsimus; suppliciter penè rogantes ut in hos homines innocentissimos & subditos & supplices suos placatiorem animum ac voluntatem suscipiat, suas sedes atque fortunas miseris reddat, pristinam etiam in religione libertatem concedat. Scripsimus præterea ad summos *Protestantium* Principes & Magistratus, ad quos hæc maximè pertinere iudicavimus, ut in *Sabaudio Duce* exorando suam conferre operam nobiscum unâ velint. Hæc eadem, & plura forsitan vos quoque fecistis. Nam exemplum hoc tam periculosum, & instaurata nuper in Reformatos tanta crudelitas si auctoribus benè cedat, quantum in discrimen adducta religio sit vestram commonefacere prudentiam nihil attinet. Et is quidem si flecti nostris omnium precibus & exorari se passus erit præclarum nos atque uberem suscepti huius laboris fructum ac præmium reportabimus. Sin ea in sententia perstiterit, ut apud quos nostra Religio vel ab ipsis Evangelii primis Doctoribus tradita per manus & incorruptè

fervata , vel multo antè quàm apud cæteras Gentes sinceritati pristinæ restituta est , eos ad summam desperationem redactos , deletos funditus ac perditos velit , paratos nos esse commune aliquod vobiscum cæterisque *Reformatis* Fratribus ac sociis consilium capere , quo & saluti pereuntium iustorum consulere commo- dissimè queamus , & is demum sentiat Ortho- doxorum injurias atque misérias tam graves non posse nos negligere. *Valete.*

Civitatibus Helvetiorum Evan- gelicis.

NON dubitamus quin ad aures vestras ali- quanto citius quàm ad nostra illa nuper calamitas pervenerit *Alpinorum* hominum re- ligionem nostram profitentium , qui *Sabaudia Ducis* in fide ac ditione cùm sint , sui Principis edicto patriis sedibus emigrare jussi ni intra tri- dum satisdedissent , se *Romanam* Religionem suscepturos , mox armis petiti & ab exercitu *Ducis* sui occisis , etiam permultis in exilium ejecti , nunc sine lare , sine tecto , nudi , spo- liati , afflicti , fame & frigore moribundi , per montes desertos atque nives cum conjugibus ac liberis miserrimè vagantur. Multo est minus cur dubitemus quin hæc , ut primum vobis nun- tiata sunt pari atque nos tantarum misèriarum sensu eoque fortasse graviore quo illorum fini- bus propiores estis , dolore affecerint. Vestrum enim

enim in primis Orthodoxæ fidei studium egregium summamque in eâ cum retinendâ constantiani tum defendendâ fortitudinem abundè novimus. Cum itaque religionis arctissimâ communionem Fratres, vel potius unum corpus cum his miseris vos pariter nobiscum sitis, cujus membrum nullum affligi sine sensu, sine dolore, sine detrimento atque periculo reliquorum potest, scribendum ad vos hac de re & significandum censuimus quanti nostrum omnium interesse arbitremur, ut Fratres nostros ejectos atque inopes communi ope atque auxilio, quoad fieri potest, jüvemus & consolemur; nec eorum tantummodo malis & miseriis removendis, verum etiam nequid serpat latius nequid periculi exemplo atque eventu vel nobis omnibus creari possit, maturè prospiciamus. Literas nos quidem ad *Sabaudia Ducem* scripsimus, quibus uti cum Subditis suis fidelissimis pro clementiâ suâ lenius agat, eosque jam prope perditos suis sedibus ac bonis restituat, vehementer petivimus. Et his quidem nostris, vel nostrum potius omnium conjunctis precibus, exoratum iri Principem Serenissimum quodque ab eo tanto opere petivimus, facile concessurum speramus. Sin illi in mentem secùs venerit, communicare vobiscum consilia parati sumus, qua potissimum ratione oppressos tot injuriis atque vexatos innocentissimos homines, nobisque charissimos in *Christo* fratres sublevare atque erigere, & ab interitu certissimo atque indignissimo conservare possimus.

Quo-

Quorum salutem atque incolumitatem pro vestra pietate vobis quam maxime cordi esse confido: Ego eam certe vel gravissimis meis rationibus, immò incolumitati propriâ potiorē habendam esse existimem. Valete.

Westmonasterio. May 19. 1655.

O. P.

Superscript.

Illustribus atque Amplissimis Dominis, Helveticorum Pagorum Protestantium & Confœderatarum Civitatum Consulibus ac Senatoribus

SALUTEM.



Serenissimo Potentissimoque Principi

L U D O V I C O

Galliæ Regi.

Serenissime Potentissimeque Rex,

EX Literis Majestatis Vestræ, quibus illa ad meas *quinto & vigesimo Maii* proximi datas rescribit, faciliè intelligo nequaquam fefellisse me eam opinionem, quâ mihi quidem persuasum erat, cædes illas immanissimas, barbaramque eorum hominum stragem, qui Religio-

E

nem

nem Reformatam in *Sabaudia* profitentur, à cohortibus quibusdam vestris factam, neque jussu vestro neque mandato accidisse. Quæ quantum Majestati vestræ displicuerit, id vos vestris militum Tribunis, qui hæc tam inhumana suo solo impetu injussi perpetraverant, ita maturè significasse, deque tanta crudelitate *Ducem* ipsum *Sabaudia* monuisse, pro reducendis denique istis miseris exulibus unde pulsi sunt, vestram omnem gratiam, necessitudinem, auctoritatem tanta cum fide atque humanitate interposuisse, majorem equidem in modum sum lætatus. Ea nempe spes erat, illum Principem voluntati ac precibus Majestatis vestræ aliquid saltem hac in re fuisse concessurum. Verùm cum neque vestro, neque aliorum Principum rogatu atque instantiâ in Miserorum causa quicquam esse impetratum perspiciam, haud alienum ab officio meo duxi, ut hunc nobilem virum extraordinarii nostri Commissarii munere instructum ad *Allobrogum Ducem* mitterem; qui tantæ crudelitatis in ejusdem nobiscum Religionis cultores, idque ipsius Religionis odio adhibitæ, quo sensu afficiar, uberius eidem exponat. Atque hujus quidem Legationis eo feliciorem exitum speravero, si adhibere denuò & adhuc majore cum instantiâ suam auctoritatem atque operam Majestati Vestræ placuerit; & quemadmodum fideles fore illos inopes dictoque audientes Principi suo ipsa in se recepit, ita velit eorundem incolumitati atque salutis cavere, ne quid his hujusmodi injuriæ & calamitatis atrocissimæ

in-

innocentibus & pacatis deinceps inferatur. Hoc cum in se justum ac verè regium sit, nec non benignitati vestræ atque clementiæ, quæ tot subditos vestros eandem illam Religionem sequentes ubique salvos & incolumes præstat, summè consentaneum, à Majestate Vestra, ut par est, non possumus quin expectemus. Quæ hâc simul operâ, cum universos per sua Regna *Protestantes*, quorum studium erga vos summaque fides maximis in rebus perspecta jam sæpe & cognita est, arctiùs sibi devinxerit, tum exteris etiam omnibus persuasum reddiderit, nihil ad hoc facinus contulisse Regis consilium, quicquid Ministri Regii atque Præfecti contulerunt. Præsertim si Majestas Vestra pœnas ab iis Ducibus ac Ministros debitas repetiverit, qui authoritate propria, suaque pro libidine tam immania patrare scelera sunt ausi. Interea cum Majestas Vestra factum hoc inhumanissimum, quo dignum est odio, averfari se testetur, non dubito quin miseris illis atque ærumnosis ad vos confugientibus, tutissimum in Regno suo receptum atque perfugium sit præbitura; nec Subditorum suorum cuiquam, ut contra eos *Duci Allobrogum* auxilio adsit, permissura. Extremum illud est, ut Majestatem Vestram, quanti apud me sua amicitia sit, certiore faciam: Cujus rei neque fidem neque fructum ullo tempore defuturum confirmo

Majestatis Vestrae Studiosissimus

OLIVERIUS Prot. Reip. Angliæ &c.

Albâ Aulâ. Julii 29. 1655.

E 2

Emi.

Eminentissimo Domino
CARDINALI MAZZARINO.

Eminentissime Domine Cardinalis,

CUM nobilem hunc virum cum literis, quarum exemplar hic inclusum est, ad Regem mittere necessarium statuissem, tum ei, ut Eminentiam vestram meo nomine saluaret, simul in mandatis dedi; certasque res vobiscum communicandas ejus fidei commisi: Quibus in rebus Eminentiam rogo vestram, uti summam ei fidem habere velit, utpote in quo Ego summam fiduciam reposuerim.

Eminentia vestra studiosissimus

OLIVERIUS Protector Reipublicæ
 Angliæ.

Abâ Aulâ. Julii. 29.

1655.

OLIVERIUS Protector Reip.
Angliæ

Serenissimo Principi

FREDERICO III.
Daniæ, Norwegiæ &c. Regi

SALUTEM.

QUam severo nuper , & inclementi edicto *Allobrugum* Dux *Immanuel* suos ipse Subditos *Alpinarum Vallium* incolas , innoxios homines & religionis cultu purioris jam multis ab sæculis notos ac celebres , religionis causâ finibus patriis exegerit , & , occisis permultis , reliquos per illa desertissima loca malis omnibus & miseriis inopes ac nudos exposuerit , & audisse jamdudum arbitramur Majestatem Vestram , & gravissimum ex ea re , prout tantum *Reformatæ Fidei* Defensorem ac Principem decuit , dolorem percepisse. Siquidem pro institutis *Christianæ Religionis* quæ mala atque miseria pars aliqua nostrorum patitur , earum sensu penitus eodem tangi omnes debemus ; & sanè omnibus nobis & universo *Protestantium* nomini hujus facti eventus atque exemplum , quid periculi ostendat , nemo Vestræ Majestate , si nos ejus pietatem atque prudentiam rectè novimus , melius videt. Scripsimus
E 3 itaque

itaque libenter , ut quem dolorem ob hanc Fratrum innocentissimorum calamitatem , quam sententiam , quod judicium de re totâ vestrum esse speramus , idem planè & nostrum esse significemus. Itaque ad *Ducem Sabaudia* literas dedimus , in quibus uti miseris atque supplicibus parcat , illudque atrox edictum porro esse ratum ne sinat , magnopere ab eo petivimus. Quod si Majestas Vestra , cæterique *Reformatorum* principes fecerint , ut jam fecisse credimus , spes est leniri posse Serenissimi Ducis animum , & hanc iram suam tot saltem vicinorum Principum intercessionem atque instantiâ condonaturum ; sin perseverare in instituto suo maluerit , paratos nos esse testamur cum Majestate Vestra , cæterisque Religionis Reformatæ sociis eam inire rationem quâ tot miserorum hominum subvenire quamprimum inopiæ , providere salutis ac libertati pro virili parte nostra possumus. Vestræ interea Majestati bona omnia atque fausta à Deo Opt. Max. precamur.

Westmonasterio. Maii

1655.

OLIVERIUS Protector Reip.
Angliæ &c.

Amplissimis Consulibus & Senatoribus Civitatis Genevensis

SALUTEM.

Summum dolorem nostrum quem ex maximis & inauditis *Protestantium* calamitatibus *Valles* quasdam *Pedemontanas* incolentium percipimus quos *Allobrogum Dux* tanta crudelitate persequutus est jampridem vobis exposuissimus, nisi id magis operam dedissemus ut eodem tempore intelligeretis tantis eorum miseriis non affici nos solum, verum etiam de sublevandis iis atque solandis, quantum in nobis est prospicere. Quapropter *Elemosynas* per hanc totam *Reipublicam* colligendas curavimus: quas ejusmodi fore haud immerito expectamus, quæ nationis hujus affectu et erga fratres suos tam immania perpeſſos demonstrare possint & quemadmodum religionis eadem utrinque communio est, ita sensum quoque eundem calamitatum esse; interea dum pecuniæ collectio maturatur, quod sine spatio temporis fieri nequit, & miserorum istorum egestas atque inopia pati moram non potest, necessarium duximus duo millia librarum Anglicarum quanta fieri potuit celeritate

præmittete inter eos distribuenda qui præsentissimâ ope atque solatio indigere maximè videntur. Cum autem nescii non simus innocentissimorum hominum miseriæ atque injuriæ quantopere vos affecerint nec vobis quicquam labori aut molestiæ fore quod illis adjumento atque auxilio esse possit, prædictam pecuniæ summam illis calamitosis curandam ac numerandam ad vos transferre non dubitavimus; idque vobis negotii dare, ut pro vestrà pietate ac prudentiâ providere velitis qua ratione æquissimâ quam primum illa pecunia egentissimis quibusque distribui queat, ut quamvis summa sane exigua sit, aliquid tamen sit saltem quo illi inopes recreari ac refici in præsens aliquantum possint, donec uberiores iis copiam suppeditare poterimus: vos hanc vobis datam molestiam æqui bonique consulturos esse cum non dubitemus tum etiam Deum Opt. Max. oramus uti populo suo Religionem orthodoxam profitenti det animum sui in commune defendendi, sibi que inmutuò opem ferendi contra hostes suos immanissimos; quâ in re nostram quoque operam Ecclesiæ utcunque usui fore lætaremur.

Valete.

Mille quingentæ Libræ de prædictis bis millibus à *Gerardo Hensh* Parisiis, quingentæ reliquæ per literas à Domino *Stoupio* curabuntur.

Junii 8. 1655.

OLIVERIUS Protector Reip.
Angliæ

Serenissimo Principi

VENETIARUM DUCI.

Serenissime Princeps,

CUM rebus vestris omnibus contra hostem præsertim Christiani nominis prospere gestis lætari semper consuevimus, tum & illo navalis prælii novissimo successu nequaquam sanè dolemus, quamvis id aliquo nostrorum cum detrimento accidisse intelligamus. Ostenderunt enim nobis per libellum supplicem Negotiatores Quidam nostri *Gulielmus & Daniel Gulielmi* nec non *Edoardus Bealus* navem suam, cui nomen *Princeps magnus*, *Constantinopolim* ab se commercii causâ missam nuper fuisse; eam navem ab aulæ *Turcicæ* ministris ad commeatum & milites in Cretam insulam deportandos retentam, dum in illa classe *Turcarum* coacta conavigaret quæ à classe *Venetorum* oppugnata in itinere & superata est, captam & *Venetias* abductam, ab maritimarum causarum judicibus adjudicatam publico fuisse. Cum itaque inscipientibus dominis & nullo modo probantibus navis illa *Turcis* operam dare invitissima coacta sit, seque ex eâ pugnâ explicare militibus referta non potuerit, Serenitatem Vestram magno-

E. S.

pere

pere rogamus , ut sententiam illam maritimæ curiæ velit nostræ amicitie condonare , navemque illam suis dominis , de Vestra Republica nullo suo facto malè meritis , restituendam curare. Quâ in re impetranda nobis præsertim petentibus , cum mercatores ipsos de vestrâ clementiâ benè sperare videamus nos utique de ea dubitare non debemus : qui & præclara vestra consilia remque *Venetam* terrâ marique maxima uti pergat fortunare Deus omnipotens ex animo optamus.

Serenitatis vestra Venetaque Reip.

Studiosissimus

OLIVERIUS Protector Reipub.
Angliæ &c.

Westmonasterio. Decemb.
1655.

OLIVERIUS Protector Reip.
Angliæ &c.

Serenissimo Principi

L U D O V I C O
Galliarum Regi.

Serenissime Rex,

Mercatores aliquot nostrates , quorum nomina sunt *Samuel Mico* , *Gulielmus Cocai-*
nus ,

nus, Georgius Poynerus, aliique complures per
 libellum supplicem nobis ostenderunt se anno
 1650. in navem quandam, cui insigne *Unicor-*
nus erat, permagnas rationes suas contulisse:
 eam navem bombyce, oleo aliisque mercibus
 onustam, quæ, plus minus, triginta quatuor mil-
 libus librarum nostrarum ab iisdem æstimata
 sunt, ab nave prætoriâ, & proprætoria *Maje-*
statis Vestrae in *Mediterraneo Mari Orientali* op-
 pressam atque captam fuisse: nostros autem illa
 in navi, propterea quod nobis eo tempore cum
Gallis illibata pax erat, cum contra naves regias
 vi se defendere nolissent, promissis *Pauli &*
Terrerii Navarchorum inductos, qui velle se
 nostros dimittere ajebant, prolatis onerum li-
 bellis, maritimis legibus paruisse: Mercatores
 proinde suprâ dictos procuratorem suum, qui
 navem illam ac bona restituenda sibi peteret, in
Galliam misisse: ibi post triennium eoque am-
 plius consumptum, cum ad sententiam de re-
 stitutione ferendam perventum jam esset, *Car-*
dinalis Mazarini Eminentiam eorum procura-
 tori *Hugoni Morello* factam mercatoribus istis
 injuriam agnovisse; datumque iri satisfactio-
 nem, ut primùm confirmata pax inter utrumque
 gentem, foedusque, quod tum agitabatur,
 confectum atque ratum esset, in se recepisse:
 immò recentius *Majestatis Vestrae* apud nos *Le-*
gatum Excellentiss. Dominum de Bordeaux ex
 mandato vestro vestrique Concilii, disertis
 verbis confirmasse, hujus navis atque bonorum
 peculiari exceptione habitum iri rationem,

etiam seorsim ab iis controversiis , de quibus in commune decidendis ex fœdere provisum est: hujus promissi Legatum ipsum , quî nunc percommode negotiorum quorundam suorum causâ ad vos transmeavit , testem esse posse locupletem. Quæ cum ita sint , jussque horum mercatorum in repetendis rebus suis tam præclare constet, à Majestate Vestrà majorem in modum petimus , ut in eo obtinendo nulla iis moradiutius afferatur , velitque nostro rogatu has nobis redintegratæ amicitiae & instaurati recens fœderis esse primitias. Quod & fore confidimus, vobisque fausta omnia vestroque regno à Deo Opt. Max. precamur.

Majestatis vestrae studiosissimus

OLIVERIUS Protector Reipub.
Angliæ &c.

Westminsterio. Decemb.

1655.

Civitatis

HELVETIORUM
Euangelicis.

EX vestris ad nos tam actis publicis per Commissarios nostros *Genevâ* transmissis, quàm literis 27. *Decembris Tyguri* datis, quo in locores vestræ sint, cum non sint optimo, satis superque intelligimus: In quo etsi pacem vestram, tamque diuturnum Sociale fœdus ruptum

tum dolemus , tamen cum id vestrâ culpâ nequaquam accidisse appareat , novam hinc vobis ex Adversariorum iniquitate & pertinacia illustrandæ fortitudinis , constantiæque vestræ in *Evangelica* fide jam olim cognitæ parari rursus materiem confidimus. Nam *Suitenses* , qui Religionem nostram si quis amplectatur , Capitale censent , quid moliantur , quibus hortatoribus tam hostiles Spiritus in *Orthodoxam Religionem* susceperint , latere neminem potest , cui modò indignissima illa fratrum nostrorum in *Pedemontio* facta strages animo nondum excidit. Quapropter , Dilectissimi Amici , quod soletis esse , aspirante Deo fortes estote ; jura vestra atque fœdera , immo conscientiæ libertatem , Religionemque ipsam idolorum cultoribus obculcandam concedere nolite ; vosque ita parate ut non propriæ duntaxat libertatis atque salutis propugnatores esse videamini , sed ut fratribus quoque vicinis , *Pedemontanis* presertim illis ærumnosissimis , quibus potestis rebus , opitulari atque adesse possitis : hoc certò persuasi per illorum corpora ac necesse ad vestra latera illum nuper adiutum fuisse patefactum. De me Scitote , incolumitatem vestram resque prosperas non minùs mihi curæ ac sollicitudini esse quàm si in hac nostra Rep. coortum hoc incendium , quam si in nostras cervices expeditæ *Suitensium* secures illæ (sicuti reverâ sunt in omnes Reformatos) strictique enses essent. Ut primum itaque à vobis de statu rerum vestrarum , & obstinato Hostium animo certiores facti sumus , adhibitis in Con-

filium viris quibusdam honestissimis & Ecclesiæ aliquot Ministris pietate spectatissimis, de subsidio vobis mittendo, quantum quidem rationes nostræ in præsentia ferre possunt, ea decrevimus, quæ Commissarius noster *Pellus* vobiscum communicabit. De cætero vestra omnia consilia causamque imprimis hanc vestram iustissimam sive pace sive Bello tuendam, Deo Opt. Max. fautori commendare non desinimus.

*Vestrarum Amplitudinum ac Dignitatum
Studiofissimus*

OLIVERIUS Protector Reip.
Angliæ &c.

Westminsterio.

Jan. 1655.

OLIVERIUS Protector Reip.
Angliæ &c.

Serenissimo Principi

CAROLO GUSTAVO

Dei Gratia Suecorum, Gothorum,
Vandalorumque Regi, Magno
Principi Finlandiæ &c.

Serenissime Rex,

Cum amicorum inter se mutua omnia, tam
adversa quam prospera, atque communia de-

debere esse nemo non intelligat , quòd jucundissimam amicitiae partem Majestas Vestra , gaudium nempe suum impertitum nobis per suas literas voluerit , non potest id quidem nobis non esse longè gratissimum : quandoquidem & hoc singularis indicium humanitatis Vereque Regia est , ut nec vivere , ita ne gaudere quidem sibi soli velle nisi amicos quoque & foederatos eadem , quâ se , lætitiâ affectos esse sentiat. Itaque Regi tam præstanti & natum esse Filium Principem , quem Paternæ virtutis atque gloriæ speremus hæredem , meritò gaudemus , & idem quod Regi olim fortissimo , *Philippo Macedoni* sive felicitatis sive decoris domi simul & foris contigisse gratulamur : Cui eodem tempore & natus *Alexander* filius , & *Illyricorum* gens potentissima subacta memoratur. Nam & *Polonia Regnum* vestris armis ab imperio *Pisano* quasi cornu quoddam avulsum & cum *Duce Brandenburgico* pax piorum votis omnium exoptata , freudentibus licet adversariis , facta , quin ad Ecclesiæ pacem atque fructum permagnum sit momentum habitura non dubitamus. Det modò finem Deus tam præclaris initiis dignum ; det modò filium , virtute , pietate , rebusque gestis patri similem : id quod & auguramur sanè & à Deo Opt. Max. tam vestris rebus jam antè propitio , ex animo precamur

Majestatis Vestra Studiosissimus

OLIVERIUS Prot. Reip. Angliæ &c.

Westmonasterio. Feb. 1655.

DA.

D A N I Æ R E G I.

Serenissime ac Potentissime Princeps ,

Questi sunt per libellum supplicem suo aliorumque mercatorum *Londinensium* nomine nobis exhibitum *Joannes Fremannus & Philippus Travsfus* hujus Reip. cives , se circiter mensem *Octobris* 1653. cum in navem quandam *Sunderburgensem* , cui nomen *Salvatori* , *Nicolao Weinshinks* magistro , merces varias , pannum laneum , aliamque vestem textilem ac mercimonia plus tribus millibus librarum æstimata imposuissent , magistro mandasse , ut per *Fretum Balticum* recto cursu *Dantiscum* navigaret utque ad *Elfenoram* vectigal solveret , eique etiam pecuniam ad eam rem curasse : supradictum tamen magistrum perfidiosè , & contrà quàm ipsi à mercatoribus mandatum erat , prætervectum *Elfenoram* nullo portorio soluto *Balticum* pernavigasse. Navisque per hanc causam cum toto onere non sine magno mercatorum damno publicata atque retenta est. Quorum in gratiam jampridem ad Legatum Majestatis vestræ *Londini* tunc temporis commorantem scripsimus ; qui , ut ipsi ajunt , pollicitus est , ut primum ad Majestatem vestram reddiisset , daturum operam , ut ratio mercatorum haberetur. Verum cum is postea aliis in regionibus à Majestatis Vestræ negotia obiret , & ante discessum ejus & postea frustra se cum adiisse ostendunt ; unde procuratorem.

torem suum mittere coacti sunt, qui jus suum
Hafnia persequeretur, navemque illam ac bona
 liberari, sibi que reddi flagiraret: verum exinde
 nullum se fructum percepisse, nisi ut ad damna
 vetera novas impensas, & Susceptum frustra la-
 bore adjungerent: cum fisco damnata, &
 retenta haectenus sint bona, tametsi ex lege *Dan-*
iae, quemadmodum ipsi in libello suo demon-
 strant, magister quidem navis ob suum delictum
 est ipse puniendus, navisque, non bona, proscrip-
 tionis sunt obnoxia: eoque gravius accidisse sibi
 hoc malum existimant, quod, sicuti nobis
 perlatum est, vectigal illud quod *Elfenora* sol-
 vere debuisset est admodum exiguum. Qua-
 propter, cum mercatores nostri nullam pro-
 scriptionis causam praebuisse videantur, confes-
 susque ipse magister paulo ante obitum sit, suo
 solum delicto illatum hoc mercatoribus detri-
 mentum esse, cumque Pater defuncti jam ma-
 gistri ipse per libellum supplicem Majestati Ve-
 strae exhibitum, sicuti nos accepimus, culpam
 omnem in filium suum contulerit, mercatores
 absolverit, haud sane potuimus quin navis illius
 bonorumque retentionem iniquissimam esse
 arbitraremur; adeoque confidimus, simulatque
 Majestas Vestra hac de re certior facta erit, fore
 ut non modo has ministrorum suorum injurias
 improbet, verum etiam ipsos rationem red-
 dere, bonaque illa suis Dominis eorumve pro-
 curatoribus quamprimum restitui damnaque
 inde data sarciri jubeat. Quod & nos à Majestate
 vestra majorem in modum petimus, utpote
 rem

rem usque adeo æquam & rationi consentaneam , ut æquiores petere aut expectare in causa tam justa nostrorum civium non posse videamur , haud minus æqua vestris subditis , quoties data occasio erit , reddituri.

Serenissimo Principi

J O A N N I Q U A R T O

Lusitaniæ &c Regi.

Serenissime Rex,

QUam pacem & amicitiam cum *Anglicanâ Republicâ* Majestas vestra , Legatione amplissimâ ac splendidissimâ jampridem ad nos missâ , expetivit , eam à Parlamento , quæ tum potestas rebus præfuit , inchoatam , & à nobis summo semper studio exoptatam , Deo imprimis favente , proque eâ quam accepimus Reipublicæ administratione , feliciter tandem contecimus , & in perpetuum , uti spes est , sanximus. Itaque Legatum vestrum extraordinarium Dominum *Joannem Rodericum de Sia Meneses* , Comitem *Pennagniadunum* , virum cum Majestatis vestræ judicio comprobatum , tum humanitate , ingenio , prudentiâ , fide præstantissimum à nobis repertum , cum expleti muneris egregiâ laude , & reportatâ secum pace , vobis reddimus. Quòd autem per literas secundo die *Aprilis Ulyssipone* datas , Majestas vestra

vestra quanti nos faciat quainque impensè dignitati nostræ faveat , nosque Rempubicam suscepisse gubernandam quantopere lætata sit , haud obscuris indiciis singularis benevolentiae testatur , id vero mihi gratissimum esse , ex meis in Majestatem vestram paratissimis omni tempore officiis , dabo operam ut facilè posthac omnes intelligant. Neque segniùs interea pro incolumitate vestrà , vestrique regni felici statu, rerumque prospero successu conceptis ad Deum precibus contendo.

Majestatis Vestrae Studiosissimus

OLIVERIUS Reipub. Angliæ,
Scotiæ, Hybernæ, &c. Protector.

OLIVERIUS Protector Reip.
Angliæ &c.

Excelsis & Præpotentibus

FOEDERATI BELGII
Ordinibus
S. D.

*Excelsi & Præpotentes Domini, amici
charissimi,*

O Stendunt nobis mercatores quidam, cives nostri *Thomas Busselus, Richardus Bearus* aliique socii navem quandam suam *Edmundi & Ioannis* nomine insignitam dum ab ora *Brasili-
liana*

Liana Olyssiponem contenderet ab navi quadam prædatoria *Flissingensi* cui nomen *Rubro Leoni*, Magister *Lambertus Bartelssonus*, oppugnatam se dedidisse; verum ea lege & pacto (id quod ipsum *Lamberti* chirographum obsignatum testabitur) ut navis, & quæcunque in illa fuissent *Anglorum* bona, *Flissingæ* restituerentur: eò cum appulsum est, navem quidem & nauticorum peculia reddita, mercatorum *Anglicorum* bona adempta eorumque auctionem statim esse factam: se mercatores nempe quibus hoc damni datum est, cum in foro *Flissingensium* suas res repeterent, iniquissima sententia lata, litem cum grandibus impensis post quinquennium perdidisse, ab iis nimirum iudicibus adjudicatam, quorum nonnulli cum in illa navi prædatoria suas rationes collatas habuissent; & iudices & adversarii & rei simulerant: nihil jam sibi superesse spei nisi in vestra æquitate & incorrupta fide, ad quam nunc demum confugiunt: eam sibi fore propensiores existimarunt, si nostra commendatio accessisset. Et hominibus condonandum hoc sane est, si in hac tanta fortunarum suarum dimicatione omnia timentibus, quid ab summa auctoritate atque potentia vestra sibi metuendum, quam quid apud integros præsertim iudices de sua causa sit bene sperandum sapius in mentem veniat: nos quin religionè, justitiâ, integritate vestrâ potius quam rogatu nostro adducti, quod æquum, quod justum, quod vobis denique dignum est iudicaturi sitis, non dubitamus. Deus vos vestramque Rempub. ad
glo-

gloriam tuam, suæque Ecclesiæ præsidium conservet.

OLIVERIUS Protector Reip.
Angliæ &c.

Westmonasterio. April. 1.
1656.

OLIVERIUS Protector Reip.
Angliæ, &c.

Serenissimo Principi

CAROLO GUSTAVO

*Suecorum, Gothorum, Vandalorumque
Regi, Magno Principi Finlandiæ,
Duci Esthonia, Carelia, Brema,
Verda, Stetini, Pomerania, Cassubia
& Vandalia, Principi Rugiæ, Do-
mino Ingriæ, VVissmaria, necnon
Comiti Palatino Rheni, Bavaria,
Jul. Clivia & Montium Duci &c.*

Serenissime Princeps,

Perfunctus Legatione suâ apud nos *Petrus
Julius Coictus*, atque ita perfunctus ut suâ
debitâ laude non inornatus à nobis dimittendus
sit, ad Majestatem vestram revertitur. Fuit
enim

enim cùm vestro præcipuè nomine, quod jure apud nos plurimi esse debet, nobis gratissimus, tum suo etiam merito, suo nempe munere diligentissimè obito, haud parum acceptus. Quam igitur commendationem vestram de eo accepimus, eam (siquid ad eam accedere testimonio ullo potest) & ab ipso impletam, & à vobis meritissimè datam, libentes utique testamur: quemadmodum & is poterit nostrum erga Majestatem Vestram singulare studium & observantiam, eâdem fide atque integritate ad vos referre, verissimeque exponere. Extremum illud est ut Majestati vestræ felicitatem omnem victoriarumque cursum contra omnes Hostes Ecclesiæ perpetuum, à Deo Opt. Maximoque optemus.

Majestatis Vestrae Studiosissimus

OLIVERIUS Protector Reip.
Angliæ &c.

Westmonasterio. April. 17.
1656.

OLIVERIUS Protector Reip.
Angliæ &c.

Serenissimo ac Potentissimo Principi

L U D O V I C O

Galliæ Regi.

S. D.

Serenissime Princeps,

A Dierunt ad nos per libellum supplicem,
Joannes Dethic urbis *Londini* in hunc annum
præfectus, & *Gulielmus Wakefield* Mercator,
conquesti, se anno 1649. *calendas* circiter *Octob.*
navem quandam cui nomen *Jona Londinensi*,
Jona quoque cognomento *Lighthaghe* Magistro,
suis mercibus, quæ *Ostendam* mitterentur, onera-
rasse: eam navem à prædone quodam *Barkin-*
gensis, cui nomen *White* (is filii Regis *Caroli*
defuncti nomine piraticam faciebat) in ipso
Thamesis ostio oppressam atque inde *Dunkirkam*,
quæ eo tempore in ditione *Gallorum* erat, fuisse
abductam; cum autem edicto Majestatis Ve-
stræ an. 1647. & an. rursus 1649. aliquot etiam
consilii Regii decretis, in gratiam *Parlamentis*
Anglicani, cautum esse intelligerent; ne naves
ullæ aut merces, illius belli tempore, quoquo
obtentu *Anglis* creptæ, in Majestatis Vestræ
portus quoscunque asportarentur, venalesve
essent,

essent, misisse festatim *Dunkirkam* procuratorem suum *Hugonem Morellum* negotiatorem, qui à Domino *Lestrado* illius oppidi per id tempus præfæcto, reddi sibi suam navem cum mercibus postularet, cum eas præsertim magnâ ex parte adhuc integras, neque dum permutatas aut divenditas, in ipso oppido deprehendisset; respondit Præfectus, se Regis *Gallia* dño, ob navatam Reipub. operam, præfecturam eam accepisse; curaturum proinde, uti ea sibi pretium operæ sit. Hoc responso frustratus, post magnum cum temporis tum pecuniæ dispendium, procurator domum revertitur. Petitores, quæ restat sibi spes, eam in vestra sola clementiâ atque justitia repositam esse vident; ad quam per nostras literas faciliorem sibi adiutum fore crediderunt: ea ne desit hominibus contra jus omne; & repetitâ vestrâ interdictâ spoliatis, rogamus. Quod tamen si impetrabimus, quandoquidem hoc sanè æquissimum videtur, ab insitâ æquitate vestrâ, potius quam rogatu nostro, impetratum id esse statuemus.

Majestatis Vestra Studiossimus

OLIVERIUS Protector Reip.
Angliæ &c.

Westmonasterio. Maii
1656.

OLIVERIUS Protector Reip.
Angliæ &c.

Excelsis & Præpotentibus Dominis

FOEDERATI BELGII
Ordinibus

S. D.

*Excelsi & præpotentes Domini, amici
charissimi,*

DEmonstrarunt nobis per libellum supplicem
*Joannes Brunus, Nicolaus Gulielmus, alii-
que Londinenses, se, cum in navem, cui Bona
Esperantza Londinensi nomen inditum erat, in
Orientalem Indiam navigaturam, sortem quis-
que suam contulisset, procuratori suo nego-
tium dedisse Februario mense 1644. ut bis mille
quadringentas libras Belgicas ad illius navis pe-
riculum præstandum Amsterodami curaret: ea
navis cum in itinere ad oram ipsam India ab
Hollandica quadam, quæ ex navibus Orientalis
illius societatis erat, capta esset; qui præstando
periculo se obligaverant pactam pecuniam nu-
merare recusasse; & sextum jam annum posse
nostros, qui summa cum assiduitate maximisque
impensis jus suum persecuti sunt, dilationibus
variis eludere. Quod cum petitoribus grave ad-
modum atque iniquum videatur, & nonnulli*

F

cx

ex iis qui se obligarunt vel jam diem obierint vel solvendo non sint , nequid fortè ad priora damna summi discriminis accedat , magnopere à vobis petimus , ut per tot annos in foro jactatis ac proprè naufragis istis vestram æquitatem portum esse atque perfugium velitis ; utque de causa sua , quam illi justissimam esse confidunt , primo quoque tempore judicium fiat. Vobis interim omnia ad Dei gloriam Ecclesiæque præsidium faustè atque feliciter evenire volumus.

Excelsarum & præpotentium Dominationum vestrarum Studiosissimus

OLIVERIUS Protector Reipub.
Angliæ, &c.

Westmonasterio. Maii

1656.

OLIVERIUS Protector Reip.
Angliæ &c.

Excelsis & Præpotentibus Dominis

FOEDERATI BELGII
Ordinibus

S. D.

*Excelsis & Præpotentes Domini, amici
charissimi ,*

COnqueruntur apud nos graviter iidem , de quibus antea circa idus Septemb. superioris anni

anni literas ad vos dedimus, *Thomas & Gulielmus Lower* defuncti *Nicolai Lower* hæredes legitimi, se adversariorum suorum sive gratiâ sive opibus oppressos, quamvis causa sua imprimis optima, &, cum id satis non esset, literis etiam nostris ter deinceps commendati fuissent, impetrare hætenus nullo modo posse ut relictam testamento hæreditatem adire sibi liceat: Ab *Hollandia* foro ubi primum actio instituta erat vestram ad Curiam rejehti, inde in *Zelandiam* transmissi, (quæ tria in loca totidem nostras literas attulerunt) ab *Zelandia* nunc rursus ad vestrum summum judicium haud inviti remittuntur: ubi enim potestas summa est, ibi æquitatem quoque summam esse sperant: si ea spes fallat, elusi atque irriti, post hanc tantam juris obtinendi causâ concursationem suam, quem demum consistendi locum habituri sint, nesciunt: nam de literis nostris, si his jam quartis nos viderint nihil proficere, non est ut in posterum quicquam sibi polliceantur. Nobis certe gratissimum erit si post tot rejectiones, facto sine mora judicio, hæredes plurimum quidem in æquitate atque justitiâ vestrâ, aliquid etiam in authoritate apud vos nostrâ præsidii sibi fuisse intellexerint. Quorum de altero non dubitamus, alterum vel amicitiae nostræ daturos vos esse confidimus.

*Excelsarum & Præpotentum Dominationum
Vestrarum Studiosissimus*

OLIVERIUS Prot. Reip. Angliæ &c.
Westmonasterio. Maii 1656.

OLIVERIUS Protector Reip.
Angliæ &c.

Serenissimo Principi

J O A N N I
Lusitaniæ Regi.

Serenissime Rex,

CUM mercatoribus quibusdam *Anglis* à nonnullis mercatoribus *Lusitanis* ex societate *Brasiliensi* vecturæ commorationisque nomine *An. 1649. & 1650.* grandis pecunia debeatur, quæ pecunia à supradictâ societate jussu Majestatis Vestræ retinetur, expectabant quidem dicti mercatores uti ea pecunia ex conditionibus proximi fœderis jampridem sibi numerata esset. Verùm ne amputetur sibi spes omnis ac ratio recuperandi sua debita verentur, ex quo intelligunt statuisse Majestatem Vestram ut quam pecuniam *Brasiliensis* societas ipsis debuisset, in ærarium vestrum inferretur, utque portorii dimidia pars solvendis iis debitis impenderetur; atque hoc pacto mercatores legitimum duntaxat lucrum, siue fœnus pecuniæ suæ accepturi essent; ipsâ sorte interim funditus intereunte. Quod nos nobiscum reputantes quam durum sit, eorumque justissimis precibus victi, has nostras ad Majestatem vestram literas ipsis concessi-

reſſimus : hoc potiffimum à vobis poſtulantē
 uti præſtandum curetis, ut ſupradicta ſocietas
Brasilienſis huius Reipub. Mercatoribus quam-
 primum ſatisfaciat tam de ſummâ pecuniæ cui-
 que eorum debitâ, quam de fœnore quinquen-
 nali : cum hoc & per ſe juſtum ſit, & fœderi
 nuper vobiſcum inito conſentaneum : quod &
 nos eorum nomine à Majeſtate Veſtra peramice
 petimus.

Majeſtatis Veſtrae Studioſiſſimus

OLIVERIUS, Protector Reip.
 Angliæ &c.

Ex Palatio Noſtro Weſtmonaſterio.
die Julii 1656.

OLIVERIUS Protector Reip.
 Angliæ &c.

Sereniſſimo Principi

CAROLO GUSTAVO

*Suecorum, Gothorum, Vandalor-
 umque Regi &c.*

Sereniſſime Rex,

CUM amicitiam Majeſtatis Veſtræ tanti Prin-
 cipis, rebusque geſtis tam clari meritò plu-
 riſſimè faciāmus, tum is cuius opēra fœdus inter
 nos arctiſſimum ſancitum eſt, Illuſtriſſimus Do-
 minus

minus *Christiernus Bondus* Legatus Vester Extraordinarius necesse est gratus nobis & commendabilis hoc nomine imprimis fuerit. Hunc itaque hac Legatione laudatissimè perfunctum non sine summa cæterarum etiam virtutum egregiarum laude ad vos dimittendum censuimus : ut qui antea in pretio apud vos atque honore fuit nunc uberiores assiduitatis atque prudentiæ suæ fructus ex hac nostra commendatione percepisse sentiat. Quæ reliqua transigenda sunt , de iis Legationem brevi mittendam ad Majestatem Vestram decrevimus : quam interim Deus incolumem defendendæ Ecclesiæ suæ Reique *Sueciæ* columen conservet.

Majestatis Vestrae Studiosissimus

OLIVERIUS Protector Reipub.
Angliæ &c.

*Ex Palatio nostro Westmonasterii.
Julii An. Dom. 1656.*

OLIVERIUS Prot. Reip. Angliæ &c.

Serenissimo Principi

L U D O V I C O

Galliæ Regi.

S. D.

Serenissime Rex, Amice ac Fæderate charissime,

DEtulerunt ad nos per libellum supplicem
Mercatores quidam *Londinenses* *Richardus*
Baker

Baker ejusque focii, navem quandam Anglicanam ab se conductam cui nomen vernaculum *The Endeavour* Magister *Gulielmus Joppus*, trecentis atque tredecim vini optimi culeis ex *Tenariffa Insula Londinum* advehendis onustam, dum inter *Palmam* & supradictam *Insulam* cursum teneret, à quatuor navibus *Gallicis*, in speciem quidem onerariis, sed prædatorium in modum armatis, quibus *Ægidius de la Roche* Navarchus erat, primo ac vigesimo Novembris die *An. Dom.* 1655. occupatam fuisse, atque in *Orientalem Indiam*, quo is iter sibi esse prædicabat, cum omni onere ac plerisque nautarum abductam; reliquis quatuordecim ad *Guineam Nigritarum* in littus quoddam expositis. Quod eo consilio *Ægidius* fecisse se dictitabat, nequis eorum ex terra tam longinqua & inhumana forte elapsus testimonio læderet. Fatebatur enim, se neque mandatis instructum, ut *Anglorum* naves caperet, neque alias quas poterat antea cepisse, ut propterea quod inter *Gallos* nostramque *Remp.* per eos ipsos dies convenisse pacem non ignorabat: sed cum in *Portugallia* constitutum sibi esset commeatus accipere, & ab adversis ventis rejectus attingere ea loca non potuisset, coactum se, ad supplendum quæ opus sibi essent, iis uti quæ in ista nave reperisset: credere se proinde, illarum navium dominos de damno satisfacturos. Damnum autem constat supra sedecim mille libras Anglicas, id quod ex juratis testibus facile apparebit, Mercatoribus nostris datum. Verùm si tam levibus de causis temerare acta

principum religiosissima & quasi ludibrio habere negotiatoribus quibuscumque ob sua commodum licuerit, concidet profecto omnis posthac fœderum sanctitas; omnis Principum fides atque authoritas obsolescet, proque nihilo habebitur. Quapropter non rogamus tantum, sed Majestatis Vestrae quam maximè interesse arbitramur, ut qui Regis sui fœdus, jusque jurandum sanctissimum primi omnium tam facile violare sunt ausi, quamprimum dent pœnas tantæ perfidiæ atque audaciæ debitæ; utque illarum interea navium Domini de damno, etiam ipso suorum præjudicio, mercatoribus nostris summam per injuriam illato, satisfaciant. Deus Majestatem Vestram diutissimè conserveat, Remque *Gallicam* contra communem utriusque nostrum hostem tueatur atque sustineat.

Majestatis Vestrae Studiosissimus

O L I V E R I U S Protector Reipub.

Ex Palatio nostro Westmonasterii.

die Augusti An. Domi. 1656.

O L I V E R I U S Protector Reip.

Angliæ

Eminentissimo Domino

CARDINALI MAZZARINO.

Eminentissime Domine,

C Um dandæ mihi literæ ad Regem essent, eandem quoque ad Eminentiam vestram scri-

scribendi occasionem arbitrabar mihi oblatam: cujus enim unius viri prudentia singularis *Gallorum* res maximas, summaque Regni negotia pari fide, consilio, ac vigilantia moderatur, cum celari qua de re scriberem non convenire existimabam. Fœdus enim à vobis, quod dubitare nefas esset, sanctissime percussum, eodem penè die spretum ac violatum à *Gallo* quodam *Egidio* quatuor navium præfecto ejusque sociis nequaquam inscientibus querimur: quemadmodum & ex literis nostris ad Regem datis, & ex ipsis mercatorum nostrorum postulatis facile poterit cognoscere Eminentia vestra; quam præter cæteros non fugit, quanti non magistratum duntaxat, verum etiam ipsius Regiæ Majestatis intersit violatores fœderum primos eos severius puniri. Verum illi fortasse, quo tendebant, in *Orientelem Indiam* jam nunc appulsi, nostrorum bona contra jus omne atque fidem in recentissimo fœdere erepta, veluti prædam ab hostibus captam sibi habent. Illud est interea quod Eminentiam Vestram rogamus, ut quæ ab navium præfecto, tanquam itineri suo necessaria, nostris ablata sunt, ea ab illarum navium Dominis, id quod ipsi prædatores æquum esse censebant restituantur: qua in re Vestram Eminentiam, qua valet autoritate, plurimum posse intelligimus.

Eminentia Vestra Studiosissimus

OLIVERIUS Prot. Reip. Angliæ &c.

Ex Palatio nostro Westmonasterii.

die Augusti An. Dom. 1656.

OLIVERIUS Protector Reip.
Angliæ &c.

Excelsis & Præpotentibus Dominis

FOEDERATI BELGII
Ordinibus

S D.

*Excelsi & Præpotentes Domini, amici ac
Fœderati charissimi,*

NON dubitamus nos quidem quin omnes
testimonium hoc nobis perhibitori sint,
nullas in contrahendis externis amicitiiis rationes
defendendâ Religionis veritate potiores unquam
nobis fuisse, nec jungendis eorum animis,
qui *Protestantium* vel amici ac defensores, vel
saltem non hostes essent, antiquius nos quic-
quam habuisse. Quo graviore animi dolore
commovemur, quoties annuntiatum est, *Pro-
testantium* Principes ac Civitates quæ sibi mutuo
amicissimæ summæque concordæ esse deberent,
suspectos inter se esse & non optimè animatos;
vos præsertim Regemque *Sueciæ*, quibus fortio-
res *Orthodoxa* fides defensores non habet, neque
socios nostra *Respub.* sibi conjunctiores, videri
non æquè ac consuevistis vobis invicem confide-
re, immo indicia quædam vel nascentis inter

VOS

vos diffidii , vel vacillantis amicitiae haud obscura apparere. Causae quae fuerint utrinque , & usque quo progressa animorum alienatio sit , ignotum esse nobis profitemur : veruntamen haud potuimus quin gravem sane molestiam animo caperemus ex ipsis initiis vel minimae dissensionis inter fratres coortae , ex qua tantum creati *Protestantium* rebus discrimen necesse sit ; quaeque si ingravesceret (quod Deus ne siverit) quantum inde *Reformatis Ecclesiis* periculum impenderet , quanta triumphandi materies inimicis nostris , & *Hispanis* potissimum daretur , latere vestram prudentiam usumque rerum solertissimum non potest. *Hispano* certe , tantum hinc fiducia tantum spiritus accessit , ut non dubitaverit per Legatum suum apud vos comorantem , sua vobis consilia , idque de summa *Resp.* vestrae audacissimè obtrudere : & partim injecto renovandi belli metu terrere , partim ostentatâ utilitatis falsâ specie sollicitare vestros animos est ausus , ut relictis ejus hortatu amicis vetustis ac fidelissimis , *Gallo* , *Anglo* , atque *Sueco* , arctissimam cum hoste ac tyranno quondam vestro , pacato nunc scilicet , & , quod maxime metuendum est , blandiente , coire societatem velletis. Sane qui ex hoste inveteratissimo , arreptâ tam levi occasione pro consiliario repente vestro se gerit , quid est quod iste sibi non sumeret , quò non audaciae progredetur , si cernere id semel oculis posset quod nunc animo duntaxat concipit atque molitur , discordiam nempe inter *Protestantes* ac bellum intesti-

num. Nescii non sumus , vos , pro sapientia vestra , qui sit *Europæ* universæ status , quæ *Protestantium* præsertim conditio sæpius cum animis vestris cogitare ; *Helvetiorum* Pagos *Orthodoxam* fidem sequentes novorum motuum à popularibus suis fidem *Papæ* sequentibus jam jamque ciendorum expectatione suspensos teneri , ex eo vix dum bello emerfos quod Religionis planè causâ ab *Hispano* , qui hostibus eorum & duces dederat & pecuniam suppeditaverat , conflatum est atque accensum ; *Vallium Alpinarum* incolis consilia *Hispanorum* eandem rursus machinari eadem atque perniciem quam superiore anno crudelissimè intulerunt ; *Protestantes Germanos* sub ditione *Cæsaris* gravissimè vexari , fedesque Patrias agrè retinere ; Regem *Sueciæ* quem Deus , uti speramus , fortissimum religionis *Orthodoxæ* propugnatorem excitavit , cum potentissimis *Reformatæ* fidei hostibus bellum anceps atque asperrimum totis regni viribus gerere ; vestris *Provinciis* infesta vicinorum *Papistarum* , quorum princeps *Hispanus* est , nuper iusta fœdera minitari ; nos denique indicto *Hispanorum* Regi bello esse occupatos. In hac rerum inclinatione siqua inter vos Regemque *Sueciæ* discordia existeret , *Reformatarum* tota *Europæ Ecclesiarum* quam miseranda conditio esset quæ immanium hostium crudelitari ac furori objicerentur ? Hæc nos cura haud leviter tangit ; eundemque vestrum esse sensum confidimus , proque vestro in communi *Protestantium* causa præclaro semper studio , utque pax inter fratres eandem

dem fidem eandem spem sequentes intemerata
 servetur, vos, vestra consilia ad has rationes esse
 accommodaturos, quæ cæteris quibuscunque
 anteponendæ sunt, nec quod paci inter vos *Sue-*
ciaque Regem stabiliendæ possit conducere, quic-
 quam esse omitturos. Qua in re si nos usus ullius
 esse possumus, quantum apud vos vel autoritate
 vel gratiâ valemus, nostram vobis operam liben-
 tissimè profiteamur, *Suecia* quoque Regi can-
 dem deferre paratissimi, ad quem etiam Lega-
 tionem quamprimùm mittere in animo habe-
 mus, quæ hac de re quid nostræ sententiæ sit,
 exponat. Deumque vestros utrinque animos
 ad moderata consilia flexurum esse speramus,
 vosque cohibiturum, nequid ab alterutrâ parte
 fiat quod irritare possit, remque ad extrema de-
 ducere: sed ut contrâ, pars utraque remove-
 velit quicquid alterutri offensum aut suspicio-
 sum esse queat. Id si feceritis, & hostes frustra-
 bimini, & amicis solatio eritis, & vestræ denique
 salutis *Reipubl.* quàm optimè prospicietis. Hoc
 etiam uti persuassimum sit vobis rogamus, da-
 tuos nos esse operam, quoties facultas oblata
 erit, uti nostrum erga *Fæderatas Belgii Provin-*
cias summum studium benevolentiaque appa-
 reat. Deum proinde assiduis precibus obtesta-
 mur, ut vestram *Remp.* pace, opibus, libertate,
 atque imprimis *Christiana* fidei amore ac vero
 cultu florentissimam conservare perpetuò velit.

Vestrarum Celsitudinum Potentium Studios.

OLIVERIUS Prot. Reip. Angliæ Sc.

Ex Palatio nostro Westmon. die Aug. 1656.

OLIVERIUS Protector Reip.
Angliæ &c.

Serenissimo Principi

J O A N N I
Lusitaniæ Regi

S. D.

Serenissime Rex,

Dle undecimo *Julii* proximi stylo veteri sanctionem pacis à Majestate Vestra jam ratæ, à Legato vestro Extraordinario *Londini* transactæ, nec non arcanorum & præliminariarum articulorum per *Thomam Maynardum* accepimus: perque literas à *Philippo Meadow* nostro *Olyssiponi* Internuntio eodem tempore datas, nostram etiam dictæ pacis & articulorum sanctionem, pro iis mandatis quæ à nobis eâ de re acceperat, Majestati Vestræ ab ipso redditam intelligimus: cum supradicta sanctionis instrumenta ineunte *Junio* proximo vicissim data acceptaque fuissent, adeo ut nunc inter utramque gentem pax firmissima sancita sit. Quâ ex pace nos quidem voluptatem haud mediocrem percipimus; propterea quòd eam & communi utriusque gentis utilitati fore arbitramur, hostiumque communium haud levi detrimento: qui ut prioris foederis turbandi rationem aliquam

quam primò invenerunt, ita nunc neidem instaurari fœdus posset, intentatum nihil reliquerunt. Neque dubium nobis est quin suspicionum utrinque offensionumque inter nos materiam creandi occasionem nullam prætermisuri sint. Quas nos quidem, quantum in nobis est, quàm longissimè amovere animo nostro ita constanter decrevimus, immo ut majorem indies mutuam fiduciam hæc nostra pariat necessitudo, tam vehementer cupimus, ut eos pro hostibus habituri simus, qui ullis artibus amicitiam nostram imminuere conabuntur inter nos nostrosque populos hac pace stabilitam; eundemque esse Majestatis Vestræ animum ac voluntatem facile nobis persuademus: Cumque placuerit Majestati Vestræ suis in literis ad nos *quarto & vigesimo Junii stylo novo* datis, & diebus aliquot post instrumentum confirmatæ pacis datum atque acceptum nostro Internuntio traditis, clausularum quarundam hujus fœderis mentionem facere quas aliquantum immutatas velit, ut quæ huic *Reipublicæ*, quemadmodum Majestas Vestra censet, levis admodum sint momenti, *Portugallia* Regno maximi, peculiari tractatione agere iis de rebus quæ à Majestate Vestra proponuntur, & si quid præterea fœderi stabiliendo vel etiam arctius obstringendo conducere alterutri parti videbitur, parati erimus: in qua Majestatis Vestræ, sui que populi haud secus atque nostri, ut utrisque æquè satisfiat, rationem habebimus: atque hæc omnia *Olyssiponi* an *Londini* agitanda ac transigenda sint, vestra
op-

optio erit. Verùm hoc fœdere jam rato, signisq; gentis utriusque ritè obfignato, dato denique vicissim atque accepto, immutare partem ejus ullam idem esset atque totum rescindere; quod Majestatem Vestram minimè velle pro certo habemus. Majestati Vestræ fausta omnia ac prospera exoptamus.

Majestatis Vestræ Studiofissimus

OLIVERIUS Protector Reip.
Angliæ &c.

Ex Palatio nostro Westmonasterii.

Augusti die 1656.

OLIVERIUS Protector Reip.
Angliæ &c.

Serenissimo Principi

J O A N N I
Lusitaniæ Regi

S. D.

Serenissime Rex,

PERlarum ad nos est facinus illud inhumanum ac nefarium, quo cædes *Philippi Meadorwes* Internuntii apud vos nostri, transigendæ pacis causâ à nobis missi attentata est: cujus atrocitas tanta fuit, ut Divino plane Numini atque tutelæ
ejus

eius conservatio attribuenda sit. Nosque ex literis Majestatis Vestrae *sexto & vigesimo Maii* proximi ad nos datis, perque *Thomam Maynardum* nobis redditis, permotam facti indignitate Majestatem Vestram de authoribus jussisse quæri intelligimus, ut supplicium de iis, pro eo ac meriti sunt, sumatur. Verum comprehensos esse ullos ex iis, aut jussa vestra hac in parte quicquam effecisse nondum accepimus. Quapropter nostrum esse duximus palam significare, tentatum illud facinus barbarum, & partim commissum quàm indignè feramus: atque adeo à Majestate Vestra postulamus, ut ab illius facinoris, authoribus, sociis, administris supplicium debitum repetatur: Et quo hoc maturius fiat, ut honestissimi integerrimique viri, quique gentis utriusque paci quàm maximè student, huc quæstioni præficiantur, quo res penitus investigari, tamque in authores sceleris quam in ministros severius animadverti possit. Id nisi fiat, neque Majestatis Vestrae justitia, neque nostra hujusque Reipub. existimatio vindicari, neque conservandæ inter utramque gentem amicitia ulla ratio firma esse poterit. Majestati Vestrae foelicia faustaque omnia precamur.

Majestatis Vestrae Studiosissimus

OLIVERIUS Protector Reipub.
Angliæ &c.

Ex Palatio nostro Westmonasterii.

Aug. die 1656.

OLIVERIUS Protector Reip.
Angliæ &c.

Illustrissimo Domino

COMITI MIRANO

S. D.

Illustrissime Domine,

Singulare tuum erga me atque hanc Rempub.
studium haud mediocriter nos demeruit, ti-
bique devinxit: id vestris ex literis 25. Junij
proximi ad me scriptis facile perspexi, tum
etiam ex iis quas ab Internuntio nostro *Philippo*
Meadow conficiendæ pacis causâ ad *Lusitaniam*
Regem à nobis misso, accepi: quibus is de exi-
mio vestro studio atque opera in hac pace transi-
genda abundè nos docuit: hujus novissimam
sanctionem & accepi libentissimè, mihi que
persuadeo fore, ut neque collatæ in hanc pacem
operæ tuæ, neque in *Anglos* benevolentia, neque
fidei erga Regem hac in re spectatæ un-
quam te pœniteat: quandoquidem, annuente
Deo, sperandum est, hanc pacem & utrique
genti permagna immolumenta, & hostibus
incommoda haud exigua esse allaturam. Quod
solum in hoc negotio triste atque infaustum ac-
cidit, fuit illud facinus in Internuntium no-
strum *Philippum Meadows* nefariè susceptum
atque

atque tentatum : Cujus in occultos auctores
 haud segnius inquiri oportuit quam in mani-
 festos sceleris ministros : neque de Regis vestri
 justitia ac severitate in tanto scelere puniendo
 neque de tuâ cum primis ad eam rem operâ , ut
 qui fas piûmque colas , & pacis inter utramque
 nationem studiosus fueris dubitare possum : quæ
 quidem stare nullo modo potest , si facta hujus-
 modi nefaria impunita atque inulta ibunt. Ve-
 rùm tua facinoris illius nota detestatio facit ut
 necesse mihi non sit plura de hac re in præsentia
 dicere. Cum itaque de meâ erga te benevolen-
 tiâ quam & rebus omnibus demonstrare para-
 tissimus ero , certior te fecerim , extremum
 illud est , ut te tuaque omnia Divinæ benignitati
 tutelæ à me scias esse commendatissima.

Amplitudinis Vestrae Studiosissimus

OLIVERIUS Prot. Reip. Angliæ &c.

Ex Palatio nostro Westmon. Aug. die 1656.

OLIVERIUS Protector Reip.
 Angliæ &c.

Serenissimo Principi

CAROLO GUSTAVO
Suecorum, Gothorum, Vandalorumque Regi, &c.

Serenissime Rex, amici ac Fæderate charissime.

Cum eundem nobiscum animum , idem
 consilium in Majestate Vestrâ inesse anim-
 adver-

advertam, *Protestantium* fidei defendendæ contra hostes ejus, hoc tempore, si unquam aliàs, infestissimos, unde est quòd tam prosperis successibus vestris victoriarumque nuntiis penè quotidie lætemur, tum illud sanè vehementer doleo, quòd unum lætitiàm hanc nostram turbat atque corrumpit, perferri ad nos, inter læta cætera, vestram cum *Fæderatis Belgii Provinciis* amicitiam pristinam non satis consistere; remque eo deductam inter vos, in mari præsertim *Baltico*, ut ad discordiam spectare videatur. Cujus causas quidem ignorare me fateor, eventum certe (nisi Deus avertat) *Protestantium* summæ rei periculosissimum fore facile perspicio. Quapropter pro illâ arctissimâ necessitudine quæ cum utrisque vestrum nobis intercedit, proque eo, quòd duci omnes imprimis debemus, Religionis Reformatæ studio atque amore, nostrum esse censuimus, quemadmodum *Fæderatos Belgii Ordines* ad pacem & æquanimittatem magnopere hortati sumus, ita nunc Majestatem Vestram hortari. Satis superque hostium *Protestantibus* ubique est: nunquam acrioribus odiis inflammati conspirasse in exitium nostrum undique videntur. Testes *Alpinæ Valles* haud ita pridem miserorum cæde ac sanguine redundantes; testis *Austria* edictis nuper & proscriptionibus *Cæsariis* concussa; testis *Helvetia*; quid enim attinet pluribus verbis tot calamitatum recentium memoriàm luctumque revocare? Hæc omnia loca quis nescit *Hispanorum* & *Romani Pontificis* consilia incendiis, cladibus, vexationibus

tionibus Orthodoxorum per hoc biennium mis-
cuiffe. Si ad hæc tot mala *Protestantium* Fratrum
inter se dissensio accesserit, inter vos præsertim
quorum in virtute, opibus, constantia præsidium
Ecclesiis Reformatis constitutum est maximum,
quantum humanæ opis est, periclitari *Religio-*
nem ipsam Reformatam, atque in summo discri-
mine versari necesse erit. Quod contra, si uni-
versum *Protestantium* nomen eâ quâ decet inter
se fraternâ consensione perpetuam pacem co-
luerit, nihil omnino erit quod pertimescamus
quid hostium vel artes vel vires incommodare
nobis possint; quos sola nostra concordia vel
propulsabit vel frustrabitur. Quapropter Maje-
statem Vestram majorem in modum oro atque
obsecro, ut ad confirmandam cum *Fœderatis*
Provinciis amicitiam pristinam, si qua in parte
collapsa est aut imminuta, propensum atque
benignum animum afferre velit. Siquid est in
quo mea opera, fides, diligentia ad compo-
sitionem usui esse possit, eam omnem vobis pro-
fiteor atque deffero: Deus modò aspiret, fau-
stumque esse jubeat, quod cum summâ felici-
tate cursuque perpetuo rerum prosperarum Ma-
jestati Vestræ exopto.

Majestatis Vestre Studiosissimus

OLIVERIUS Protector Reipub.
Angliæ &c.

Ex Palatio nostro Westmonasterii.

die Aug. 1656.

OLI.

OLIVERIUS Protector Reip.
Anglia, &c.

ORDINIBUS HOLLANDIÆ.

*Excelsi & Præpotentes Domini, amici
charissimi,*

DEmonstratum est nobis à *Gulielmo Coopers* Pastore *Londinensi*, civique nostro, *Jeannem le Maire Amsterodamensem* Socerum suum, ante annos circiter triginta tres rationem quandam excogitasse, qua *Reip.* vestræ redditus, sine ullo populi onere, multo auctiores fierent, factâque cum *Joanne van den Brook* societate partiendi inter se præmii quod ex illo invento suo reportassent, id autem erat parvi Sigilli in *Provinciis* constitutio, ob hoc *Celsitudines Vestras Præpotentes* supradicto *van den Brook* ejusque posteris tria millia Geldricorum (quæ trecentas libras valent) in singulos annos pensitanda spondisse: jam verò, etsi inventa illa parvi sigilli ratio facilis admodum & expedita reperta est, magnosque ex eo tempore redditus *Celsitudinibus Præpotentibus* vestris, nonnullisque vestris *Provinciis* retulit, tamen ad hodiernam usque diem, quamvis multâ sollicitatione petatum, illius pacti præmii nihildum adnumeratum esse: unde postquam supradictis *van den Brook* & *le Maire* longarum dilationum pertæsum est, actionem illam

illam in supradictum *Gulielmum Cooperum* civem nostrum jure esse translata : qui cum fructum industriæ Soceri sui percipere cupiat , ad nos per libellum supplicem se contulit , ut hanc ejus postulationem *Celsitudinibus vestris Prapotentibus* commendare vellemus ; quod ei non esse dene-gandum censuimus. Quapropter *Celsitudinis Vestras Prapotentes* amice rogamus , uti petitionem supradicti *Gulielmi Cooperi* ea de re benignè audire velitis , pactumque industriæ præmium atque stipendium tam justum , & pro numero tot annorum præteritorum & annua deinceps pensione solvendum curare. Quod cum non dubitemus quin *Celsitudines Vestra Prapotentes* libenter facturæ sint , utpote & justum & munificentia vestra dignum , parati & nos vicissim erimus , vestris quoque popularibus in postu-latis suis , quoties nobis edentur , æquè propenso animo favere.

*Vestrarum Celsitudinum Prapotentium
Studiofissimus*

OLIVERIUS Protector Reip.
Angliæ &c.

Ex Palatio nostro Westmonasterii
die Septemb. An. Dom. 1656.

OLIVERIUS Protector Reip.
Angliæ &c.

Serenissimo Principi

LUDOVICO
Galliæ Regi.

Serenissime Rex ; amice ac Fœderate charissime,

INviti facimus ut Majestatem Vestram de suorum injuriis post pacem instauratam toties interellemus : verum & vos factas nolle confidimus, & nos nostrorum querimoniis deesse non possumus. Navem *Antonium Diepenssem* ante fœdus jure captam, ex Judicum sententia Curiae nostræ maritimæ præsidentium facile constat. Ejus prædæ partem quatuor millia plus minus coriorum *Robertus Brunnus* Mercator *Londinensis* ab iis qui auctioni præfuerunt, quod & ipsi testantur, coëmit : ex iis circiter ducenta cum *Diepam* advecta post ratam pacem Coriario cuidam *Diepensi* vendidisset pecuniamque rede-gisset, eà pecuniâ in manibus procuratoris sui occupatâ atque retentâ, litem sibi impingi, suumque jus illo in foro se obtinere non posse queritur. Quocirca Majestatem Vestram rogandum censuimus, ut ad Consilium suum de re tota referri velit, pecuniamque illam iniquissimâ lite extricari. Etenim si ante pacem facta & judi-

judicata , post pacem rursus in controversiam
atque iudicium vocabuntur , quis sit fructus fœ-
derum futurus , non videmus. Verùm hujus-
modi querelarum nullus finis erit , nisi in fœdi-
fragos hosce tam frequentes exemplum aliquod
severitatis maturè statuatur : id quod Majestati
Vestrae quamprimùm curæ fore speramus.
Quam Deus interhinc tutelâ suâ sanctissimâ dig-
netur.

Majestatis Vestrae Studiosissimus

OLIVERIUS Protector Reip.
Angliæ &c.

*Ex Palatio nostro Westmonasterii.
die Septemb. An Dom. 1656.*

OLIVERIUS Protector Reip.
Angliæ &c.

Serenissimo Principi

J O A N N I
Lusitaniæ Regi.

Serenissime Rex,

TRansactâ jam feliciter inter hanc Rempub.
Lusitaniæque Regnum pace , nec non ad
commercium quod attinet , recte atque ex or-
dine cautum atque sancitum cum sit , necessa-
rium esse duximus *Thomam Maynardum* , à quo
G hæ

hæ literæ perferuntur , ad Majestatem Vestram mittere ; qui Consulis munere negotiatorio vestra in ditione , ad mercatorum res rationesque ordinandas fungatur. Cum autem hoc sæpius usu venire possit , ut ad eundem Majestatem Vestram fieri sibi copiam nonnunquam postulet , tam de commercio quam aliis de rebus quæ nostrâ hujusque Reip. interesse possint , à Majestate vestra petimus , ut illi , quoties audito opus sit , benignum velitis aditum atque aurem præbere ; id vestræ erga nos benevolentia pro argumento singulari atque indicio habebimus : interim Majestati vestræ Deum Opt. Max. fortunare omnia volumus.

Majestatis vestra studiosissimus

OLIVERIUS Protector Reipub.
Angliæ &c.

*Ex Aula nostra Westmonasterii.
die Octob. 1656.*

SUECORUM REGI.

Serenissime Potentissimeque Rex ,

TAmetsi ea est solita Majestatis vestræ & spontanea in viros bene meritos benevolentia , ut omnis eorum commendatio supervacanea possit videri , tamen nobilem hunc virum *Gulielmum Vavasorem Equitem auratum* . Majestatis Vestræ sub signis merentem , & ad vos jam proficiscentem noluimus sine nostris ad Majestatem

statem Vestram literis dimittere. Quod eo libentiùs fecimus, posteaquam significatum nobis est, jampridem cum, Majestatis Vestræ auspiciis secutum, multis in præliis vestrâ causâ suum sanguinem profudisse: adeo ut *Suecorum* Reges proximi ob militarem ejus peritiam, operamque sæpe in bello strenuè navatam, cum agro & annuis pensionibus veluti virtutis præmio remuneraverint. Neque verò dubitamus quin Majestati vestræ in hodiernis bellis permagno sit usui futurus, cum sit fide ac bellicarum rerum scientia jamdiu spectatâ. Eum itaque Majestati Vestræ, pro eo ac meritis est, commendatum cupimus; simulque rogamus, ut quæ illi præterita stipendia processerint, solvantur. Hoc nobis erit gratissimum; nec gratificari vicissim Majestati Vestræ, quoties facultas erit, gravabimur, cui fausta omnia ac prospera exoptamus.

Majestatis vestra studiosissimus

OLIVERIUS Protector Reipublicæ
Angliæ.

*Ex Palatio nostro Westmonasterii.
die Octob. An. Dom. 1656.*

OLIVERIUS Protector Reip.
Angliæ &c.

Serenissimo Principi

J O A N N I
Lusitanix Regi.

S. D.

Serenissime Rex, Amice ac Fæderate Charissime,

EXhibuit nobis libellum supplicem *Thomas Ewans Naucerus*, civis noster, in quo ostendit, se An. 1649. & 1650. cum navi sua, cui nomen *Scipioni*, quadringentarum amphorarum, & cui ipse præfuit, societati *Brasiliensi* operam navasse; eam navem cum onere toto & apparatu, Majestatis Vestræ jussu ereptam sibi esse: unde damnum homini factum, præter amissum ex tanta sorte sexennii lucrum, Commissarii ex fœdere ad decidendas controversias utrinque dati plus septem millibus librarum nostrarum, sive bistotidem *Milreis Lusitanicis* æstimarunt; quemadmodum & ad nos retulerunt. Quod detrimentum tam grave cum supradictum *Thomam* vehementer afflixerit, coactus ad repetendas ex fœdere res suas, *Olyssipponem* navigare, petiit suppliciter à nobis, ut literas nostras hac de re ad Majestatem vestram sibi daremus: nos, tametsi in communi
causa

causâ mercatorum , quibus à Societate *Brasiliensi* debebatur , superiore anno scripsimus , tamen ne cui nostram opem poscenti defuisse videamur , Majestatem vestram pro amicitia rogamus , ut hujus nominatim hominis ratio habeatur ; utque velit Majestas vestra suis omnibus ita præcipere , ut ne quid obstare possit quo minus is in ea urbe , quod sibi à Societate *Brasiliensi* vel aliunde debetur , sine ullo impedimento exigere , & sine morâ possit recuperare. Deus Majestatem vestram perpetua felicitate augeat ; nostramque amicitiam faxit quàm diuturnam.

Majestatis Vestrae Studiosissimus

OLIVERIUS Protector Reipub:
Angliæ &c.

*Ex Palatio nostro Westmonasterii.
die Octob. An. Dom. 1656.*

OLIVERIUS Prot. Reip. Angliæ &c.

Illustri & Magnifico

Civitatis Hamburgensis Senatui.

S. D.

*Amplissimi, magnifici & Spectabiles Viri,
Amici Charissimi,*

G Ravem detulerunt ad nos querimoniam
Jacobus & Patricius Hays cives hujus Reip.

se , sui fratris *Alexandri* , qui intestatus diem obiit , hæredes legitimum cum sint , atque ita ipsius Curiae vestrae sententiâ ante annos duodecim secundum se latâ contra fratris viduam pronuntiati fuissent , bonaque defuncti fratris cum fructibus exceptâ solùm viduæ dote , adjudicata sibi ex eo judicio essent , non potuisse tamen hætenus , neque pro suo jure , neque literis *Caroli* olim *Regis* eâdem de re scriptis ullum laborum suorum ac sumptuum ex ea sententia fructum consequi : obesse sibi scilicet potentiam atque opes *Alberti van Eizen Decurionis* apud vos primarii , apud quem bonorum pars maxima deposita est ; cum agere omnia , ne ea bona hæredibus restituantur. Elusi , ac dilationibus confecti , summam denique ad inopiam redacti supplicant nobis ne se negligamus tantis injuriis foederatâ in civitate oppressos. Quod nos cum officii imprimis nostri intelligamus esse , ut ne quis civis noster præsidium suis rebus , atque susceptum patrocinium in nobis requirat , petimus quod à civitate vestra videamur facile impetrare posse , ut sententiam ipsimet vestram hisce fratribus ratam esse velitis ; neque per causam provocationis ad *Spirensen Cameram* , vel primò simulatæ vel nunc irritæ , moram justitiæ fieri diutius patiamini. Nam de summa ipsius causæ jurisperitorum nostrorum sententias requisivimus ; unâque descriptas obsignatasque ad vos misimus. Quodsi rogando nihil proficitur , erit necessariò , idque ex consueto jure gentium , quod tamen minimè vellemus ,
ad

(151)

ad reciproca deveniendum: id ne accidat, vos
pro vestra prudentia provisuros esse confidimus.

Amplitudinum Vestrarum Studiofissimus

OLIVERIUS Protector Reipub.
Angliæ &c.

Ex Palatio nostro Westmonasterii.

die Octob. 16. An. Dom. 1636.

OLIVERIUS Protector Reip.
Angliæ

Serenissimo ac Potentissimo Principi

L U D O V I C O

Galliæ Regi

S. D.

*Serenissime Potentissimeque Rex, Amice
ac Fæderate Charissime,*

Pervenisse ad Majestatem Vestram literas no-
stras arbitramur, *Maii quarto decimo* supe-
rioris anni datas: in quibus *Joannem Dethicum*,
eodem anno *Londini* urbis præfectum, & *Gu-*
lielmum Wakefield mercatorem per libellum sup-
plicem nobis ostendisse scripsimus, navem *Jo-*
nam suis mercibus onustam, quæ *Ostendam*
velerentur, *Dunkirkam*, quæ tum temporis in
Gallica ditione erat, à prædone quodam *Caroli*
Stuarti.

Stuarti filii auspiciis piraticam faciente ex ipso *Thamesis* ostio fuisse abreptam: se, cum ex edictis vestris vestrique consilii decretis, quibus erat cautum, nequa navis *Anglorum* ab hostibus *Parlamenti* capta vestris portubus reciperetur, venalifve esset, à Domino *Lestrado* illius oppidi præfecto postulassent ut reddi sibi navem suam atque bona juberet, responsum ab eo tulisse, sære neque viro primario dignum, neque eo qui Regi suo satis dicto audiens videretur, se scilicet ab Rege *Gallia* ob navatam in bello operam hanc præfecturam præmio accepisse; curaturum proinde uti ea quam maximè quæstui sibi sit: per fas videlicet ac nefas; id enim minime laborare videbatur. Quasi verò hanc præfecturam atque Provinciam Majestatis Vestræ dono accepisset, ut socios juxta spoliaret, vestraque edicta in eorum gratiam promulgata pro nihilo haberet. Quod enim Rex *Gallia*, si maximè ab hostibus factum contra nos voluisset, facti tamen participes suos esse vetuit, id regius præfectus contra regium interdictum non modo fieri est passus, ut nos vestris in portubus diriperemur, prædæque effemus, verum etiam ipse diripuit, ipse prædæ habuit, seque facti authorem palam professus est. Hoc itaque responso mercatores infecto negotio irriti atque elusi discessere: nosque hæc itidem superiore anno Majestati vestræ per literas significavimus successu licet haud multo meliore; nihildum enim responsi ad eas literas habuimus. Quod non habuerimus accidisse id credimus, propterea quòd eo tempore

Præ-

Præfectus ille apud exercitum in *Flandria* fuit ;
 nunc in urbe ipsa *Parisiorum* degit , vel potius
 per urbem perque aulam nostrorum spoliis locu-
 pletatus impunè volitat. A Majestate igitur ve-
 stra nunc denuò id petimus quod ipsius Majesta-
 tis vestræ interest in primis providere , nequis
 ad sociorum injurias edictorum regionum con-
 temptionem audeat adjungere : sed neque ad
 Legatos sive Commissarios de controversiis
 communibus utrinque dandos rejici propriè hæc
 causa poterit ; quandoquidem hic non sociorum
 jus duntaxat , sed auctoritas ipsa vestra Regiique
 nominis reverentia agitur. Illud enim mirum
 sit , si mercatores damna sua molestius quàm
 Majestas vestra sui ferat imminutionem. Eam si
 non ferat, eâdem operâ simul perficiet, ut neque
 amicissimorum de *Repub. nostra* edictorum
 poenituisse , neque in suorum injuriis connivisse ,
 neque nostræ postulationi non tribuisse quod
 par sit videatur.

*Majestati vestra voluntate, amicitia,
 fœdere devinctissimus*

OLIVERIUS Protector Reipub.
 Angliæ &c.

*Ex Aula nostra Westmonasterio.
 die Novemb. An. 1656.*

OLIVERIUS Prot. Reip. Angliæ &c.

Serenissimo potentissimoque Principi

F R E D E R I C O I I I.

Daniæ , Norvegiæ , Vandalorum ,
Gothorumque Regi ; Duci Slesvici ,
Holsatiæ , Stormariæ , & Dithmarsiæ ;
Comiti in Oldenburg & Delmen-
horst &c.

S. D.

*Serenissime potentiissimeque Rex , Amice
ac Fœderate Charissime ,*

Literas Majestatis Vestræ sexto decimo Fe-
bruarii Hafniæ datas ab ornatissimo viro.
Simone de Petkum , Oratore apud nos vestro ,
accepimus. Iis perlectis , & voluntatis erga nos
vestræ præclara significatio , & ipsius rei , de
qua scriptum erat , pondus usque eò nos per-
movit , ut statim ad Majestatem Vestram mit-
tere qui mandatis nostris instructus , nostra con-
silia vobis hac de re plenissime exponeret , in
animo haberemus. Et quanquam idem nobis
etiamnum animus manet , hætenus tamen ido-
neum aliquem cum iis mandatis dimittere , quæ
gravissimum hujusmodi negotium postularet ,
non potuimus ; quemadmodum jam brevi fa-
cturos nos esse speramus. Interea non omitten-
dum diutius existimavimus Majestatem Ve-
stram certiores facere , præsentem rerum in-

Ecc.

Europa statum haud mediocri nos curâ ac cogitatione sollicitos tenuisse: cum ab aliquot jam annis summo cum dolore videamus *Protestantium* Principes ac civitatum Primores (quos ex communi *Religionis* atque salutis vinculo omnem sese mutuò confirmandi ac defendendi inire rationem oporteret) inter se indies magis magisque infirmè animatos, quid quisque molitur, quidve struat, suspectum habere; metum amicis, spem hostibus præbentes, inimicitias atque dissidia potius hac rerum inclinatione portendi, quam firmum invicem animorum consensum, ad præsidium mutuum ac defensionem. Atque hæc quidem sollicitudo eo altius animo nostro insedit, quo magis in Majestate Vestra, Regeque *Suecia* adhuc aliquid residere mutuæ suspitionis videtur; vel saltem non eam existere voluntatum conjunctionem quam communis nostrum omnium in *Orthodoxam* religionem amor ac studium flagitaret; dum Majestati vestræ injecta forte aliqua suspicio est, fore ut ab Rege *Suecia* detrimentum aliquod ditæ vestræ commerciis afferatur; suspicante vicissim *Suecorum* Rege, ne per vos & bellum, quod nunc gerit, difficilius, & contrahendarum societatum ratio impeditior sibi reddatur. Non præterit Majestatem Vestram, pro ea summa prudentia quam adhibere suis omnibus in rebus solet, quantum discriminis *Protestantium* summæ rei impendeat, si istiusmodi suspiciones inter vos diu versentur; quanto magis, quod Deus avertat, si quod ho-

stilitatis indicium crumperet. Uteunque hæc se
 habeant , nos , quemadmodum & *Suecorum*
Regem , & *Fæderati Belgii Ordines* ad pacem
 & moderata consilia magnopere hortati sumus
 (adeoque redintegrari inter eos pacem atque
 concordiam vehementer gaudemus , nam &
 capita quoque illius fœderis à *Dominis Ordini-*
bis transmissa ad nos sunt) ita nostras esse par-
 tes duximus , nostræque amicitiae quam maxime
 convenire , ut qui sensus noster his de rebus sit ,
 Majestatem Vestram ne celaremus (præsertim
 cum ut ita faciamus , Majestatis Vestræ literis
 amicissimis tam studiose invitemur ; id quod
 etiam benevolentiae erga nos vestræ pro argu-
 mento singulari sanè habemus atque amplecti-
 mur) vestræque Majestati ante oculos ponere-
 mus , quantam nobis necessitatem , qui *Pro-*
testantium Religionem sequimur , divina provi-
 dentia imposuerit colendi inter nos pacem , idque
 nunc maxime , cum hostes nostri acerrimè , si-
 unquam alias , rem gerere , & conjurasse un-
 dique in perniciem nostram videntur. *Valles Al-*
pinas miserorum nuper Incolarum cæde ac san-
 guine madentes commemorare nihil attinet ;
 nec conquassatam per eosdem dies *Cæsareis* pro-
 scriptionibus atque edictis *Austriam* ; nec de-
 nique contra *Helvetios Protestantés Helvetiorum*
Papistarum infestos imperus. Quis nescit *His-*
panorum dolos ac machinationes per hosce ali-
 quot annos hæc loca omnia incendiis , ruinis ,
 cladibus *Protestantium* permiscuisse ? Si ad hæc
 mala *Reformatorum Fratrum* inter se dissensio
 velut

velut cumulus accedat, inter vos præsertim qui nostrarum virium tanta pars estis, & in quibus tantum præsidii ac roboris *Protestantium* dubiis temporibus comparatum atque repositum est; quod ad opem humanam attinet, pectus ire *Protestantium* res, & in extremo discrimine atque occasu versari necesse erit. Quod contra, si pax constet inter vos vicinos, cæterosque *Orthodoxos* Principes, si concordie fraternæ omni ex parte studeatur, non erit cur, Deo bene juvante, vel vim vel versutiam nostrorum hostium pertimescamus; quorum conatus nostra Sola consensio vel dissipabit vel frustrabitur. Neque vero dubitamus quin Majestas Vestra ad hanc pacem beatam impertiri suam operam, quam potest maximam, & libens velit & velle desitura non sit. Qua in re ipse etiam communicare consilia cum Majestate vestra atque conjungere paratissimus ero; utpote & veram amicitiam professus, & cui non solum pactam inter nos tam auspiciatò servare pacem deliberatum omnino sit, verum etiam necessitudinem hanc, quæ nunc intercedit, prout Deus facultatem dabit, arctiori vinculo constringere. Idem Deus interim Majestati Vestræ secunda ac prospera omnia concedat.

Majestati Vestra amicitia, fœdere ac voluntate conjunctissimus

OLIVERIUS Prot. Reip. Angliæ &c.

Dabantur ex Aula nostra Westmonasterij.

Decembris An. 1656.

OLIVERIUS Protector Reip.
Angliæ, &c.

*Serenissimo Illustrissimoque Principi
ac Domino, Domino*

G U L I E L M O

*Hassia Langravio, Principi Here-
feldia, Comiti in Cattimelibocæ.,
Decia Ligenhain, Nidda
& Schaumburgo &c.*

Serenissime Princeps,

AD literas Celsitudinis vestræ non sic altero
pòst anno, quod prope jam pudet, rescrip-
sissemus nisi nos admodum invitos permulta
fanè, eaque gravissima, quorum curam, pro
nostro in *Repub.* munere, differre non potui-
mus, interpellassent. Quæ enim literæ debe-
bant esse nobis gratiores, quàm quæ à Principe
Religiosissimo, majoribus quoque Religiosissi-
mis orto, de pace Religionis, deque concordia
Ecclesiarum concilianda sunt scriptæ; quæ etiam
literæ eundem planè animum, idem pacis *Chri-
stiana* promovendæ studium non solum suo,
verum etiam universi ferè orbis *Christiani* opi-
nionem ac iudicio, & ipsæ nobis tribuunt, &
universim attributum esse gratulantur? Et nos
qui-

quidem per tria hæc olim regna quid hoc in partefimus conati, quidque hortando, ferendo, præeundo, divino maximè auxilio, effecerimus, & norunt nostri plerique, & in summa conscientiae tranquillitate sentiunt. Eandem præferim *Germania* totius *Ecclesie*, ubi acrius ferè, jamque diu nimis dissidetur, pacem optavimus; perque nostrum *Duram* hoc idem multos jam annos frustra molientem siquid eam in rem nostrâ operâ conferre posset ex animo detulimus. In eadem nos etiamnum sententia permanemus; eandem illis *Ecclesiis* fraternam inter se charitatem optamus: sed quam sit hoc arduum conciliandæ pacis negotium inter ipsos pacis, ut præ se ferunt, filios, summo cum dolore satis superque intelligimus. Nam ut utrique *Reformati* nempe & *Augustani*, in unius Ecclesiæ communionem aliquando coalescant, sperandum vix est; suam utrique sententiam ne possit vel voce vel scriptis defendere, prohiberi sine vi non poterunt; vis autem cum pace Ecclesiasticâ consistere non potest: hoc tantùm se sinant exorari qui dissentiunt, ut humanius saltem & moderatius velint dissentire, nihiloque minus inter se diligere; utpote non hostes sed fratres in levioribus licet dissentientes, in summa tamen fidei conjunctissimos. Hæc nos inculcando, hæc suadendo nunquam defatigabimur; quod ultra est, humanis neque viribus neque consiliis datur: Deus quod suum solius est suo tempore perficiet. Tu interim, Serenissime Princeps, præclaram in *Ecclesias* declarationem animi tui
fema

ſempiternum ſanè monumentum & majoribus
tuis dignum & omnibus poſthac principibus
imitandum reliquiſti. Nos *Ceſſitudini* veſtræ,
pro eo ac merita eſt, felicitatem cæteris in rebus
quantum ipſa cupit, mentem, ea quam nunc
habes, haud meliorem (quid enim poteſt eſſe
melius?) à Deo Optimo Maximo præcamur.

Wefmonaſterio. die Martii.

An. Dom. 1656.

OLIVERIUS Protector Reip:
Angliæ &c.

Sereniſſimo Principi

DUCI CURLANDIÆ.

Sereniſſime Princeps,

DE benevolentia *Ceſſitudinis* erga nos veſtræ
& aliàs, & tum quidem abunde nobis con-
ſtitit cùm Oratorem noſtrum ad *Moscovia Ducem*
iter facientem, & in ditione veſtra per aliquot
dies commorantem hoſpitio benignè accepiti:
nunc juſtitiz & æquitaris ſuæ haud leviora indi-
cia daturam eſſe *Ceſſitudinem* veſtram & ſuo-
pte ingenio & noſtro rogatu confiſimus. Cum
enim *Joannes Jameſonius Scotus*, navis cujuſdam
veſtræ Magiſter fidelem naucleri operam ſepten-
nioque cognitam vobis navaverit, ſequè illam
navem *Balenam* ſibi commiſſam, in oſtio flu-
minis,

minis , ut mos est , Gubernatori vestro appellendam in portum tradidisset , cumque imperitè suo munere fungentem quod solum potuit sæpius monuisse multis testibus probaverit , non ejus profecto culpâ , sed Gubernatoris vel imperitia vel pervicacia fractam esse navem nemini non liquet. Quod cum ita sit , à Celsitudine vestra majorem in modum petimus , ut supradicto *Joanni* Magistro neque illud naufragium imputare , neque cum idcirco stipendio debito velit privare ; cujus spe solâ , jam altero naufragio bonis omnibus amissis , se utcunque in extrema inopia sustinet & solatur.

Ex Aula nostra, Westmonasterio..

die Martii An. Dom. 1657.

O L I V E R I U S Protector Reip.
Angliæ &c.

Amplissimis Consulibus ac Senatoribus

REIP. G E D A N E N S I S

S. P. D.

Amplissimi , magnifici Viri, amici Charissimi,

URbem vestram industriâ , opibus & optimarum artium studiis florentem cum nobilissimis quibusque urbibus semper esse duximus conferendam : nunc posteaquam in hoc bello , quod vestris jamdiu in finibus geritur ,
Polo-

Polonorum sequi partes quam *Suecorum* maluistis, sanè & Religionis causâ quam colitis & commercii, quod cum *Anglis* vetustum jam habetis, optavimus ut ea vobis maxime consilia placerent, quæ cum Dei gloria urbisque vestræ dignitate ac splendore viderentur esse conjunctissima. Quocirca petimus pro amicitia quæ vobis cum *Anglorum Gente* multo usu firmata jamdiu constat, & si qua in gratia apud vos nostrum quoque nomen est, ut insignem inter primos *Suecorum Duces Conismarcum*, egregium præsertim bello virum casu & suorum proditione mari interceptum belli lege, non acerbissimè adhuc gesti, dimittere velitis, sin id minus vestris rationibus convenire arbitramini, ut leniore saltem ac liberiore custodiâ habendum censeatis. Utrum horum vobis faciendum decreveritis, id profecto imprimis quod existimatione urbis vestræ dignum est decernetis; deinde ab omnibus præclaris belli ducibus magnam gratiam inibitis; nos denique, quicquid id vestrâ interesse putatis, haud mediocri sanè beneficio devincietis.

Vestrarum amplitudinem Studiofissimus

OLIVERIUS Protector Reipub.
Angliæ &c.

Ex Aula nostra Westmonasterio.

Aprilis An. Dom. 1657.

OLIVERIUS Protector Reip.
Angliæ, Scotiæ, Hiberniæ &c.

*Serenissimo ac Potentissimo Principi
ac Domino*

IMPERATORI Ducique magno
universæ **RUSSIÆ**, Soli Domino
*Voladomæri, Moschoæ, Novogrodi, Regi
Cazani, & Astracani, Syberia, Domino
Vobskoæ, Magno Duci Smolenchy, Tuer-
coiæ, & aliarum, Domino ac Magno
Duci Novogrodæ, Inferiorumque Regio-
num Chernigori, Rezanscoæ & aliarum,
Domino omnis Plagæ Septentrionalis,
item Domino Everscoæ, Cartalinscæ,
aliarumque permultarum.*

S. P. D.

Anglorum Genti cum imperii vestri populis,
vetus amicitia, magnusque usus, id quod
nemo nescit, amplissimumque commercium
jamdiu fuit; illa verò virtus singularis, *Impe-
rator Augustissime*, qua majoribus suis Majestas
vestra longè præluceat, & quæ de ea est vicino-
rum omnium Principum opinio, Potissimum
nos movet, ut Majestatem Vestram & eximio
studio colamus, eique communicata cupiamus,
quæ & rei *Christianæ* & rationibus vestris haud
parum

parum conducere , nec minus nominis vestri gloriæ servire posse existimemus. Quapropter ornatissimum virum Dominum *Richardum Bradshaw*, summa fide, integritate, prudentia, usuque rerum, ex aliis etiam Legationibus, nobis cognitum, ad Majestatem Vestram misimus Oratorem; qui & singulare erga vos nostrum studium, summamque observantiam vobis exponat, & supradictis de rebus agere cum Majestate Vestra possit. Eum itaque ut benignè nostro nomine accipiatis, eique ut, quoties commodum erit, liberum aditum, auresque benignas, fidem denique in iis omnibus quæ proposuerit aut transegerit, eandem atque nobismetipsis, si coràm adfuissemus, præbere velitis rogamus; adeoque Majestati vestræ atque Imperio *Russico* fausta omnia à Deo Opt. Max. precamur.

Majestatis Vestrae Studiosissimus

OLIVERIUS Protector Reip.
Angliæ &c.

*Ex Aula nostra Westmonasterii.
die April. An. Dom. 1657.*

OLIVERIUS Protector Reip.
Angliæ &c.

Serenissimo ac Potentissimo Principi

CAROLO GUSTAVO

*Suecorum, Gothorum, Vandalorumque
Regi, Magno Principi Finlandia,
Duci Esthonia, Carelia, Brema,
Verda, Stetini, Pomerania, Cassubia
& Vandalia, &c.*

*Serenissime Potentissimeque Rex, amice
ac Fœderate Charissime,*

VIr nobilissimus *Gulielmus Jepsonus* Militum
Tribunus, & Parlamenti nostri Senator, cui
hoc munus honori erit, quòd Majestati Vestræ
hasce literas dabit, certiore eam faciet quanta
cum perturbatione ac dolore nuntium accepi-
mus belli illius funesti inter *Majestatem vestram*
Daniaque Regem coorti; quamque nobis cordi
ac studio sit, nullam nostram operam aut offi-
cium prætermittere, quoad Deus facultatem
dederit; ut huic ingruenti malo remedium ali-
quod maturè afferatur, eæque simul calami-
tates avertantur, quas inferri ex hoc bello reli-
gionis causæ communi necesse erit; hoc præ-
sentim tempore, quo adversarii nostri contra
Or-

Orthodoxa fidei professionem & professores cum consilia perniciosissima tum vires arctissime conjungunt. Hæc atque alia nonnulla permagni ad utriusque gentis commoda rationesque publicas momenti adduxere nos, ut hunc virum ornatissimum Internuntii extraordinarii prædictum munere ad Majestatem vestram mitteremus: Quem uti amicè recipiatis, eique, iis in rebus quas cum Majestate vestra nostro nomine communicaverit, summam fidem adhibeatis rogamus; cum is sit cujus fidei atque prudentiæ nos quoque plurimum tribuamus. Simul & illud petimus, ut Majestas vestra nostram ergo se resque suas benevolentiam singularem, atque studium persuasissimum sibi habeat; cujus nos argumenta certissima per omnem occasionem & propenso animo & officiis paratissimis præbebitis.

*Majestatis vestrae amicus & Fæderatus
conjunctissimus*

OLIVERIUS Protector Reipub
Angliæ &c.

*Ex Aula nostra Westmonasterii.
Aug. An. Dom. 1657.*

Excellentissimo Domino

DOMINO de BOURDEAUX

Serenissimi

REGIS GALLIARUM

Legato extraordinario.

Excellentissime Domine,

Mercatores quidam *Londino-derrienses Samuel Dausonus, Joannes Campsejus, & Joannes Nevinus* per libellum supplicem *Serenissimo Domino Protectori* ediderunt, se, posteaquam foedus inter hanc *Rempub. Regnumque Gallia* redintegratum intellexerant, An. Dom. 1655. navem quandam cui nomen *Anglicè The Speedwell*, melioris ominis causâ, quam eventus ferebat, impositum, *Joannes Ker* Magister erat, mercibus quibusdam ex portu *Derriensi Burdegalam* conveyendis onerasse; eam navem illic onere exposito, vinoque aliisque mercibus inde impositis, captam in reditu die 24. *Novembris* anni supradicti à duabus *Brestensum* Navibus armatis, quarum alteri *Adrianus Vindmian Swart*, alteri *Jacobus Jonsonus* præfuit, ab iisdem etiam in portum *Brivatem*, vulgo *Brestensem*, fuisse abductam; ibique & jure captam judicatam esse, & auctione venditam, cum mille centumque libras nostras æstimatione justâ valuisset, extra damnum mille librarum præterea datum: de quibus recuperandis omni se honesta ratione cum illius loci præfectis egisse;

id

id sibi haecenus frustra fuisse: se etiam moribus
 edictum curiæ maritimæ consecutos esse, quo
 citarentur in iudicium qui navem illam cepis-
 sent, autem jure esse captam defendere statuis-
 sent. Edictum hoc & recte atque ordine pro-
 mulgatum & redditum: idque ab ejusdem cu-
 riæ ministris publicis maturè *Domino Legato Gal-*
lia significatum esse: cum nemo contra com-
 paruisset, testes aliquot juratos de re iudicanda
 interrogatos esse. Quæ res cum à Petitoribus ad
 Celsitudinem Domini *Protektoris* delata sit, ab
 eoque cognitioni atque sententiæ Concilii man-
 data, cumque de facto ex testimoniis juratis
 libello supplici adjunctis abunde constet, Peti-
 toribusque liberum commercium *Burdegala* sit
 datum, mercesque illic emptæ atque impositæ vi
 sint in reditu ereptæ & occupatæ contra fœderis
 fidem, ut supra demonstratum est, quis non
 videt hoc esse æquissimum, aut navem cum
 onere Petitoribus restitui, aut de damno cum
 captæ navis tum juris persequendi plene satis-
 fieri? Peto igitur ab *Excellentia vestra* atque
 etiam Serenissimi Domini *Protektoris* nomine
 peto omnem velit operam dare, omnique ope-
 ræ authoritatem etiam sui muneris adjungere
 ut primo quoque tempore horum alterutrum
 fiat. Cum neque in causa æquiore laborare
 possit, neque mihi gratiore; qui eo diligen-
 tius curasse quod mandatum mihi est videbor,
 quo *Excellentia vestra* maturius quod suum est
 præstiterit.

Ex Alba Aula Augusti An. Dom. 1657.

OLIVERIUS Protector Reip.
Angliæ &c.

Serenissimo Principi

D^o. FREDERICO WILHELMO
*Marchioni Brandenburgensi Sacri
Romani Imperii Archi-Camerario ac
Principi Electori Magdeburgi, Prus-
siae, Juliae, Cliviae, Montium Stetini,
Pomeraniae, Cassubiorum Vandalo-
rumque, nec non in Silesia Crosnae &
Carnovia Duci Burggravio Norin-
bergensi, Principi Halberstadii &
Minda, Comiti Marcae & Ravensber-
gi, Domino in Ravenstein.*

S. P. D.

*Serenissime Princeps, Amice ac Fæderate
Charissime,*

Cum ea sit Celsitudinis vestrae singularis vir-
tus & pace & bello terrarum orbe toto jam
clara, ea magnitudo animi atque constantia,
ut amicitiam vestram omnes fere Principes Vi-
cini ambiant, amicum & socium nemo fidelio-
rem sibi aut constantiorem cupiat, ut nos
quoque in eorum numero esse intelligatis qui de
H vobis

vobis vestrisque egregiis de *Rep. Christiana* meritis quam optimè quamque præclarè sentiunt, nobilissimum virum *Gulielmum Jepsonum, Tribunum Militum, & Parlamenti nostri Senatorem* ad vos misimus, qui vobis nostro nomine & plurimam salutem dicat, & rebus vestris felicitatem omnem ominetur atque exoptet; nostram denique benevolentiam summumque studium erga vestram serenitatem verbis amplissimis exponat: eique proinde fidem, iis in rebus de quibus vobiscum egerit, eandem habeatis rogamus, ac si à nobismetipsis testata omnia atque confirmata coram essent.

*Ex Aula nostra Westmonasterio. Augusti
An. Dom. 1657.*

OLIVERIUS Protector Reip.
Angliæ &c.

Amplissimis Civitatis

**Hamburgensis Consulibus ac
Senatoribus**

S. P. D.

*Amplissimi, magnifici & spectabiles viri,
amici charissimi,*

CUm Vir ornatissimus *Gulielmus Jepsonus, Tribunus Militum, & Parlamenti nostri Senator, Ad Suecorum Regem Serenissimum* à nobis

bis missus vestram per urbem iter faciat, in mandatis dedimus, uti vos quoque ne præteriret nostro nomine insalutatos; neque non rogatos, ut si qua in re vestra autoritate consilio aut præsidio opus sibi esse judicaverit, ei quibus rebus potestis præstò esse velitis. Id quo libentius feceritis, eo majorem à nobis iniisse vos gratiam intelligetis.

*Ex Aula nostra Westmonasterio. die Augusti
Aa. Dom. 1657.*

Amplissimis Civitatis
Bremensis Consulibus ac
Senatoibus
S. P. D.

*Amplissimi, magnifici & Spectabiles viri.
amici charissimi,*

Qui noster animus erga vestram civitatem, quæque benevolentia cum propter puriorum apud vos Religionis cultum etiam propter urbis celebritatem sit, & sensistis aliàs, & quoties facultas dabitur sentieris. Nunc, cum ornatissimus vir *Gulielmus Jepsonus, Tribunus Militum, & Parlamenti nostri Senator* ad Serenissimum Regem *Suecia* per urbem vestram Orationis munere instructus iter faciat, hoc tantum in præsentia volumus, ut & vos ille peramanter perque amice nostro nomine salutet, & siquid

acciderit in quo vestra ope atque amicitia usus sibi esse possit, id uti à vobis pro nostra necessitudine peteret. Qua in re non magis defuturos vos esse confido quam de nostro erga vos amore singulari ac studio dubitare debetis.

Westmonasterio ex Aula nostra. die Aug.

An. Dom. 1657.

OLIVERIUS Protector Reip.
Angliæ &c.

Amplissimis Civitatis

Lubecensis Consulibus ac
Senatoribus

S. P. D.

*Amplissimi, magnifici & Spectabiles viri,
amici charissimi,*

GUlielmus Jepsonus vir nobilissimus, *Militum Tribunus*, & *Parlamenti nostri Senator* ad Serenissimum *Suecorum Regem* ab urbe vestra haud longe castra habentem publico Munere ornatus proficiscitur. Quapropter ei per urbem vestram aut ditionem iter facienti ut omni adjumento, si opus erit, atque præsidio, pro nostra amicitia atque commercio, adesse velitis rogamus. De cætero & salutatos vos esse nostro nomine per amice volumus, deque nostro erga
VOS

(173)

vos propenso animo ac voluntate esse persuasissimos.

*Westmonasterio ex Aula nostra. die Aug.
An. Dom. 1657.*

OLIVERIUS Protector Reip.
Angliæ &c.

Amplissimis Civitatis

Hamburgensis Consulibus ac
Senatoribus

S. P. D.

*Amplissimi, magnifici & spectabiles viri,
amici charissimi,*

Qui hæc ad vos literas perfert *Philippus Meadowe* Oratoris munere à nobis instructus ad Serenissimum *Dania Regem* per Urbem vestram proficiscitur. Eum, siquid erit, in quo vestram authoritatem adjumento sibi fore aut præsidio existimaverit, commendatum vobis magnopere volumus. Nostraque commendatio quo solet esse apud vos pondere, eodem uti nunc sit rogamus; vobis vicissim, siquid ejusmodi occurrit non defuturi.

*Ex Aula nostra Westmonasterio. die Aug.
An. Dom. 1657.*

OLIVERIUS Protector Reip.
Angliæ &c.

Serenissimo Principi

F R E D E R I C O

*Heredi Norwegia, Duci Slesvici,
Holsatia, Stormaria, Ditmarsia,
Comiti in Oldenburg &
Delmenhorst.*

Serenissime Princeps, amice Charissime,

Missus à nobis Vir Domi nobilis *Gulielmus
Jepsonus, Militum Tribunus, & Parlamenti
nostri Senator* ad Serenissimum *Suecorum Regem,*
quod paci communi, Reique *Christiana* felix
faustumque sit, Legationem obit. Ei inter alia
negotium dedimus, ut cum in itinere salutem
plurimam Serenitati Vestræ nostro nomine
dixisset, pristinamque nostram benevolentiam
& constantissima studia significasset, ab ea
quoque peteret, ut autoritate vestrâ munitus
iter tutum atque commodum habere per ve-
stram ditionem possit. Quo beneficio Celsitudo
vestra nos nostraque vicissim officia majorem
in modum demerebitur.

*Westmonasterio ex Aula nostra. die Aug.
An. Dom. 1657.*

OLI-

OLIVERIUS Protector Reip.
Angliæ

Serenissimo Principi

F E R D I N A N D O
Magno Duci Hetruriæ.

Serenissime Dux magne, amice charissime,

OSTendit nobis per libellum supplicem Societas Mercatorum nostrorum qui ad oras *Mediterranei Maris Orientales* negotiantur, Præfectum quendam navis *Lodoviculi*, sive *Anglicè The Little Lewis*, nomine *Gulielmum Ellum*, cum *Alexandria* in *Egypto* esset, conductum à Satrapa *Memphitico* ut *Oryzam*, *Saccharum* & *caphiam*, ipsius *Turcarum* Principis in usum *Constantinopolim* aut *Smyrnam* comportaret, classi se *Otomanicæ* in itinere subduxisse, & , contra datam fidem, navis totum onus *Liburnum* avertisse: ibi prædâ potitum nunc agere. Quod facinus, pessimi sanè exempli, cum *Christianum* nomen probro, Mercatorum fortunas degentium sub *Turca* direptionis periculo obiciat, petimus à Celsitudine Vestra, ut illum hominem comprehendi, & in custodiam tradi, navemque & bona retineri jubeat, quoad significatum à nobis erit curasse nos res illas *Turcarum* principi reddendas. Vestræ Celsitudini sicubi

(176)

nostris officiis usus vicissim erit , paratissima
omni tempore fore profitemur.

Celsitudinis Vestrae Studiosissimus

OLIVERIUS Protector Reipub.
Angliæ &c.

Westmonasterio ex Aula nostra. die Sept.

An. Dom. 1657.

OLIVERIUS Protector Reip.
Angliæ &c.

Serenissimo Principi ac Domino

DO. FREDERICO WILHELMO

Marchioni Brandenburgensi , Sacri Ro-
mani Imperii *Archi-Camerario* , ac Prin-
cipi Electori Magdeburgi, Prussiæ, Juliae,
Cliviæ, Montium, Stetini, Pomeraniæ,
Cassubiorum, Vandalorumque, nec non in
Silesia, Crosna & Carnoviæ Duci, Burg-
gravio Norinbergensi, Principi Halber-
stadii & Mindæ, Comiti Marcæ & Ra-
vensbergi, Domino in Ravenstein.

*Serenissime Princeps, amice ac Fœderate
charissime,*

Alteris ad Celsitudinem Vestram literis per
Oratorem nostrum *Gulielmum Jephsonum*
aut redditis aut brevi reddendis Legationis ipsi
à nobis mandatæ fidem fecimus ; idque sine

VC-

uestrarum virtutum aliqua mentione, nostræque
 erga vos benevolentia, significatione facere non
 potuimus. Verum nequis vestra de rebus Pro-
 testantium egregiè merita, quæ summâ om-
 nium prædicatione celebrantur, nos obiter te-
 tigissè tantùm videamur, resumendum nobis
 nunc idem argumentum, nostraque officia non
 libentiùs quidem aut animo propensiore, ali-
 quanto tamen prolixiùs deferenda Serenitati ve-
 stræ censuimus. Et meritò sanè, cum ad aures
 nostras quotidie perferatur, fidem vestram atque
 constantiam omnibus tentatam machinis, Soli-
 citatam technis, labefactari tamen, & ab
 amicitia fortissimi Regis ac socii, nullo modo
 posse dimoveri: idque cum eo loco Suecorum
 res nunc sint, ut in retinenda eorum societate
 Celsitudinem vestram Reformatæ potius Reli-
 gionis causa communi, quàm suis commodis
 duci manifestum sit: cumque hostibus vel oc-
 cultis vel jam prope imminentibus cinctâ un-
 dique & penè obsessa sit, copiae ut sint validæ
 non tamen sint maximæ, eâ tamen firmitate
 animi ac robore esse, eo consilio ac virtute im-
 peratoriâ, ut unâ vestrâ voluntate niti totius
 rei summa ac moles, bellicque huius maximi
 exitus pendere videatur. Quapropter nihil est
 quod dubitet Celsitudo vestra quin de amicitia
 nostra summoque studio polliceri omnia sibi
 possit; qui vel ipsi ab omni laude derelicti nobis
 videremur, si præclarâ istâ fide atque constan-
 tiâ, cæterisque vestris laudibus minùs delecta-
 remur, aut vobisipsis communi Religionis no-

mine minus deberemus. Quòd si rebus ab ornatissimo Viro *Joanne Friderico Schlezer* Consiliario & Oratore apud nos vestro propositis respondere, pro eo ac studemus, hætenus non potuimus (quanquam is omni assiduitate ac diligentia id agit atque contendit) conditioni rerum nostrarum hoc velit imputare Celsitudo vestra rogamus; sibi que imprimis persuadere nihil nobis esse antiquius aut optatius, quam ut vestris rationibus cum Religionis causa tam conjunctis usui quam plurimum atque subsidio esse possimus. Interim tam clara virtus ac fortitudo ne ullo tempore deficiat aut opprimatur, dignæ laude aut fructu careat Deum Opt. Max. precamur.

Celsitudini Vestrae Studiosissimus

OLIVERIUS Protector Reip.
Angliæ &c.

*Ex Aula Nostra Westmonasterio. die Sept.
An. Dom. 1657.*

Excellentissimo Domino, Domino de *Bordeaux* Serenissimi
Galliarum Regis Legato
extraordinario.

Excellentissime Domine,

Postulavit à Serenissimo Domino *Protectore,*
Lucas Lucius Mercator *Londinensis* de sua qua-
dam

dam navis, cui nomen *Maria*, quæ cum ab *Hibernia Bajonam* peteret, vi tempestatis ad *sanum divi Joannis de Luz*, appulsa, ibi retenta & occupata est actione *Martini* cujusdam *De Lazon*; nec restituta donec à procuratoribus Mercatoribus illius satisficeretur, se de illa navi atque onere cum *Martino* lege experturos. Tulit enim præ se *Martinus* deberi sibi grandem à *Parlamento Angliæ* pecuniam, mercium quarundam suarum nomine quæ in navi quadam *Santa Clara* anno 1642. *Parlamenti* Auctoritate sunt retentæ. Verùm cum satis constaret, *Martinum* illum earum mercium verum dominum non esse, sed cum *Antonio* quodam *Fernandez* verorum dominorum *Richaldi* & *Iriati* jus persequi, dissidentibusque inter se *Martinio* & *Antonio*, decreverit *Parlamentum* uti merces illæ retinerentur quoad lege esset decisum utri eorum reddendæ essent, paratusque fuerit semper *Antonius* lege agere; contrà, neque *Martinus* neque pro eo quisque in judicio hætenus comparuerit, quæ omnia ex *Luca* Petitoris libellis libello supplici annexis liquent; iniquissimum sanè est, ut is, qui jus suum supposititium cum *Antonio* collegâ suo de alienis bonis experiri apud nos recusat, cogeret nostros homines verosque dominos de suis bonis in aliena ditione contendere: Quin idem æquitati vestræ atque prudentiæ videatur, non dubitat Serenissimus Dominus *Protektor*; à quo sum jussus hanc *Luca Lucii* causam æquissimam *Excellentiæ Vestræ* singularem in modum commendare: ne *Martino*, qui jus

alienum apud nos persequi negligit , eo obtentu aliis eripiendi jus suum apud vos potestas detur.

Excellentia Vestra Studiosissimus.

Westmonasterio. die Octob.

An. Dom. 1657.

O L I V E R I U S Protector Reip.

Angliæ &c.

Serenissimo

Duci ac Senatui Reip. Venetæ.

Serenissime Dux atque Senatus, amici charissimi,

Nuntii rerum vestrarum contra *Turcas* felicissimè gestarum tam crebri ad nos perferuntur , ut nobis non sæpius ulla de re ad vos scribendum , quam de insigni aliqua victoria gratulandum sit. Hanc recentissimam , & Reip. vestræ quam maxime lætam atque opportunam cupimus , & , quod gloriosissimum est , *Christianorum* omnium sub *Turca* servientium quam maxime liberatricem. Nominatim *Thomam Gatileum* navis , cui nomen *The Relief* , olim præfectum , *Serenitati vestræ ac Senatui* , tametsi non nunc primum , nunc tamen eo libentius , quo latiori tempore , quinquennalem captivum commendamus. Ei cum à vobis imperatum esset , ut cum navi sua Reip. vestræ operam navaret , solus cum multis hostium triremibus

con.

congressus, nonnullas depressit, magnamque stragem edidit; tandem combustâ navi captus vir fortis, deque *Veneta Rep.* tam benè meritus, quintum jam annum in misera servitute *Barbarorum* degit. Unde se redimat facultatum nihil est; nam quicquid erat, id à *Celsitudine vestra & Senatu*, vel Navis vel bonorum vel stipendii nomine deberi sibi ostendit. Verùm ut facultates non decissent; hostes tamen non aliâ lege dimissuros se cum profitentur, quam si suorum aliquis, qui illis in pretio æquè sit, permute-
tur. Petimus itaque magnopere à *Vestra* atque *Senatus Celsitudine Serenissima*, petit per nos senex miserimus, captivi pater, mœroris & lachrymarum plenus, quæ nos quidem permoverunt; ut primùm quoniam ex tot prosperis præliis *Turcarum* tanta copia captorum vobis est, unum aliquem ex eo numero, quem illi accipiant, hostem vestro milite fortissimo, nostro cive, senis mœstissimi filio unico commutare velitis. Deinde, ut quod stipendii, vel aliis nominibus ipsi à *Rep.* debetur, id quam primùm velitis patri aut procuratori ipsius annumerandum curare. Priori quidem rogatu nostro, vel potius æquitate vestrâ effectum est, ut statim re cognitâ, putatisque rationibus constitutum esset quid debeatur: verum illum supputationem, urgentibus fortasse aliis negotiis, nulla solutio secuta est. Nunc miseri conditio dilationem salutis diutius non fert: cum, si omnino salvum vultis, danda opera est, ut squalore illo carceris teterimo quamprimùm liberetur.

Id sine mora , sine hortatu etiam nostro humanissimâ voluntate vestrâ facturos vos esse confidimus : quandoquidem justitiâ , moderatione , atque prudentiâ non minus quam belli gloriâ victoriisque floretis : Atque ut diutissimè floreatis , devicto hoste potentissimo , Deum Opt. Max. precamur.

Celsitudinum Vestrarum Studiosissimus

OLIVERIUS Protector Reipub.
Angliæ &c.

*Westmonasterio ex Aula nostra. die Octob.
An. Dom. 1657.*

OLIVERIUS Protector Reip.
Angliæ &c.

Excelsis & Præpotentibus Dominis

FOEDERATI BELGII
Ordinibus

S. P. D.

*Excelsi & Præpotentes Domini, Amici ac
Fœderati charissimi,*

Redit ad vos Vir illustrissimus *Gulielmus Norton* Legatus vester annis jam aliquot apud nos extraordinarius : sed ita redit , petito ad tempus duntaxat à vobis commeatu , ut cum brevi reversurum speremus. Eâ enim est fide, vigilantia,

gilantiâ, prudentiâ, æquitate apud nos in suo munere versatus, ut majorem in unoquoque genere virtutem ac probitatem neque nos desiderare in Legato, viroque optimo neque vos possitis; eo animo ac studio ad pacem inter nos & amicitiam sine furo & fraude conservandam, ut illo hanc Legationem obeunte quid inter nos offensionis aut scrupuli suboriri queat, aut pullulare, non videamus. Et discessum sanè ejus molestiore animo ferremus, hac præsertim rerum ac temporum inclinatione, nisi persuasissimum nobis hoc esset, neminem melius posse aut fidelius vel rerum utrobique statum, vel nostram erga *Celsitudines vestras* benevolentiam studiumque integrum coràm exponere. Quapropter hunc ut Virum undiquaque præstantissimum, deque Rep. & suâ & nostrâ optime meritum accipere redeuntem velitis rogamus: sicuti & nos verissimo nostrarum laudum testimonio ornatum abeuntem dimisimus prope inviti. Deus ad ipsius gloriam ecclesiæque præsidium *Orthodoxa* vestris rebus felicitatem, nostræ amicitiae perpetuitatem concedat.

Celsitudinum Vestrarum Studios.

Westmonasterio ex Aula nostra. die Novemb.

An. Dom. 1657.

OLIVERIUS Protector Reip.
Anglia, &c.

Excelsis & Præpotentibus Dominis
FOEDERATI BELGII
Ordinibus

S. P. D.

*Excelsi & Præpotentes Domini, Amici Nostri
ac Fœderati Charissimi,*

Georgius Duningus Vir nobilis, nobis est multis ac variis negotiis summâ fide, probitate ac solertiâ perspectus jam diu & cognitus. Eum, ut apud vos Oratoris munere fungatur, mittendum censuimus, mandatisque nostris amplissimè instruximus. Eum itaque amico, ut consuevistis, animo recipiatis rogamus; & quoties habere se significaverit, quod nostro nomine vestrum cum *Excelsis Ordinibus* agat, amicè audire, fidemque adhibere; & quæ vos vicissim communicanda nobis censebitis, ea omnia, sicuti rectè potestis, perinde ac si nos ipsi coram essemus, ei committere velit. De cætero vobis vestræque Reip. ad Dei gloriam ecclesiæque præsidium secundas res omnes ex animo præcamur.

Celsitudinum Vestrarum Studiosissimus

OLIVERIUS &c.

Westmonasterio ex Aula nostra. die Decemb.

An. Dom. 1657.

OR.

ORDINIBUS HOLLANDIÆ.

CUM ea nostræ Reip. cum vestra intercedat necessitudo, ea sint utrinque negotia, ut sine Oratore atque interprete vel hinc vel inde misso restantæ ad utilitatem utriusque gentis constitui commodè vix possint, ex usu communi fore arbitrati sumus, ut *Georgium Duningum* Virum nobilem, multis ac variis negotiis summâ fide, probitate ac solertiâ spectatum jam diu nobis & cognitum eo munere instructum mitteremus: qui nostro nomine apud vos maneat, iis maxime officiis intentus, quibus nostra amicitia facta testata conservari posse quam diutissimè videatur. Hac de re cum ad Excelsos & Præpotentes Ordines scripsimus, tum vos quoque qui in Provinciâ vestrâ summæ rei præsidetis & Fœderati Belgii tanta pars estis certiores faciendos per litteras duximus; ut & nostrum Oratorem eâ ratione quâ convenit accipiat, & quæ ille cum *Excelsis Dominis Ordinibus* transegerit, ea vobis persuadeatis peræque firma ac rata nos esse habituros, ac si ipsi rebus transactis coram interfuissemus. Deus consilia vestra & facta omnia ad gloriam suam & Ecclesiæ pacem dirigat.

Westmonasterio &c. Decemb. 1657.

OLIVERIUS Protector Reip.
Angliæ &c.

Serenissimo Principi

F E R D I N A N D O
Magno Duci Hettruriæ.

*Serenissime Dux Magne, amice noster
plurimum colende,*

Permagnam nobis attulere voluptatem literæ
Celsitudinis Vestræ decimo Novemb. Floren-
tiæ datæ; in quibus benevolentiam erga nos
Vestram eo vidimus perspectiorem, quanto
res ipsæ verbis, facta promissis certiora bene-
volentis animi indicia sunt: quæ nempe rogavi-
mus *Celsitudinem* vestram, juberet illum navis
Lodovici parvi præfectum *Gulielmum Ellum*,
qui fidem *Turcis* datam turpissimè fregerat, &
ipsum comprehendi, & navem cum mercibus
in portu retineri, quoad *Turcarum* quæ essent
redderentur, ne nomen *Christianum* per istius-
modi furta labem aliquam susciperet, ea omnia,
& summo quidem studio, quod satis intelligen-
mus, scripsit *Celsitudo Vestra* se præstitisse. Nos
itaque cum pro accepto beneficio gratias agi-
mus, tum hoc porro nunc petimus, quando-
quidem satisfactum iri *Turcis* Mercatores in se
receperunt, ut & Præfectus ille custodiâ liberetur,

tur, & navis cum mercibus quamprimum dimittatur; ne Turcarum forte rationem potiorum, quam nostrorum civium habuisse videamur. Interim *Celsitudinis Vestra* spectatâ voluntate erga nos singulari, & sanè gratissimâ sic libenter fruimur, ut ingratitude notam non recusemus, nisi pari promptitudine vobis vicissim gratificandi occasionem quam primum dari nobis exoptamus, ex qua nostram quoque in reddendis officiis promptitudinem animi rebus ipsis erga vos demonstrare possimus.

Celsitudinis Vestra Studiosissimus

OLIVERIUS &c.

Westmonasterio ex Aula nostrâ.

Decemb. An. Dom. 1657.

OLIVERIUS Protector Reip.
Angliæ &c.

Serenissimo ac Potentissimo Principi

CAROLO GUSTAVO

Suecorum, Gothorum, Vandalorumque Regi.

*Serenissime Potentissimeque Rex, Amice ac
Fæderate invictissime,*

Multa simul attulere nobis literæ *Majestatis vestra* 21. Feb. in *Castris Selandicis* datæ, cur, & privatim nostrâ, & totius reipub. *Christiana*

stiana causâ , lætitiâ haud mediocri afficeremur : primum quod Rex *Dania* , non suâ credo voluntate aut rationibus , sed hostium communium artibus factus hostis , repentino vestro in intimum ejus regnum adventu , sine multo sanguine , eò sit reductus , ut , quod reserat , utiliore sibi pacem bello contra vos suscepto tandem judicaverit : deinde cum is eam nullâ se ratione citius posse consequi existimaret , quam si delata sibi jamdiu ad conciliandam pacem nostrâ operâ uteretur , quòd *Majestas Vestra* solis Internuntii nostri literis exorata , tam facili pacis concessione ostenderit , quantum nostrâ amicitia atque gratiâ interpositâ apud se valeret : meumque imprimis in hoc tumpio negotio officium esse voluerit , ut pacis tam salutaris *Protestantium* rebus , uti spero , mox futuræ ipse potissimum unus conciliator atque auctor propemodum essem. Cum enim Religionis hostes conjunctas opes vestras alio pacto frangere se posse desperarent , quàm si vos inter vos commisissent , habebunt nunc , profectò quod pertimescant , ne armorum animorumque , ut spero , vestrorum hæc inopinata conjunctio ipsis belli hujus conflatoribus in perniciem vertat. Tu interim , Rex fortissime , mactæ tuâ egregiâ virtute ; & quam felicitatem in rebus tuis gestis victoriarumque cursu contra Regem nunc socium hostes Ecclesiæ nuper admirati sunt , eandem in suâ rursus clade , Deo benè juvante , fac sentiant.

Westmonasterio ex Palatio Nostro.

30. die Martii 1653.

O L I V E R I U S P r o t e c t o r R e i p .
Angliæ &c.

Serenissimo Principi

F E R D I N A N D O
Magno Duci Hetruriæ.

Serenissime Princeps,

Q U O D satisfacturum arbitramur *Celsitudini Vestrae* de nostro classis præfecto qui ad portus vestros nuper est delatus, vestro apud nos Oratori respondimus: Interim per libellum supplicem nobis ostendit *Joannes Hosierus Londinensis*, cujusdam navis, cui *Domina* nomen, Magister, se, cum anno 1656. mense Aprili, navem suam ex syngrapha (chartam partitam Ius nostrum vocat) *Josepho Armano Italo* cuidam locasset, isque factas in syngrapha pactiones ter apertè fregisset, coactum esse demùm, ne navem suam, totumque onus ejus, sortem denique totam amitteret, more mercatorio declaratâ publicè ejus fraude, & in tabulas publicas relatâ, *Liburni* in jus eum vocare: cum autem, ut fraudem fraude tueretur, adhibitis in societatem duobus aliis negotiatoribus litigiosis, de pecunia *Thomæ* cujusdam *Clutterbuxi* sex mille octonos, conficito quodam obtentu, petitoris hujus nomine occupasse: se, post multas impensas consumptumque tempus, jus suum *Liburni*

burni obtinere non posse ; ne audere quidem , propter adversariorum minas atque insidias , in iudicio illic comparere. Petimus itaque à *Celsitudine vestra* , ut cùm huic homini oppresso subvenire , tum hujus adversarii insolentiam pro consuetâ suâ justitiâ velit coercere : frustrâ enim auctoritate Principum leges essent civitatibus latæ , si vis atque injuria , cùm , ne omnino sint leges , efficere non possint , possint efficere terrore ac minis , ne quis ad eas audeat confugere. Verum in hujusmodi audaciam quin maturè animadversura sit *Celsitudo Vestra* , non dubitamus ; cui pacem prosperaque omnia à Deo Opt. Max. precamur.

Westmonasterio ex Aula Nostra.
die 7. April. An. Dom. 1658.

Serenissimo Potentissimoque Principi

L U D O V I C O
 Galliarum Regi.

*Serenissime Potentissimeque Rex , Amice ac
 Fœderate augustissime ,*

M Eminisse potest *Majestas Vestra* quo tempore inter nos de renovando fœdere agebatur , quod optimis auspiciis initum multa utriusque populi commoda , multa hostium communium exinde mala testantur , accidisse miseram illam *Convallensium* occisionem , quorum

rum causam undique desertam atque afflictam
 vestræ misericordiæ, atque tutelæ summo cum
 ardore animi ac miseratione commendavimus.
 Nec defuisse per se arbitramur *Majestatem Ve-*
stram officio tam pio, immo verò tam huma-
 no, pro eâ quâ apud *Ducem Sabaudia* valere
 debuit vel auctoritate vel gratiâ: nos certè
 aliiq; multi Principes ac Civitates, Legationi-
 bus, Literis, Precibus interpositis, non de-
 fuimus. Post cruentissimam utriusque sexus
 omnis ætatis trucidationem, pax tandem data
 est, vel potius inducta pacis nomine hostilitas
 quædam tectior: conditiones pacis vestro in
 oppido *Pinaroli* sunt latæ; duræ quidem illæ,
 sed quibus miseri atque inopes dira omnia atque
 immania perpeffi faciliè acquiescerent, modo
 iis, duræ & iniquæ ut sint, staretur; non sta-
 tur; sed enim earum quoque singularum falsâ
 interpretatione variisque diverticulis fides eludit-
 tur ac violatur; antiquis sedibus multi dejiciun-
 tur, religio patria multis interdicitur, tributa
 nova exiguntur, arx nova cervicibus imponi-
 tur, unde milites crebro erumpentes obvios
 quosque vel diripiunt vel trucidant: ad hæc nu-
 per novæ copiæ clanculum contra eos parantur;
 quique inter eos *Romanam Religionem* colunt,
 migrare ad tempus jubentur; ut omnia nunc
 rursus videantur ad illorum internecionem mi-
 ferrimorum spectare, quos illa prior laniena
 Reliquos fecit. Quod ego per dextram tuam,
Rex Christianissime, quæ fœdus nobiscum &
 amicitiam percussit, obsecro atque obtestor,
 per

per illud *Christianismi* Tituli decus sanctissimum, fieri ne siveris: nec tantam sæviendi licentiam non dico principi cuiquam (neque enim in ullum Principem, multo minus in ætatem illius principis teneram, aut in muliebrem matris animum tanta sævitia cadere potest) sed sacerimis illis sicariis ne permiseris; qui cum Christi Servatoris nostri servos atque imitatores sese profiteantur, qui venit in hunc mundum ut peccatores servaret, ejus mitissimo nomine atque institutis ad innocentium crudelissimas cædes abutuntur: eripe qui potes, quique in tanto fastigio dignus es posse, tot supplices tuos homicidarum ex manibus, qui cruore nuper ebrui, sanguinem rursus sitiunt; suæque invidiam crudelitatis in Principes derivare consultissimum sibi ducunt. Tu verò nec titulos tuos aut Regni fines ista invidiâ, nec Euangelium *Christi* pacatissimum istâ crudelitate foedarite regnante patiaris. Memineris hos ipsos avi tui HENRICI *Protestantibus* amicissimi dedititios fuisse; cum *Diguiarius* per ea loca, quâ etiam commodissimus in *Italiam* transitus est, *Sabaudum* trans *Alpes* cedentem victor est infecutus: dedititionis illius instrumentum in actis regni vestri publicis etiamnum extat; in quo exceptum atque cautum inter alia est, Ne cui postea *Corvallenses* traderentur, nisi iisdem conditionibus quibus eos avus tuus invictissimus in fidem recepit. Hanc fidem nunc implorant, avitam abs te Nepote Supplices requirunt: tui esse, quàm cujus nunc sunt, vel permutatione aliquâ, si fieri possit, malint

malint atque optarint : id si non licet , patrocini-
nio saltem , miseratione atque perfugio. Sunt
& rationes regni quæ hortari possint ut *Corval-
lenses* ad te confugientes ne rejicias ; sed nolim
te , *Rex* tantus cum sis , aliis rationibus ad de-
fensionem calamitosorum quàm fide à majori-
bus data , pietate , regiaque animi benignitate
ac magnitudine permoveri. Ita pulcherrimi facti
laus atque gloria illibata atque integra tua erit ,
& ipse Patrem misericordiæ ejusque filium
Christum Regem , cujus nomen atque doctrinam
ab immanitate nefaria vindicaveris , eo magis
faventem tibi atque propitium per omnem vi-
tam experieris. Deus Opt. Max. ad gloriam
suam , tot innocentissimorum hominum *Chri-
stianorum* tutandam salutem , vestrumque ve-
rum decus *Majestati Vestræ* hanc mentem inji-
ciat.

Westmonasterio. Maii

An. Dom. 1658.

Civitatibus

HELVETIORUM

Euangelicis.

Illustres atque Amplissimi Domini ,

Amici Charissimi ,

DE *Corvallsibus* Vicinis Vestris afflictissi-
mis , quàm sint à Principe suo gravia &
intolleranda religionis causâ passi , cum propter
1 ipsam

ipsam rerum atrocitatem horret prope animus recordari, tum ad vos ea scribere quibus notiora multo sunt, supervacuum duximus. Exemplam etiam literarum vidimus quas Legati vestri pacis jamdudum *Pinaroliana* hortatores atque testes ad *Allobrogum* Ducem illiusque *Taurinensis* consilii Præsidem scripserunt; in quibus ruptas esse omnes pacis conditiones, illisque miseris fraudi potius quàm securitati fuisse singulatim, ostendunt atque evincunt. Quarum violationem ab ipsâ statim pace datâ in hunc usque diem continuatam, & indies graviolem nisi æquo animo patiuntur, nisi se conculcandos planè & pessumdandos prosternunt atque abjiciunt, religione etiam ejuratâ, impendet eadem calamitas, eadem strages, quæ ipsos cum conjugibus ac liberis tertio ab hinc anno sic miserabilem in modum attrivit atque afflixit, & subeunda iterum si est, funditus eradicabit. Quid agant miseri? quibus nulla deprecatio, nulla respiratio, nullum adhuc certum perfugium paruit; res est cum feris aut cum furiis, quibus priorum cædium recordatio nullam poenitentiam, aut suorum civium miserationem, nullum sensum humanitatis aut fundendi sanguinis satietatem attulit. Hæc ferenda planè non sunt, siue fratres nostros *Corvallenses Orthodoxæ Religionis* cultores antiquissimos, siue ipsam Religionem salvam volumus. Et nos quidem locorum intervallo plus nimio disjuncti, quod opis aut facultatis nostræ fuit & præstitimus ex animo, & præstare non desinemus. Vos qui non modo fratrum crucia-

tibus

tibus ac penè clamoribus, verum etiam eorundem furori hostium proximi estis, prospicite per Deum immortalem idque maturè quid vestrarum nunc partium sit; quid auxilii, quid præsidii vicinis ac fratribus alioqui mox perituris ferre possitis ac debeatis, prudentiam vestram ac pietatem, fortitudinem etiam vestram consulite. Causa certè eadem est Religio, cur iidem hostes vos quoque perditos velint, immo cur eodem tempore, eodem superiore anno, fœderatorum vestrorum intestino Marte perditos voluerint. Vestra duntaxat in manu post opem divinam videtur esse, ne purioris ipsa stirps Religionis vetustissima in illis priscorum fidelium reliquiis excindatur: quorum salutem in extremum jam discrimen adductam si negligitis, videte ne vosmetipsos paulo post proximæ vices urgeant. Hæc dum fraternè ac liberè hortamur, ipsi interea non languescimus: quod solum nobis conceditur tam longinquis, cum ad procurandam periclitantium incolumitatem tum ad sublevandam egentium inopiam, omnem operam nostram & contulimus & conferemus. Deus det utrisque nobis eam domi tranquillitatem ac pacem, eum rerum ac temporum statum, ut omnes nostras opes atque vires, omne studium ad defendendam ecclesiam suam contra hostium suorum furorem ac rabiem, convertere possimus.

*Westmonasterio ex Aula nostra. Maii
die An. Dom. 1658.*

Eminentissimo Domino

CARDINALI MAZARINO

S A L U T E M.

Eminentissime Domine ,

Illatæ nuper *Protestantibus* , qui *Valles* quædam *Alpinas* in ditione *Ducis Sabaudie* incolunt , gravissimæ calamitates cædesque cruentissimæ fecere ut inclusas has literas ad Majestatem Regiam , hæcque alteras ad *Eminentiam Vestram* Scripserim. Et quemadmodum de Rege Serenissimo dubitare non possum quin hæc tanta crudelitas , quâ in homines innoxios atque inopes tam barbarè sævitum est , vehementer ei displiceat atque offensa sit ; ita mihi facile persuadeo quæ ego à Majestate Regiâ illorum causâ miserorum peto , ad ea impetranda vestram quoque operam atque gratiam , velut cumulum , accessuram. Cum nihil planè sit quod *Francorum Genti* benevolentiam apud suos omnes vicinos *Reformatæ Religionis* cultores majorem conciliaverit , quam libertas illa ac privilegia quæ ex edictis suis atque actis publicis permixta *Protestantibus* atque concessa sunt. Et hæc quidem *Respublica* cum propter alias tum hanc potissimum ob causam *Gallorum* amicitiam ac necessitudinem majorem in modum expetivit.

De

De qua constituenda jamdiu cum *Legato Regio* apud nos agitur ejusque tractatio jam penè ad exitum perducta est. Quid! quòd etiam singularis benignitas *Eminentia Vestra*, ac moderatio, quam in summis Regni rebus gerendis erga *Protestantes Gallia* semper testata est, à prudentiâ vestrâ & magnitudine animi ut hoc sperem atque expectem, facit; qua ex re & fundamenta arctioris etiam necessitudinis inter hanc *Rempublicam*, *Regnumque Galliarum* *Eminentia vestra* jecerit, meque sibi privatim ad officia omnia humanitatis ac benevolentiae vicissim reddenda obligaverit: adeoque hoc velim *Eminentia vestra* sibi persuassimum habeat.

Eminentia Vestra Studiosissimus.

OLIVERIUS Protector Reip.
Angliæ

Serenissimo ac Potentissimo Principi

LUDOVICO
Galliarum Regi.

*Serenissime Potentissimeque Rex, Amice
ac Fæderate Augustissime,*

T Homam Vice Comitem Falconbrigium Generum meum in *Galliam* proficiscentem, & ad testificandum obsequium suum & observantiam,

vaniam, qua *Majestatem Vestram* colit, venire in conspectum vestrum, *Regiamque Manum* osculari cupientem, tamen si propter consuetudinem ejus jucundissimam invitus dimitto, tamen cum non dubitem quin ab aula tanti Regis, in qua tot viri prudentissimi fortissimique versantur, multo instructior ad res quasque laudatissimas, & quasi consummatus ad nos brevi sit reversurus, oblitendum esse ejus animo ac voluntati non sum arbitratus. Et quanquam is est, nisi Ego fallor, qui per se satis commendatus, quodeunque accesserit, videri possit, tamen si se meâ gratiâ *Majestati Vestra* aliquanto commendatorem fuisse senserit, eodem me quoque beneficio affectum atque devinctum arbitror. Deus *Majestatem Vestram* incolumem, nostramque amicitiam firmissimam communi orbis *Christiani* bono quam diutissime conservet:

*Westmonasterio ex Aula nostra. Maii
die An. Dom. 1658.*

OLIVERIUS Protector Reip.
Angliæ, &c.

Eminentissimo Domino

CARDINALI MAZARINO.

Eminentissime Domine,

CUM *Thomam Vicecomitem Falconbrigium* Generum meum proficiscentem in *Galliam Serenissimo Regi* commendaverim, non potui quin eade re *Eminentiam Vestram* certiorem facerem, nec non vobis etiam eundem commendarem: id quantum ponderis atque momenti ad superiorem quoque commendationem allaturum sit non nescius. Quem certè fructum commorationis apud vos suæ, sperat autem non mediocrem hunc fore, percepturus est, ejus maximam partem favori vestro ac benevolentiae non poterit non debere; cujus prope sola mens ac vigilantia res tantas eo in regno sustinet ac tuetur. Quicquid ei gratum *Eminentia Vestra* fecerit, id mihi fecisse se existimet; id ego in multis vestris erga me humanitèr & amicè factis numerabo.

Westmonasterio. Maii.

An. Dom. 1658.

OLIVERIUS Protector Reip.
Angliæ &c.

Eminentissimo Domino
CARDINALI MAZARINO.

Eminentissime Domine

CUM illustrissimum virum *Thomam Bellas-*
sium Vicecomitem *Falconbrigium* Gene-
rum meum Serenissimi Regis adventum in ca-
strâ ad *Dunkirkam* gratulatum mitterem, eidem
præcepi ut *Vestram* quoque *Eminentiam* adiret,
meoque nomine & plurimam salutem dicat, &
gratias vobis agat, cujus potissimum fide, pru-
dentiâ, vigiliâ perfectum est, ut res Gallica
tam diversis in partibus, & præsertim in vicinâ
Flandriâ contra Hispanum hostem communem
tam prosperè geratur: à quo nunc celeriter, uti
spero, fraudum & insidiarum, quibus se maxi-
me tuetur, aperta atque armata virtus pœnas
reposcet: quod uti fiat quàm citissimè, nos
certè neque copiis, quantum possumus, neque
votis deerimus.

Westmonasterio ex Aulâ nostrâ.

Maii An. Dom. 1658.

OLIVERIUS Protector Reip.
Angliæ &c.

Serenissimo ac Potentissimo Principi

L U D O V I C O

Galliæ Regi.

*Serenissime Potentissimeque Rex, amice
ac Fœderate Augustissime,*

UT nuntiatum est venisse in castra *Majestatem vestram*, tantisque copiis infame illud oppidum piratarum atque asylum *Dunkirkam* obsedisse, & magnam cepi voluptatem, & spem certam, fore nunc brevi, Deo bene juvante, ut infestum minùs posthac latro ciniis mare tutiùs navigetur; fore ut *Hispanicas* fraudes, ducem alterum ad Hesdenæ proditionem auro corruptum, alterum ad Ostendam dolo captum virtute bellicâ *Majestas vestra* nunc brevi vindicet. Mitto itaque nobilissimum virum *Thomam Vicecomitem Falconbrigium* generum meum, qui & adventum vestrum in tam propinqua nobis castra gratularetur, & coràm exponat quanto nos studio *Majestatis vestrae* res gestas non junctis solum viribus nostris, sed votis etiam omnibus prosequamur, uti Deus Opt. Max. & ipsam incolumem, & nostram

I s

ami-

amicitiam firmissimam communi orbis *Christiani* bono quam diutissimè conservet.

Westmonasterio ex Aula nostra. Maii
Aa. Dom. 1658.

Serenissimo Principi

F E R D I N A N D O,
Duci Magno Hetruriæ.

Serenissime Dux Magnæ,

CUM Celsitudo vestra in omnibus quidem
litteris suis summa erga nos benevolentiam
suam nobis semper significaverit, dolemus id
præfectoris vestris ac ministris aut tam obscure
significatum, aut tam malè esse intellectum,
ut in Porta *Liburnensi*, ubi maxime quæ vestra
sua erga nos benevolentia intelligi oporteret, nos
nullum ejus fructum aut indicium percipere
queramus; immo alienum potius & hostilem
vestrorum in nos animum indies experiamur.
Quàm enim non amicis nostra classis *Libur-*
nensis usa nuperrime sit, quàm nullis adju-
ta rebus, quàm hostiliter denique accepta bis ab
illo oppido discedere coacta sit, cum ex eo ipso
loco multis rebus fide dignis, tum ex ipso
Navarcho nostro, cui cum classem credamus,
narrandi fidem derogare non possumus, satis
videtur nobis nimisque certò cognovissè. Pri-
or ejus adventu *Cal. Jan.* post redditas Celsitu-
dini

dini vestrae literas nostras, vestraque omnia humanitatis officia nostris hominibus ultro delata, petentibus ut portus *Ferrarii* commoditate utiliceret, responsum est, id concedi non posse, ne *Rex Hispania* scilicet noster hostis offenderetur. Et tamen quid est quod princeps amicus amico præbere communius possit, quam litoris ac portus aditum? quid est quod nos expectare ab hujusmodi amicitia possimus quæ hostium nostrorum animum ne offendant, incommodare nobis quam commodare, aut vel minimis rebus subvenire paratior sit. Et primo quidem ex singulis navibus duobus vel tribus nautis duntaxat excensus in terram, sive commercium (quam vos *Practicam* vocatis) est datum: mox ut auditum est in oppido, navem quandam *Belgicam*, quæ frumentum in *Hispaniam* portabat, à nostris esse interceptam, quod erat antea commercii statim adimitur; *Longlandius* qui nostris illic Mercatoribus præsidet, classem adire non permittitur; aquatio, quæ omnibus non planè hostibus libera est, non nisi sub armatis custodibus iniquo pretio, & quidem egerimè præbetur: tot nostris Mercatoribus qui non sine maximo vestrorum emolumento illic versantur, suos ne invisant populares aut ullare adjuvent interdicitur. Posteriore ejus adventu sub exitum mensis *Martii*, egressus ex navibus nemini datur: quinto post die cum naviculam quandam *Neapolitanam* prætoriana navis nostra incidentem in nos fortè excedisset ducenta plus minus tormenta ab oppido

classẽm versus disploduntur quorum nullum ictu nos læsit ne attigit quidem : quod argumento esse potest quàm longè hæc à Portu atque castelli ditione in alto gererentur , quæ vestros quasi portu violato sic sine causa irritarunt : confestim aquatorum nostrorum scaphæ intra portum oppugnantur ; una capitur , detinetur ; reposcentibus neque scapham neque homines redditum iri respondetur , nisi capta illa navis *Neapolitana* reddatur quam constat libero mari captam , ubi capi licuit. Ita nostri multis modis incommodati sine illo comæatu , quem numeratâ pecuniâ coemerant , abire denuo coguntur. Hæc si *Celsitudinis vestræ* voluntate ac jussu quod speramus non fiunt , peccimus id ostendat præfecti illius supplicio , qui amicitias Domini sui violare tam facile in animum induxit : sin est ut sciente ac volente vestrâ Celsitudine commissa hæc sint , cogitet nos , ut benevolentiam vestram plurimi semper fecimus , ita apertas injurias à benevolentia dignoscere didicisse.

Vester quoad licet bonus amicus

OLIVERIUS Protector Reip.
Angliæ &c.

*Westmonasterio ex Aula nstra. Maii
die An. Dom. 1658.*

O L I V E R I U S Protector Reip.
Angliæ &c.

Serenissimo potentissimoque Principi

L U D O V I C O

Galliæ Regi.

*Serenissime potentissimeque Rex, Amice
ac Fœderate Augustissime,*

Q Uòd tam celeriter illustri missâ Legatione
Majestas Vestra meum officium cumulo
rependit, cum singularem benignitatem, ani-
mique magnitudinem testata est suam, tum
meo etiam honori ac dignitati quantopere fa-
veat, non mihi solum declaravit, verum etiam
universo populo Anglicano: quo nomine Ma-
jestati Vestræ, pro eo ac de me merita est,
gratias & ago & habeo maximas. De victoria
quam conjunctis nostris copiis Deus contra ho-
stes felicissimam dedit, vobiscum unâ lætor;
nostrosque in eo prælio neque subsidiis vestris,
neque majorum suorum bellicæ gloriæ, neque
suæ denique virtuti pristinæ defuisse perquam
etiam gratum est. De *Dunkirka*, quam dedi-
tioni proximam *Majestas Vestra* sperare se scri-
bit, eam nunc deditam tam citò posse me rescri-
bere insuper gaudeo: neque unius Urbis jactura
duplicem perfidiam *Hispanum* propediem esse

Initutum spero ; quod captâ urbe altera effectum esse , velim *Majestas* etiam *vestra* tam citò possit rescribere. Quod reliquum pollicetur meas rationes curæ sibi fore , de eo regi optimo atque amicissimo pollicenti , ejusque Legato excellentissimo atque ornatissimo viro *Duci Crequiesi* idem confirmanti , non diffido ; Deumque Opt. Max. *Majestati vestræ Reique Gallicæ* domi bellique propitium exopto.

Westmonasterio. die Junii

An. Dom. 1658.

OLIVERIUS Protector Reip.
Angliæ &c.

Eminentissimo Domino

CARDINALI MAZARINO.

Eminentissime Domine.

CUM *Regi Serenissimo* per literas gratias agamus qui honoris & gratulationis reddendæ causâ , suæque lætitiæ de nobilissima recenti victoria mecum communicandæ Legationem Splendidissimam misit , ingratus tamen sum , nisi *Eminentia* quoque *vestra* debitas simul gratias per literas persolvam ; quæ ad testandam suam erga me benevolentiam , meique rebus omnibus quibus potest ornandi studium , nepotem suum præstantissimum atque ornatissimum adolescentem unâ misit , & si quem haberet apud
fc.

se propinquiorem aut quem pluris faceret , cum potissimum fuisse missurum scribit : additâ etiam ratione , quæ ab iudicio tanti Viri profecta ad meam haud mediocrem laudem atque ornamentum pertinere existimo ; nempe ut qui sanguine conjunctissimi sibi sunt in me honorando atque colendo *Eminentiam suam* imitarentur. Et humanitatis quidem , candoris , amicitiae vestrum in me diligendo exemplum haud postremum fortasse habuerint ; summæ virtutis summæque prudentiæ alia in vobis longe clario-
ra ; quibus regna resque maximas summa cum gloria administrare discant. Qua res uti possit *Eminentia vestra* quam diutissime quamque felicissime gerere ad totius *Regni Gallici* , immo totius *Rxp. Christianæ* commune bonum , vestrumque proprium decus , non defutura mea vota polliceor.

Eminentia Vestrae Studiosissimus.

*Westminsterio ex Aulanostra. die
Junia An. Dom. 1658.*

OLIVERIUS Protector Reip.
Angliæ &c.

Serenissimo Potentissimo Principi

CAROLO GUSTAVO

Suecorum, Gothorum, Vandalorumque
Regi &c.

Serenissime Potentissimeque Rex, Amice ac
Fœderate Charissime,

Quoties communium Religionis hostium importuna consilia variasque artes intuemur, toties nobiscum reputamus, quàm necessarium orbi *Christiano*, quamque salutare sit futurum, quo faciliùs adversariorum conatibus iri obviam possit, Protestantium Principes inter se, & potissimùm *Majestatem vestram* cum *Repub.* nostra arctissimo fœdere conjungi. Id à nobis quantopere sit, quantoque studio expetitum, quàm denique gratum nobis accidisset, si *Suecorum* nostræque res ea conditione ac loco fuissent, ut fœdus illud ex utriusque animi sententia sanciri, alterque alteri opportunissimo auxilio esse potuisset, Oratoribus vestris, ex quo primùm illi hoc apud nos egerunt, testatum reddidimus. Neque vero illi suo muneri defuerunt; sed quam cæteris in rebus consueverunt, eandem hac quoque in parte prudentiam

tiam ac diligentiam adhibuerunt. Verùm ea nos domi improborum civium perfidia exercuit qui in fidem sæpius recepti , res novastamen mō-
 liri , & cum exulibus, etiam cum hostibus *Hispa-*
nis discussa jam sæpe & profligata consilia repe-
 tere non desinunt , ut in propulsandis periculis propriis occupati , neque curam omnem , neque integras opes quod in votis erat , ad communem *Religionis* causam tuendam convertere hactenus potuerimus. Quod licuit tamen , quantumque in nobis situm erat , & antea studiosè præstitimus , & siquid in posterum *Majestatis vestrae* rationibus conducere videbitur , id non velle solùm , verùm etiam summâ ope vobiscum unâ agere per occasiones non desistemus. Interea *Majestatis vestrae* rebus prudentissimè fortissimèque gestis gratulamur atque ex animo lætamur : eundemque uti velit Deus felicitatis atque victoriæ cursum esse quam diuturnum ad sui numinis gloriam assiduis precibus exoptamus.

Westmonasterio ex Aula nostra. Junii
die An. Dom. 1658.

OLIVERIUS Protector Reip.
Angliæ &c.

Serenissimo Principi

Lusitaniæ Regi.

S. P. D.

Serenissime Rex, Amice ac Fæderate,

Ostendit nobis per libellum supplicem *Joanne Buffield Mercator Londinensis*, se anno 1649. merces quasdam *Antonio Joanni & Manueli Ferdinando Castaneo Tamirensibus* tradidisse, uti iis divenditis earum rationem mercatorum more sibi redderent: tum in *Angliam* dum navigaret, in piratas incidisse, spoliatumque ab iis damnum haud mediocre accepisse: hoc audito, *Antonium & Manuelem* eò quod hunc interfectum credebant, traditas sibi merces statim pro suis habuisse, adhuc etiam retinere, rationemque omnem de iis recusare; atque huic fraudi subsecutam paulo post *Anglicarum* mercium proscriptionem obtendere; coactum se demum superiore anno, hyeme mediâ in *Lusitaniam* redire, sua repetere; sed frustra; hos enim neque bona neque rationem ut reddant adduci posse; & quod mirum sanè videatur, privatam illarum mercium possessionem proscriptione

scriptione publicâ defendere: cùm videret se hominem longinquum deteriore conditione cum *Tamirensibus* in sua patria contendere, ad *Majestatem Vestram* se confugisse; Conservatoris judicium, qui judicandis Anglorum causis constitutus est, supplicem poposcisse; à Majestate Vestra rursus ad forensẽ illam cognitionem, unde confugerat, rejectum esse. Quod etsi per se iniquum non est, tamen cùm perspicuum sit *Tamirenses* istos vestro edicto publico ad suam privatam fraudem abuti, à Majestate Vestra majorem in modum petimus, ut causam hujus multis casibus afflictis, ad inopiamque reducti ad Conservatorem potius judicem proprium velit pro sua clementia integram remittere: quo possit inops fortunarum suarum quod superest ab illorum hominum infida societate recuperare: id, re cognitâ, quin Majestati vestræ nobiscum unâ maximè placeat non dubitamus.

Westmonasterio ex Aulâ nostrâ.
die Augusti 1658.

Serenissimo Principi

L E O P O L D O

**Austriæ Archiduci, Provin-
ciarum in Belgio sub Phi-
lippo Hispaniarum Regi
Præsidi.**

Serenissime Domine,

C*arolus Harbordus*, vir *Equestris* apud nos *Ordinis*, per libellum supplicem ad nos detulit, se bona quædam & supellectilem cum ex *Hollandiâ Brugas* in ditionem vestram asportasset, de iis, ne sibi per vim atque injuriam eripiantur, inopinatò periclitari. Ea nempe, cum à *Comite Suffolchiensi* pro quo se grandi ære alieno obstrinxerat, ex *Angliâ* Anno 1643. missa ad se idcirco fuissent, ut haberet, quò sibi satisfaceret, siquid pro illo dissolvere cogeretur, à *Richardo Grenvillo*, qui & ipse *Equestris Ordinis* esse fertur, occupari, & quo in loco custodiebantur, Effractis foribus atque articulis possideri: hoc solo titulo, deberi sibi nescio quid à *Theophilo Suffolchiensi Comite* defuncto, ex quodam nostræ *Curiæ Cancellariæ* decreto, eaque proinde bona quasi *Theophili Comitis* essent, eique decreto obnoxia, se referenda

ferenda in tabulas curasse : cùm ex nostris legibus neque ipse Comes , qui nunc est , & cujus hæc bona sunt eo decreto teneatur , neque bona ejus occupari aut retineri debeant : id quod ex sententiâ ejusdem Curiaë unâ cum hisce literis ad vos missâ , declaratur , quas quidem literas supradictus *Carolus Harbordus* à nobis petiit , uti per eas *Celsitudinem vestram* rogaram vellemus , ut bona illa & recentione omni , & iniquâ istâ *Richardi Grenvilli* Actione , primo quoque tempore liberentur : cùm hoc contra morem jusque Gentium planè sit , at cuiquam in aliena ditione eâ de re Actio detur , quæ in ea Regione , ubi causa Actionis orta est , legitimè dari non possit. Hanc causam ut Celsitudini vestræ commendaremus , & ipsa justitiæ ratio , & prædicata passim vestra æquanimitas permovit. Quod siquo tempore usus venerit , ut de jure aut commodis vestrorum apud nos agatur , haud remissâ profecto nostra studia , immo omni tempore propensissima experturos vos esse polliceor.

Celsitudinis Vestra Studiosissimus

OLIVERIUS Protector Reip.
Angliæ &c.

Westmonasterio.

Supremæ Curiaë Parlamenti Parisiensis.

Nos Commissarii Magni Sigilli *Anglia &c.* Supremam Curiam Parlamenti *Parisiensis* rogatam volumus curare velit uti *Miles, Gulielmus, & Maria Sandys* defuncti nuper *Gulielmi Sandys & Elisabethæ Soame* Uxoris ejus liberi, natione *Angli*, ætate nondum adultâ, *Parisiis*, ubi nunc in supradictæ Curia tutela sunt, ad nos quamprimum redire possint; eosque liberos *Jacobo Mowato Scoto*, Viro probo atque honesto velit committere, cui nos hanc curam delegavimus, ut eos & inde acciperet, & ad nos huc adduceret: recipimusque, occasione hujusmodi oblatâ, jus idem atque æquum subditis *Galliaë* quibuscunque ab hac Curia redditum iri.

L I T E R Æ
 RICHARDI Protectoris
 Nomine conscriptæ.

RICHARDUS Protector Reip.
 Angliæ &c.

Serenissimo ac Potentissimo Principi

L U D O V I C O
 Galliarum Regi.

*Serenissime ac Potentissime Rex, Amice ac
 Fæderate,*

Cum Serenissimus Pater meus gloriôsæ me-
 moriæ *Oliverius Reip. Angliæ Protector*,
 omnipotente Deo sic volente, supremum jam
 diem tertio *Septembris* obierit, Ego Successor
 ejus in hoc magistratu legitimè declaratus, ta-
 met si in summo mœrore ac luctu, non potui
 tamen quin de re tanta primo quoque tempore
Majestatem Vestram per literas certiore facerem,
 quam & mei patris & hujus Reip. am-
 cissimam hoc nuntio repentino haud lætaturam
 esse confido. Meum nunc est à *Vestra Majestate*
 pe

petere, de me sic velit existimare, ut qui nihil deliberatius in animo habeam, quam societatem & amicitiam quæ gloriosissimo meo parenti vestra cum Majestate fuit, summâ fide atque constantiâ colere; ejusque fœdera, consilia, rationes vobiscum institutas eodem studio ac benevolentia observare rataque habere: Legatum proinde apud vos nostrum eadem qua prius potestate præditum volo: quicquid id nostro nomine vobiscum egerit, ita accipere velitis rogo quasi à me ipso actum id esset. *Vestra* denique *Majestati* comprecor fausta omnia.

Westmonasterio ex Aula Nostra.

5. Septemb. 1658.

Eminentissimo Domino

CARDINALI MAZARINO.

Eminentissime Domine,

QUanquam nihil mihi acerbius accidere potuit, quàm de Serenissimi & præclarissimi Patris mei obitu scribere, tamen cum sciam quanti ille fecerit *Eminentiam Vestram*, quanti vos illum, neque dubitem quin *Eminentia Vestra*, cui summa Rei *Gallicæ* commissa est amici ac fœderati tam constantis tamque conjuncti mortem molestissime latura sit, permagni referre arbitratus sum, ut eam quoque, simul cum Rege, de hoc casu gravissimo per literas mone-

rem;

rem; vobisque etiam, quoniam id æquum est, confirmarem, me ea omnia sanctissimè præstiturum ad quæ præstanda vobis, rataque habenda Serenissimæ memoriæ Pater meus fœdere tenebatur: perficiamque ut illum, utpote vobis amicissimum omnique laude florentem, cum amissum meritò doletis, quàm minimè tamen quod ad servandam societatis fidem attinet, desideretis: cui etiam ad utriusque Gentis commune bonum vëstra quoque ex parte servandæ Deus *Eminentiam Vëstram* quàm diutissimè conservet.

Westmonasterio. Septemb. 1658.

RICHARDUS Protector Reip.
Angliæ &c.

Serenissimo ac Potentissimo Principi

CAROLO GUSTAVO
Suecorum, Gothorum, Vandalo-
rumque Regi &c.

Serenissime Potentissimeque Rex, Amice ac
Fœderate,

CUm videar mihi Paternam virtutem vix
satis posse imitari, nisi easdem quoque amicitias colam & retinere cupiam, quas ipse & virtute sibi quæsiit & sibi esse maxime colendas

das ac retinendas iudicio singulari duxit , non est quod dubitet *Majestas vestra* quin eodem se prosequi studio ac benevolentia debeam quâ Pater meus memoriæ serenissimæ est prosecutus. Tametsi igitur in hoc magistratus ac Dignitatis initio non eo loco res nostras reperiam ut in præsentia possim ad quædam capita respondere , quæ Oratores vestri in medium protulerunt , tamen & institutum à patre fœdus cum *Majestate vestra* continuare & arctius etiam conjungere mihi quidem magnopere placet ; rerumque utrinque statum simulac plenius intellexero , ad ea transigenda quæ cum utriusque reip. commodis potissimum conjuncta esse videbuntur , ero equidem semper , ad me quod attinet , promptissimus. Deus interim *Majestatem vestram* ad gloriam suam & *Orthodoxa Ecclesia* tutelam atque præsidium quam diutissimè conservet.

Westmonasterio ex Aula nostra.

Octob. 1658.

RICHARDUS Protector Reip.
Angliæ &c.

Serenissimo ac Potentissimo Principi

CAROLO GUSTAVO

*Suecorum, Gothorum, Vandalorum Regi,
Magno Principi Finlandiæ, Duci Scaniæ,
Esthoniæ, Careliæ, Brehmæ, Verdæ, Ste-
tini-Pomeraniæ, Cassubiæ & Vandaliciæ;
Principi Rugiæ, Domino Ingriæ & Wis-
mariciæ; nec non Comiti Palatino Rheni,
Bavariæ, Juliaci, Cliviæ & Montium
Duci.*

*Serenissime, Potentissime Rex, Amice ac
Fæderate,*

Binas accepi à *Majestâte Vestra* literas; alteras
per nuntium suum, alteras Legato nostro
D. Philippo Meadow ad me transmissas. Ex qui-
bus non solum dolorem suum de obitu Patris
mei Serenissimi veris animi sensibus expressum,
deque ipso *Majestâs Vestra* quàm præclarè sen-
serit, verum etiam de me quoque ejus in locum
suspecto quantam spem ceperit cognovi. Et ad
paternæ quidem laudis cumulum nihil posthac
amplius aut illustrius tanto authore accedere
potest meis certe in capeSSenda *Repub.* auspiciis
nihil felicius tanto Gratulatore, ad virtutes de-

nique patrias tanquam hæreditatem optimam
adeundas nihil quod accendat vehementius tan-
to hortatore potuit accidere. Ad rationes *Maje-
statis Vestræ* de communi *Protestantium* causa
nobiscum initas quod spectat, sic velim existi-
met, me quidem ex quo ad hæc gubernacula
accessi, quanquàm eo loco res nostræ sunt, ut
summam diligentiam, curam, vigilantiam do-
mi potissimum requirant, nihil tamen antiquius
aut deliberatius habuisse aut habere quam pater-
no fœderi cum *Majestate Vestrâ* percussio quan-
tum in me erit non deesse. Classem itaque in
mare *Balticum* mittendam cum iis mandatis
curavi quæ Internuncius noster quem ad hoc
totum negotium amplissimè instruximus, *Ma-
jestati Vestrâ* communicabit. Quam Deus Opt.
Max. incolumem prosperisque rerum successi-
bus fortunatissimam ad *Orthodoxam fidem* tu-
dandam diutissime conservet.

Westmonasterio ex Aula nostra.
die 13. Octob. 1658.

RICHARDUS Protector

Serenissimo ac Potentissimo Principi

CAROLO GUSTAVO,

*Suecorum, Gothorum, Vandalo-
rumque Regi &c.*

*Serenissime, Potentissimeque Rex, Amice
ac Fæderate,*

Mitto ad Majestatem vestram, quo nihil dignius aut præstantius possum mittere, Virum verè egrægium, vereque Nobilem *Georgium Aiscum, Equitem auratum*, non solum belli, & navalis præsertim scientiâ multis ex rebus fortiter gestis cognitum jam sæpe atque spectatum, verum etiam probitate, modestiâ, ingenio, doctrinâ præditum, moribus suavissimis nemini non charum, &, quod nunc caput rei est, sub signis *Majestatis Vestrae* virtute bellicâ toto orbe terrarum florentissimæ jam diu mereri cupientem. Velimque sic habeat *Majestas Vestra*, quicquid huic Viro muneris commiserit, in quo fides, fortitudo, experientiâ constare vel etiam præluce possit, neque fideliori neque fortiori, nec facile peritiori posse se quicquam committere. Quæ autem Ego illi negotia dedero communicanda *Vestra Majestati*, in iis expeditum aditum, aurem benignam velit rogo præbere, eamque fidem, quam nobis-

bismetipsis coràm fuisset habitura ; cum denique honorem, quem tali viro & suis meritis & nostrâ commendatione ornatissimo convenire judicaverit. Deus res vestras ad gloriam suam & *Orthodoxa Ecclesia* præsidium felici exitu fortunet.

Westmonasterio ex Aula nostra.

die Octob. 1658.

RICHARDUS Protector Reip.
Angliæ &c.

Serenissimo Potentissimoque Principi

CAROLO GUSTAVO,
Suecorum, Gothorum, Vandalorumque Regi &c.

*Serenissime Potentissimeque Rex, amice ac
Fæderate Charissime,*

DEtulit ad nos per libellum supplicem *Samuel Piggottus, Londinensis* Mercator, se nuper naves duas, (quarum alteri nomen *Posta*, Magister, *Tiddeus Jacobus*; alteri *The Water Dog*, magister *Garbrand Peters*) *Londino* in *Galliam* negotiandi causa misisse; eas inde sale onustas *Amsterdamum* petisse; *Amsterdamo* alteram saburrâ tantùm, alteram halece impositas cujus cum *Petro* quodam *Heinsbergo* Societas erat in mare *Balticum Stetinum* usque *Pomerania*,
quæ

quæ in vestra ditione est , ad exponendam illie
 halecem navigasse ; verùm utrasque hasce naves
 accepisse se alicubi maris *Baltici* à copiis qui-
 busdam vestris detineri ; tametsi ut huic malo
 occurreret cum utraque nave syngrapham sigil-
 lo curiæ maritimæ obsignatam una curaverit
 mittendam , qua & navium harum & mer-
 cium , exceptâ halecis parte supradictâ , unum
 se esse ac legitimum dominum demonstraret.
 Cujus rei cùm fidem apud nos plenam fecerit ,
 peto magnopere à *Majestate Vestra* (quando-
 quidem duarum navium jactura sine summo
 hominis detrimento fortunarumque forte om-
 niuni naufragio vix posse accidere videtur) uti
 mandet suis atque imperet illarum navium libe-
 ram primo quoque tempore dimissionem. Deus
 Majestatem Vestram ad gloriam suam , Eccle-
 siæque Orthodoxæ præsidium quàm diutissimè
 servet incolumem.

*Westmonasterio ex Aula Nostra ,
 Jan. 27. An. Dom. 1658.*

**RICHARDUS Protector Reip.
Angliæ &c.**

Celsis & Potentibus Dominis
OCCIDENTALIS FRISIÆ
Potestatibus

S. D.

*Celsi & Potentes Domini, amici ac
Fœderati Charissimi,*

GRavem ad me detulit querelam per libellum supplicem *Maria Grindaria* vidua, cum sibi à *Thoma Killegrao* vestro milite pecunia bene magna ante annos octodecim debeatur, se eum ne nullo modo adducere per Procuratorem posse, neque ut debitum solvat, neque ut de jure suo, si quid sit, velit lege experiri; id ne à procuratore viduæ cogi possit, petisse eum à Celsitudinibus vestris per libellum supplicem ne cui liceat eum lege persequi ullius pecuniæ ab se in *Anglia* debitæ. Ego verò si Celsitudinibus vestris hoc tantum significavero, viduam esse, egenam esse, multorum matrem parvulorum, cujus iste omnes prope fortunas avertere conatur, non committam ut apud vos, quibus divina præcepta atque adeo de viduis pupillisque non opprimendis notissima esse confido, graviore ullâ utendum cohortatione putem, ne
hoc

hoc fraudandi privilegium petitioni istius concedere velitis : id quod nunquam concessuros vos esse mihi persuadeo.

Westmonasterio ex Aula nostra.

Jan. 27. 1658.

RICHARDUS Protector Reip.
Angliæ &c.

Serenissimo potentissimoque Principi

LUDOVICO
Galliæ Regi.

*Serenissime potentissimeque Rex, Amice
ac Fœderate Augustissime,*

ACcepimus, idque non sine dolore, quâdam in *Provincia Protestantes* Ecclesias ab homine quodam male feriato ita indignè fuisse in sacris concionibus interpellatas, ut ea res magistratibus, ad quos hujus causæ cognitio *Gratianopoli* ex lege pertinebat, gravi animadversione digna censeretur : sed *Conventum Cleri*, qui iis in locis proximè habebatur, à *Majestate Vestra* impetrasse, ut res integra *Parisiis* ad Concilium Regium revocaretur : A quo dum nihil hactenus decernitur, Ecclesias illas & præsertim *Aquarionensem*, convenire ad colendum Deum prohiberi. Vehementer itaque à *Majestate Vestra* etiam

etiam atque etiam peto, primùm, ut quorum preces ad DEUM pro salute sua rebusque Regni prosperis non interdicat, eorum coitus publicos ad præcandum interdicere ne velit: deinde ut in illum hominem rei divinæ interpellatorem ex sententia illorum judicum, quibus hujusmodi causarum legitima atque consueta cognitio *Gratianopoli* data est, animadvertatur. Deus *Majestatem Vestram* quàm diuturnam atque incolumem conserveat; ut si hæc nostra vota vobis accepta sunt, Deoque grata esse existimatis, eadem ab illis etiam *Protestantibus Ecclesiis* quibus nunc interdicatur, pro vobis publice fieri, sublato illo interdicto, quàm primum velitis.

Westmonasterio. 18. Feb.

Anno 1658.

Eminentissimo Domino

CARDINALI MAZARINO.

Eminentissime Domine Cardinalis,

PROficiscitur in *Galliam*, ibique ad tempus commorari cogitat Illustrissima Domina defuncti nuper *Ducis Richmondia* Uxor cum Duce Filio Adolescentulo. *Eminentiam* itaque *Vestram* magnopere rogo, ut siquid acciderit in quo iis vestrâ autoritate, favore, patrocinio, utpote peregrinis, usus esse possit, ita eorum dignitatem tueri, vobisque haud vulgariter commendaram.

datam rebus omnibus habere velitis , ut ad vestram humanitatem erga omnes , præsertim tam illustri genere oriundos , eximiam , sentiant nostris literis quod accedere potuit cumuli accessisse : simul & hoc sibi persuadeat *Eminetia Vestra* commendationem suam , si quid à me hujusmodi postulabit , apud me non minus valituram.

Westmonasterio. 29. Feb. 1658.

RICHARDUS Protector Reip.
Angliæ &c.

Serenissimo ac Potentissimo Principi

J O A N N I

Portugalliæ Regi.

*Serenissime Potentissimeque Rex, Amice
ac Fæderate,*

TAmetsi multa sunt quæ ad Regem amicum & Reip. nostræ conjunctissimum necessario scribam , nihil est tamen quod faciam libentius quàm quod nunc facio , ut *Majestati vestræ, Regnoque Portugalliæ* insignem hanc proximam de communi hoste *Hispano* victoriam gratuler : qua non ad vestram tantummodo , verum etiam ad *Europæ* totius pacem ac respirationem , permagnum , atque in multos fortasse annos , allatum esse momentum nemo est quin intelligat.

Alterum est in quo victoriarum certissimum pignus justitiam *Majestatis vestrae* agnoscam, qua ex articulo foederis 24. per arbitros *Londini* datos, mercatoribus nostris est satisfactum, quorum naves onerarias *Brasilienfis Societas* conduxit. Unus est *Alexander Bencius*, Mercator *Londinensis*, cui, cum navis ejus, quæ *Tres fratres* vulgo nominatur, magistro *Joanne Wilkio*, duas navigationes conductâ onerataque navaverit, pactum stipendium persolvere Societas recusat: cum cæteris qui semel tantum navigarunt, jampridem persolutum sit. Quod cur sit factum non intelligo nisi si eorum judicio mercede dignior est, qui semel quàm qui bis meruerit. Vehementer itaque peto à *Majestate Vestra*, ut huic uni *Alexandro* cui duplum debetur, debita navatæ operæ satisfactio ne defiat; velitque pro autoritate sua quàm brevissimum solationis diem damni que simul sarcindi Sociis *Brasilienfis* constituere: quorum dilationibus effectum est ut datum inde mercatori damnum mercedem ipsam jam pene superet. Deus *Majestatem Vestram* lætis rerum successibus contra hostem augere iudicet & fortunare pergat.

Westmonasterio ex Amla nostra. 23. Feb.

An. 1658.

RICHARDUS Protector Reip.
Angliæ &c.

Eminentissimo Domino

CARDINALI MAZARINO.

Eminentissime Domine,

PER literas ad *Eminentiam vestram* octo circiter ab hinc mensibus *Jun. 13.* datas, causam *Petri Petti*, viri & singulari probitate præditi & ægregiis artibus in re navali nobis Reique publicæ utilissimi, commendavimus. Ejus nave *Edwardo* anno 1646. à quodam Gallo, cui nomen *Basconi*, *Thamisis* in ostio ut scripsimus, captâ, & in portu *Bononiensi* venditâ, quamquam Rex in *Consilio Regio 4. Novemb.* anno 1647. decreverat, ut quam censuisset Consilium pecuniæ summam damni accepti loco dandam, satisfactioni daretur, is tamen ex eo decreto nihil dum se fructûs percepisse ostendit. Cùm autem dubium mihi non sit, quin *Eminentia vestra* meo rogatu id omne mandaverit quod ad decretum illud primo quoque tempore exequendum pertineret, denuo nunc majoremque in modum peto, ut videre velit quid impedimento sit, cujusve negligentia aut contumacia factum, ut decreto Regio post annos jam decem non obtemperetur; velitque pro
sua

sua autoritate instare, ut decreta illa pecunia, quam irrogatam jamdiu existimamus, & exigatur quamprimum, & petitori nostro solvatur. Ita rem justitiæ imprimis gratam *Eminentia vestra* fecerit, & à me singularem præterea gratiam inierit.

Westmonasterio ex Aula nostra,

22. Feb. 1658.

Duæ sequentes Literæ, Richardo
abdicato , Restituti Parla-
menti nomine Scripti
sunt.

Parlamentum Reipub. Angliæ
Serenissimo Potentissimoque Principi
C A R O L O G U S T A V O
Suecorum , Gothorum , Vandolo-
rumque Regi &c.

Serenissime Potentissimeque Rex, Amice
Charissime,

CUm visum sit Deo optimo atque omnipo-
 tenti , penes quem solum conversiones
 omnes Regnorum , Rerumque publicarum
 sunt , Nos pristinæ auctoritati summæque *Re-*
rum Anglicarum administrandæ restituere , &
Majestatem Vestram eâ de re certiore esse fa-
 ciendam imprimis duximus , & vobis porro
 significandum , nos cùm Majestatis vestræ ut-
 pote *Protestantium Principis* potentissimi tum
 pacis inter vos *Daniaque Regem* , & ipsum
 quoque *Protestantium Principem* præpotentem ,
 non

non sine nostra opera atque officio benevolentissimo reconciliandæ, quantum in nobis situm est, esse studiosissimos. Volumus itaque ut Internuntio nostro extraordinario, *Philippo Meadows*, quo munere ab hac repub. apud *Majestatem Vestram* hætenus fungitur, idem omnino munus nostro nunc nomine prorogetur: eique adeo his nostris literis potestatem proponendi, agendi, transigendi cum *Majestate Vestra* facimus planè eandem quæ ei proximis literis commendatitiis facta est: quicquid ab eo transactum nostro nomine atque conclusum erit, id omne ratum nos esse habituros, Deo bene juvante, nostrâ fide spondemus. Deus ille *Majestatem Vestram* quam diutissime conservet, rebus *Protestantium* columnen atque præsidium.

GUIL. LENTHALE,
Prolocutor Parlamenti
Reipub. Angliæ.

Westmonasterio. Maii 15.
An. 1652.

Parlamentum Reipub. Angliæ

Serenissimo Principi

F R E D E R I C O

Daniæ Regi.

Serenissime Rex, Amice Charissime,

CUM voluntate ac nutu summi rerum omnium moderatoris Dei Opt. Max. factum sit ut nos demum restituti, pristinum locum atque munus in *Republica* gerenda obtineamus, placuit imprimis ea de re nec *Majestatem Vestram*, utpote Vicinum nobis & Amicum Regem, esse celandam, & quem ex adversis rebus vestris capiamus dolorem simul esse significandum: id quod ex eo studio eaque diligentia nostrâ facile perspicietis quam ad pacem inter *Majestatem Vestram* Regemque *Sueciæ* reconciliandam & adhibemus nunc, &, quoad opus erit, adhibebimus. Quapropter Internuntio nostro ad Serenissimum *Suecorum* Regem Extraordinario *Philippo Meadows* negotium dedimus, ut *Majestatem Vestram* his de rebus nostro deinceps nomine adeat, ea communicet, proponat, agat atque transigat, quæ commissa sibi à nobis & mandata esse ostendet. Quam ei fidem *Majestas Vestra* hoc in munere habuerit, eam nobismetipsis habere se credat, rogamus.

Deus

Deus *Majestati Vestrae* ex istis omnibus rerum
 suarum difficultatibus , in quibus tamen forti
 & magno animo versatur , felicem lætumque
 exitum primo quoque tempore concedat.

GUIL. LENTHALL,
 Prolocutor Parlamenti
 Reipub. Angliæ.

Westmonasterio. Maii 15.
An. 1659.

F I N I S.

